

WANT

NIUSPEPA BILONG YUMI OL PAPUA NIUGINI STRET! 27 YIA NAU

32 pes

Namba 1,292

Wik i stat long Fonde Epril 1, 1999

60t

INSAIT

Kanage

- pes 26



Ol meri long Yuntek i straik

p3

Ista Spesel ripot stat long pes 13



Amamas na bung... • Ol memba bilong Pipels Demokretik Muvmen (PDM) i bungim long soim strong bilong ol. PDM i gat bikpela namba long palamen na ol inap strongim gavman o senisim gavman. Foto: Ivan Bayagau.

Kalsa na Stet i birua bilong ileksen

PETER MAIME i raitim

OL PIPEL bilong PNG i save pait, stilim ol balot pepa, brukim ol balot bokis na raunim ol ileksen opisal long ileksen taim bikos pasin kalsa na Stet i no save wok poroman. Dispela em tingting bilong Dokta Ray Anere, wanpela save man bilong politiks husat i tis long Yuniversiti ov PNG long Mosbi.

Dokta Anere i bin givim tingting bilong em taim Wantok i askim em, bilong wanem na ol pipel i save pait long ileksen olsem nau i kamap long Simbu.

Ilektorel Komisn wantaim Plis long Kundiawa i ripot olsem planti ples long Simbu i no bin vot gut long bai ileksen bikos ol sapota bilong ol kendidet i sut long gan na sampela i ronowe wantaim ol balot pepa long bus na makim ol yet. Ripot i tok bihain ol pipel i karim kam bek ol pepa na tokim ol bos bilong ileksen tim long sainim na pulamapim long balot bokis. Dokta Anere i tok long PNG, Stet i no strong tumas na winim ol kalsa o pasin bilong ples. Em i tok taim Stet i slek, ol lo bilong ileksen na ilektorel sistem tu i malum malum. Em i tok, taim Stet wantaim lo bilong em i slek, pasin kalsa i save tekova na daunim pawa bilong Stet. Long ileksen taim, ol kendidet na ol sapota i laik mekim save long singsing, danis na save redim ol bikpela kaikai na givim i go long ol vota.

Em i tok ol pipel i ken bihainim Stet na vot long ileksen tasol ol i nogat bilip long Stet. Em i tok ol pipel i gat strongpela bilip long kalsa o pasin bilong ples. Stet tu i slek bikos em i sot long ol risosis long ronim gut ol ileksen. Taim Stet i sot long ol risosis, ol plis i no save kisim inap mani long was long ileksen. Na taim plis i no stap long daunim hevi bilong lo na oda, ol pipel i save mekim samting long laik, Dokta Anere i tok.

Em i tok narapela as ol pipel i save pait long ileksen i stap long ilektorel sistem. Long sistem PNG i gat nau, ol kendidet i ken win long ol liklik namba bilong vot long provins, ilektoret o long wanpela haus lain. Em i tok sistem tu i givim spes long planti kendidet long resis long ileksen. I nogat mak bilong ol kendidet na wan wan ilektoret i ken kisim 50 o 100 kendidet long wanpela ileksen. Dispela tu save kamapim resis pasin namel long ol kendidet na i ken kirapim trabel.

Dokta Anere i tok moa olsem, dispela resis pasin tu i save stap long ol wan pisin na haus lain long holim pawa bilong politiks. Taim kain kain grup na haus lain i resis long kisim pawa bilong Stet, dispela tu i ken kamapim ol birua pasin.

Edministresen bilong Is Sepik i gat tok pait

...Tok i sut long mani i paul na ol hevi

WENCESLAUS MAGUN i raitim

EDMINISTRETA bilong Is Sepik Peter Maginde i kisim strongpela tok salens i kam long ol pablik sevans long rausim em bihainim ol tok paul na krangi pasin long edministresen bilong provins. Deputi Edministreta bilong Polisi Plening, Ekonomik

na Sosel Sevises, insait long Is Sepik Provinsal Gavman, Francis Sumanop i raitim wanpela strongpela pas i go long Gavana bilong Is Sepik, Sir Michael Somare long rausim Provinsal Edministreta, Peter Maginde.

Wantok i kisim wanpela pas Mista Sumanop i raitim i go long Sir Michael long Februari 9, 1999 long ol samting we i

paul long Is Sepik edministresen. Long pas Mista Sumanop i tok:

• Taim Mista Maginde i kamap Provinsal Edministreta, em i mekim planti raun i go ausait long provins. Sampela ol dispela raun em i mekim, i bilong em yet na sampela em ol bisnis raun. Dispela olgeta raun i kosim gavman planti mani na i nogat gutpela kaikai. i go moa long pes 3

355ml Can K1.00 tasol

Don't pay any more! Recommended Retail Price

Enjoy Coca-Cola. Everywhere

355ml Can K1.00 tasol

Don't pay any more! Recommended Retail Price

COCA-COLA AND THE COCA-COLA BOTTLER DESIGN ARE REGISTERED TRADEMARKS OF COCA-COLA COMPANY

PLIS RIPOT

MADANG: Plis long Madang i bin holim pasim nainpela man husat i brukim Madang holisel stoa na stilim ol samting na kesmani inap long K15,000. Stil pasin ya i bin kamap long bikmoning las Sarere.

Provinsal Plis Komanda bilong Madang Ben Simanjon i toknainpela man olgeta i bin karimaut stilpasin ya tasol ol bin holim pasim sevenpela taim narapela tupela i ronawe.

Em i tok wanpela plis dog, Bani i bin helpim ol plis long kwiktaim spainim sevenpela stil man ya. Mista Simanjon i tok nainpela man i bin karim .22 raifel, wanpela flea poket naip, skru draiva na ol i katim waia long go insait long bilding.

Em i tok ol bin pasim pes bilong sekyuriti wantaim hap klos na taitim em bipo ol i katim lok na go insait long opis na stilim K15,000 kes mani.

Olgeta plis yunit i bin kisim toksave long dispela stilpasin na ol i sanap sambai i stap. Ol i kisim ol plis dok husat i bin painim sevenpela stilman i hait wantaim mani na ol samting long nambis. Na ol i kisim olgeta sevenpela taim tupela tasol i ronawe. Ol bin kisim bek olgeta mani na ol samting, nogat i lus.

MADANG: Plis ripot long Madang i tok ol plis long provins i holim pasim na sasim wanpela man husat i bin bagarapim wanpela yangpela meri las wik.

Samting ya i bin kamap long Amron Plantesen las Sande. Provinsal Plis Komanda Ben Simanjon i tok dispela meri na gelpren bilong em i wok long painim kokonas taim saspek ya i bungim ol, rausim narapela meri, pulim em i go long bus na bagarapim em.

ISTEN HAILANS: Tupela man i bin dai long Isten Hailans long insait long ol birua i kamap long provins long dispela wik.

Provinsal Plis Komanda Giosi Labi i tok wanpela kalabus man i bin dai insait long birua taim ka i wok long karim nainpela kalabus lain i go long Bundaira kalabus long Henganofi.

Long Barolla Hil namel long Kainantu na Henganofi ol kalabus lain i abrusim ol plis na ol i ronawe. Bihainim dispela gan bilong wanpela plisman i bin pairap na kamapim bagarap long wanpela kalabus man na em i dai. Wanpela plisman i bin kisim bagarap na ol i karim em i go long haus sik. Mista Labi i askim ol pipel long Henganofi na Aiyura long helpim ol plis na ripotim sapos ol i lukim ol ronawe kalabus man long eria bilong ol.

Em i tok ol lain ya em ol man nogut husat i brukim lo long wokim stilpasin, bagarapim meri na brukim haus na karimaut stilpasin na ol man i mas was gut long ol na putim ripot long ol plis sapos ol i lukim ol.

Long narapela birua, wanpela man i bin dai bihain long narapela i katim het bilong em.

Mista Labi i tok dispela birua i bin kamap long ples Taro insait long Isten Hailans las Sarere.

Em i tok ol man i wok long lotu taim wanpela man wantaim naip i go insait long sios wantaim naip na katim het bilong wanpela man na em i dai. Mista labi i askim strong ol ples lain long tokaut long man husat i wokim dispela birua pasin.

Karani kros long Lasaro na Ling Stuckey

YAKAM KELO i raitim

MINISTA Mathias Karani i bin kros nogut tru taim namba tu Praim Minista lairo Lasaro na Minista bilong Komes na Tred lan Ling Stuckey i no bin kamap long bikpela miting bilong ol wokus federesen na union lain long las wik Fonde.

Dispela miting i bilong toktok long planti bikpela toktok bilong potnait pe bilong ol wokmanmeri aninit long lo bilong Minimum Wejes Bod na arapela hevi bilong ol wokmanmeri na ol kampani na bisnis insait long Papua Niugini.

Minista bilong Lebas na Emploimen na Yut Mathias Karani i tok em i no amamas

tru long tupela lida ya i no kamap long harim toktok bilong ol mausman bilong ol bisnis na kampani na ol union lain. Bikos dispela em bikpela samting long harim ol toktok na tingting bilong ol kampani na bisnis na ol union lain long hevi ol i bungim long sait bilong takis, potnait pe na planti arapela hevi gavman i save tromoi antap long ol.

Mista Karani i tok dispela em pasin nogut tru long ol lida bilong palamen long i no ken harim tok na kamap na em bai tokim Praim Minista Bill Skate long dispela samting.

Mista Karani i stapim miting long Fonde las wik na skruim taim i go long bihain taim we ol i redi gut long kamapim miting gen.

Mista Lasaro em namba tu Praim Minista na Minista i go pas long Treseri o fainens insait long kantri. Na Mista Ling Stuckey em Minista bilong Komes na Tred o ol wok bisnis insait long kantri.

I gat luksave olsem lo bilong Minimum Wejes Bod i no bin senis liklik long 1992 i kam nau. Aninit long lo, dispela lo i mas gat senis olgeta tripela krismas long sait bilong skelim ol hevi na senis insait long kantri na bihainim wantaim potnait pe bilong olgeta woka insait long kantri.

Siaman bilong Lae Samba ov Komes Alan McLay husat i bin kam olgeta long Lae long dispela bung i tokim Mista Karani olsem sapos em i tok-tok wantaim Praim Minista

long wari bilong em, em (Karani) i mas askim Praim Minista long mekim ol Minista bilong em long gavman i mas mekim wok wankain olsem ol bisnis na kampani i save mekim. Ol bisnis na kampani long kantri i save mekim bikpela wok na ol i laikim bai gavman tu i mas mekim wankain bikpela wok olsem ol, Mista McLay i tok.

Planti bikman i makim ol union grup insait long kantri na ol bisnis insait long kantri tu i bin kamap long dispela bung we i no kamap bikos tupela Minista ya wantaim ol dipatmen het bilong ol i no bin kamap. Olsem na Mista Karani i stapim miting na bai kolim miting gen long narapela taim bihain.

Ol mama i kisim save

IVAN BAYAGAU i raitim


"Mi bin kam long dispela skul bikos mi laikim stret long rit na rait na tu mi laik ritim buk baibel na Wantok niusepepe mi yet" dispela em toktok bilong wanpela mama husat i bin i kisim setifiket long rit na rait o literesi program bilong Momba bilong Mosbi Saut, Ledi Carol Kidu.

19 mama bilong Kipo setelmen insait long Mosbi i nambawan ol meri long kisim setifiket long Kisim save program bilong Mosbi saut eletoret insait long Mosbi.

Dispela kos i bin kamap long mun Septemba las yia webai tisa bilong ol mama i bin meri bilong Engliken bisop bilong Mosbi diosis, Misis Bennita Hough. I bin gat moa long 40 meri tasol planti bilong ol i no bin pinisim skul bilong ol bikos ol i bin gat ol problem bilong ol yet na ol i no pinisim skul bilong ol.

Ol i bin go skul long tupela de namel long wik we ol i bin lainim long rit na rait na luksave long ol narapela samting i save kamap long olgeta de long sindaun bilong ol.

Misis Hough i tok i bin gat kainkain problem i bin kamap long taim bilong dispela kos tasol ol mama i bin givim tru taim bilong ol long kam long kos long kisim save long rit na rait.



• Toma Poya i ritim liklik toktok bilong en na tisa bilong Toma, Misis Bennita Hough i helpim em. Foto: Ivan Bayagau.

Plis fos i gat nupela helikopta

PLIS Fos insait long Papua Niugini nau i gat nupela helikopta bilong strongim na sapotim wok bilong plis insait long kantri. Dispela nupela helikopta i bin kam pundaun long Bomana Koles long Mosbi las wik Fraide we ol bikman bilong gavman na plis fos i welkamim.

Dispela balus i kos samting olsem K3 milien na Gavman i baim long Amerika. Bai em i mekim wok bilong plis long ron antap long klaut na helpim ol plisman long graun long karimaut ol wok bilong lo na oda insait long kantri. Bai dispela helikopta i wok long Mosbi siti we i gat planti bikpela trabel na hevi i save kamap. Tasol bai em i go tu long helpim wok bilong ol plis fos long arapela provins taim ol i singaut long helpim.

Minista bilong Plis Thomas Pelika i tokaut olsem dispela helikopta i gat olgeta samting bilong mekim wok bilong plis fos i go isi. Em i gat ol strongpela masin bilong lukim na painimaut long ol man nogut na wanem kain samting ol i yusim. Na tu em i gat ol gutpela masin bilong toktok wantaim ol plisman long graun taim ol i karimaut ol wok bilong ol.

Mista Pelika i tok ol masin bilong helikopta ya i ken luksave long wanem hap ol man nogut i hait i stap na ol bai singautim ol long kam ausait na givim ol yet long han bilong plis. "Sapos nogat, narapela samting bai i kam".

Mista Pelika i tok dispela helikopta tu i ken karim 6-pela plisman na em i ken ron long Mosbi i go long Wewak long wanpela de.

Dispela helikopta i bin kamap bihain long gavman bilong Bill Skate i bin mekim toktok las yia olsem ol bai kisim wanpela helikopta

bilong helpim wok bilong plis fos insait long kantri.

Tasol Oposisen lida Bernard Narokobi i tok dispela helikopta i no inap mekim gut wok bilong en bikos ol Praim Minista Bill Skate bai yusim olsem liklik (toi) samting bilong em long wok politikis bilong em.

Mista Narokobi i tok ol plisman insait long kantri i sot long planti samting olsem gutpela haus slip, ol rurel plis stesin i bagarap na ol ka bilong plis long yusim long mekim wok bilong ol. Tasol gavman i go het na tromoi mani bilong mekim ol dispela wok long kisim helikopta na dispela bai putim ol plisman wantaim planti hevi ol i gat long en.

Em i tok i gat ol helikopta bilong PNG Difens Fos (ami) i stap na inap gavman i ken yusim long helpim ol plisman wantaim wok bilong ol. Tasol nau bai Gavman i wok long tromoi mak olsem K2 milien olgeta yia long lukautim dispela helikopta na dispela inap putim hevi long baset bilong plis fos olgeta yia.

Lapun bilong Pangu Pati Sir Pita Lus i tok dispela helikopta bai Plis Komisina Peter Aigilo na Plis Minista Thomas Pelika bai yusim long wok bilong tupela na i no inap mekim stret wok bilong en.

Sir Pita Lus i tok taim gavman i bin toktok long rausim 1000 plismanmeri insait long kantri, dispela i sut long senisim ol dispela lain wantaim dispela helikopta.

Tasol em i tok namba bilong ol manmeri insait long kantri i wok long go antap na i mas gat moa plisman long was long ol.

Sauten Hailans Galp haiwe nogat mausman bilong ol Galp pipel

OL lida bilong Galp provins i no amamas long bikpela rot projek bai kamap long provins bilong ol we bai i joinim Sauten Hailans provins. Bikos dispela disisen i no kisim tingting bilong ol.

Bung bilong ol Galp lida long dispela wik i tok gavman i mekim dispela disisen long projek we bai kamap long provins bilong ol tasol ol yet i nogat wanpela tingting bilong ol insait. Ol i no bin kisim toksave long stap insait long dispela toktok na ol i no amamas ol pasin gavman i mekim long ol.

Gavana bilong provins Riddler Kimave i tok dispela bikpela rot projek bai bungim provins bilong em wantaim Sauten Hailans na em i mas stap insait long ol tok-tok bilong dispela projek. Tasol gavman i mekim disisen pinis na rausim em wantaim Gavana bilong Sauten Hailans Anderson Agiru long stap insait long bod bilong dispela rot projek.

Mista Kimave i tok em i sapotim dispela projek bikos bai rot ya i bungim ol pipel bilong Niugini wantaim Papua na planti gutpela sevis na developmen bai kamap long helpim tupela provins na tu Papua Niugini bai kisim planti helpim na sevis long dispela rot.

Sapos dispela bikpela rot i kamap, bai i mekim isi long ron bilong ol ka, saplai na kago i go long ol bikpela maining olsem Mt Kare, Hides Ges, Kutubu na ol arapela projek na sevis insait long Galp na Sauten Hailans provins. Bai ol kago na saplai i kam sua long nambis long Kerema bris na i go long ol dispela maining bihainim dispela Sauten Hailans Galp haiwe rot.

Gavana Kimave i tok dispela rot em gutpela bikos bai i givim sevis long ol pipel bilong em long Baimuru, Kikori na Ihu. Olsem na ol i mas gat mausman insait long ol toktok na plen bilong dispela rot.

Dispela bikpela rot em Nesenel Eksekutiv Gavman (NEC) i pasim tingting long kamapim we ol bai kolim Sauten Hailans Galp haiwe. Bikpela beng bilong PNG, Papua Niugini Benking Kopresen (PNGBC) bai i go pas long skelim mani long wok bilong kamapim dispela rot na Barclay Bros bai go pas olsem kontrakta bilong wokim dispela rot.

WANTOK

All departments. Phone: 325 2500 - Fax: 325 2579
P. O. Box 1982, Boroko, NCD, Papua New Guinea

Publishing Weekly, Thursday, for
Word Publishing Company Pty. Ltd.

Printed and published by Anna Solomon of Bittern Place, Gordons, at Allotment 2, Section 209, Spring Garden Road, Hohola, for Word Publishing Co. Pty. Ltd.

Acting General Manager and Group Editor in Chief:
Anna Solomon.
Advertising Manager:
Mike Kanin.
Editor of Wantok:
Yakam Kelo.

Papers distributed by air throughout PNG.
Available by air mail subscription within Papua New Guinea and overseas
Email address:
word@global.net.pg

Advertising deadlines, Display bookings: Tuesday midday. Camera ready copy: Wednesday midday. Classified Advertising: Wednesday 5pm.

Word Publishing Company Pty. Ltd. is owned by the four major churches of Papua New Guinea: Catholic 55%, Lutheran 25%, Anglican 10%, and United 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms acceptance are available at Word Publishing Company Pty. Ltd. and are set out in full on the reverse side of its official display Advertising Bookings form.

Edministresen bilong Is Sepik i gat tok pait

I kam long pes 1

Olsem na Mista Sumanop i askim opis bilong Sir Michael long mekim wanpela odit ripot long painim aut amas mani olgeta Mista Maginde i yusim long raun;

• Taim em i no kisim tok orait long Provinsel Eksekutiv Kaunsel na Nesenel Lain Dipatmen, em i paulim K100,000 na baim 15 letpop kompyuta long wanpela Intanesenel Akaunting kampani long Singapo;

Mista Sumanop i tok insait long pas olsem, maski Provinsal Treseri opis i no givim tok orait, Edministreta i go het na em yet i go long Singapo long Septemba 1997 bilong stretim dispela dil.

"I kam inap nau mipela i nogat wanpela Provinsel Data bes na planti ol dispela kompyuta em i baim i nogat spea pat bek-ap na i no wok moa," em i tok.

• Taim em i no kisim tok orait long Provinsal Eksekutiv Kaunsel, Provinsal Edministreta i go het na wok bung wantaim Provinsal Ligel Opisa, Ben Peri na stretim ausait long kot na givim ol sinia publik sevana moa long K35,000 bilong publik mani.

Mista Sumanop i tok olsem, ol i givim dispela sinia publik sevana wanpela sek, K15,000 na promisim em wanpela ka bilong gavman na ol arapela helpim.

• Provinsal Edministreta Peter Maginde i wanbel na tok orait long givim publik mani inap long mak bilong K20,000 i go long wanpela sinia divisinel het aninit long sekta bilong mi na i kirapim gol bisnis, Mista Sumanop i tok.

Mista Sumanop i tok dispela publik seven i wok yet long Provinsal Gavman na mekim praivet bisnis wantaim. "Dispela em ples klia tru olsem em i brukim lo bilong Publik Sevis Menesmen Ekt na i luk olsem i kirapim bel bilong ol arapela divisinel het long kisim kain ol helpim long Provinsal Edministreta Peter Maginde."

• Dispela Dipatmen i spenim publik mani long giamanim pasin bilong givim wok long Bernard Hagoria long ronim ileksen kos bilong em long Yangoru-Saussia.

Pas i tok moa olsem wanpela taim ol i yusim mani aninit long Divisen bilong Koryuniti Dvelopmen long baim ol kos fi bilong Mista Hagoria.

• Ol i baim narapela saveman bilong arapela kantri, Arne Rasmussen long K33,000 bilong mani insait long Rurel Eksen Progrem bilong Gavana na i nogat ekspendisa ripot long dispela samting.

"Divisen bilong Fiseris na opis bilong mi i tokaut long dispela hevi long Provinsal Edministreta Mista Maginde, tasol i kam inap tude, ol i no kisim wanpela gutpela bekim bilong kisim bek mani. Na i nogat wanpela ripot long 'by-catch' pis projek dispela saveman i kisim wok long mekim," pas bilong Mista Sumanop i tok.

• Draf kopi bilong Odita Jenerel Ripot bilong 1996 Is Sepik Provinsal Gavman ripot i go aut na i tokaut long planti ol paul pasin long sait bilong mani insait long Is Sepik Provinsal Edministresen.

Pas bilong Mista Sumanop i tok, dispela ol asua i ken saspenim Is Sepik Provinsal Gavman. Olsem na Mista Sumanop i askim Gavana, Sir Michael Somare long stapim dispela pasin long kamap na rausim Provinsal Edministreta Mista Maginde.

Edministreta Peter Maginde ino laik toktok wantaim Wantok long aste. Eksekutiv Opisa bilong Provinsal Tendas Bod James Baloiloi i bin stap long opis bilong Edministreta na i tok em i save olsem Provinsal Tendas Bod i bin oraitim ol dispela kompyuta we edministresen i baim long Singapo. Ol dispela kompyuta i go long distrik na tu long divisen wanwan long kamapim wanpela data beis netwok. Tasol dispela netwok i no pinis yet bikos ol saveman i wok long stretim i stap.

Mista Baloiloi i tok em i no inap bekim ol arapela kwesten bikos Gavana Sir Michael Somare i kisim pinis dispela pas bilong Mista Sumanop. Sir Michael Somare i no stap long Palamen opis long bekim ol dispela toktok long aste.

Ol turangu lain bilong woa i askim Japan long baim kompensesen

YAKAM KELO i raitim

OL lapun bilong Papua Niugini husat i bin mekim bikpela wok, kisim pen, bungim birua na kisim bagarap long bikpela Wol Woa 2 long 1942 inap 1945 i askim yet Japan Gavman long baim kompensesen long ol.

Namba bilong ol lapun i olsem 111,100 husat i bin stap insait long olgeta wok na hevi bilong Japan ami.

Bihainim dispela singaut bilong ol, ol i soim rekot olsem 8,908 manmeri i bin dai, ol Japan ami i nogat kaikai na kilim ol manmeri na kaikai moa long 2,590, katim susu bilong ol meri na kaikai mak olsem 101, slip wantaim ol meri na bihain kilim ol mak olsem 6,570, ol strongpela marasin ol ami i yusim i kilim olsem 4,271 manmeri, ol ami i yusim ol meri long pasin pamuk 17,324, ol ami i yusim ol lapun olsem plisman na skaut mak olsem 4,091, ol i yusim ol lapun olsem ami long pait 3,641, ol ami i yusim ol lapun olsem ol kago boi mak olsem 46,364, Japan ami i pusim ol manmeri long painim kaikai na lukautim ol mak olsem 16,631, sam-

pela lapun i mekim wok olsem marasin boi mak olsem 378 na ol Japan ami i bin pasim ol lapun na kukim long paia na kaikai ol na hangamapim wanpela na i dai. Mak bilong ol dipsela lain i olsem 289.

Siaman bilong Papua Niugini Asosiesen for Redress of Asia Pacific (ol lain i bungim hevi long woa) Mista Gabriel Laku i tok em i bin salim pas i go pinis long Praim Minista Bill Skate long Gavman bilong PNG i mas sapotim dispela askim bilong ol lapun bilong PNG long kisim kompensesen i kam long Japan Gavman. Tasol Mista Skate i no bekim dispela pas bilong ol.

Mista Laku i tok loya bilong ol long Japan Takagi Ken'ichi i bin tok olgeta rot na wok bilong kisim kompensesen long dispela bagarap i ken kamap isi sapos Gavman bilong Papua Niugini i toktok gut wantaim Gavman bilong Japan na stretim dispela hevi. Dispela Japan loya Mista Ken'ichi i bin mekim wankain singaut gen long Julai 26, 1998 long las yia.

Siaman Mista Laku i tok ol arapela kantri husat i bin mekim wankain singaut long kisim kompensesen long

Japan i bin kisim kompensesen bilong ol bikos Gavman bilong ol i pusim na strongim dispela hevi na ol pipel i kisim mani bilong ol. Ol tripela kantri tasol husat i no kisim yet kompensesen mani bilong ol em Papua Niugini, Marshall Ailan na Truk long Noten Marianas.

Mista Laku i tok em i mekim wankain singaut gen long dispela wik wantaim namba tu Praim Minista lairo Lasaro na em (Lasaro) i tok bai em i kamapim dispela toktok long bung bilong kabinet.

Mista Laku i tok ol lain husat i kisim bagarap na nau i stap laip yet, ol lain husat i bin mekim wok long helpim ol Japan ami na nau i stap yet, planti dai pinis tasol ol pikinini bilong ol i stap na i wok long kirapim dispela toktok, ol i mas kisim kompensesen i kam long bagarap na birua ol ami bilong Japan i mekim long ol.

Ol i laikim dispela mani i mas kam long ol wanwan lapun na famili na i no ken kam long Gavman bilong PNG olsem grent mani bilong wokim skul, haus sik na ol arapela sevis aninit long sapot o helpim progrem bilong Japan Gavman, Mista Laku i tok.

Nupela Kagua Erave memba laikim plis stesin

NUPELA memba bilong Kagua Erave Charles Luta i askim nesenel gavman long givim em K300 o K400,000 na em i mas hariap wokim wanpela plis stesin long Kagua. Em i laikim gavman tu long makim wanpela hap graun bai em i ken sanapim dispela plis stesin long en. Dispela em namba wan toktok em i mekim long dispela wik long Mosbi taim em i kamap.

Mista Luta i mekim dispela toktok bihain tasol long em i lusim Kagau na i kamap long Mosbi long Tunde na go stret joinim Pipels Demokretik Muvmen (PDM) Pati.

Mista Luta husat i bin winim Kagua Erave sit long dispela wik i no westim taim na i laik wok tasol long bringim sevis i go long ol pipel bikos taim bilong em i sot pinis long bringim sevis long ol pipel.

Em i tok tupela krismas tasol i stap yet long narapela jenerel ileksen na ol pipel bilong Kagua i westim sampela taim pinis long kot bilong ileksen long 1997. Olsem na em i laik sut stret long bringim sevis long ol pipel bilong Kagua Erave.


Mista Luta i tok em i no nupela long resis long ileksen. Em i bin resis long 1997 na kamap namba tu long David Basua. Tasol em i kisim dispela ileksen

risal igo long kot na kot i kamapim bai ileksen we em i winim.

Em i tok em i bin wanpela provinsal asembli memba bipo na ol pipel i save gut long wok bilong em we em i save pait na wok hat long kamapim samting long helpim ol pipel bilong em. Olsem na ol pipel i ting mi ken kamapim moa sevis long ol olsem na ol i makim mi long nesenel palamen, em i tok.

Mista Luta i tok em i save olsem bai David Basua, olupela memba i kamapim kot long salensim ileksen risal bilong em, tasol em i tok dispela samting i bin wankain olsem 1997. Em i tok sampela balot bokis bilong em ol ilektorel opisa i no kaunim bikos ol i tok sampela samting i krangi long en. Em i wankain tasol olsem ol balot bokis we Mista Basua i laik kot long en we ol ilektorel opisa i no inap kaunim bikos sampela krangi pasin i kamap long ol, em i tok.

Tasol Mista Luta i tok dispela salens i no ken stapim em long kamap olsem memba bilong Kabua Erave. Em i laikim palamen i mas blesim em kamap memba hariap bikos em i mas go het long mekim ol wok em i mas mekim long bringim sevis long ol pipel bilong Kagua Erave.



• Nupela memba bilong Kagua Erave, Charles Luta.

TORORO

TORO BAI GO LONG DARU NA LONG AUSAIT LONG TEMINOL EM DALINIM OL BUAI OLSEM WARA!!!

TAMBU LONG KAIKAI BUAI INSAIT, MI DALINIM OL LONG HIA NA GO INSAIT!



NAU EM GO INSAIT NA WETIM BALUS LONG TEK-OFF... INO LONG TAIM NA BEL BILONG EM TANIM!!!

AIYOOMARIA! BEL BILONG MI TANIM YA.



BAGA GIVIM SIKSTI IGO LONG TOILET NA MEKIM SAVE LONG PEKS... EM PEKS ISTAP NA OL I SINGAUTIM NEM BILONG BALUS BILONG TORO!!!

LAST BODING KOL BILONG PASINDIA BAI GO LONG DARU... OLGETA GO LONG GET NAMBATU!



NAU OL I SINGAUT GEN... LAST KOL NAU! SAPOS YU NO KAM NA BAI MIPELA PASIM GET NAU!!!

INSAIT LONG TOILET TORO JEST SINGAUT BIKPELA TRU!!!



WANTOK

NIUSPEPA BILONG YUMI OL PAPUA NIUGINI STRET

PNG bai baim K50 milion long Sandlain

Asua bilong Gavman bilong Sir Julius Chan na Chris Haiveta bilong givim kontrak long Sandlain Intanesenel long 1997 bilong go pait na pinisim hevi long Bogenvil nau i kamapim bikpela hevi moa long Gavman bilong Prais Ministra Bill Skate na lairo Yasaro.

Pasin Gavman bilong Skate na Lasaro i mekim bilong pulim dispela kot bilong Sandlain i go wantaim tingting bilong winim kot, nau bai kosim ol pipel bilong Papua Niugini moa long K40 milion.

Papua Niugini long dispela taim i sot tru long mani. Nau Intanesenel Kot i givim oda pinis olsem Gavman bilong Papua Niugini i mas baim yet ol ami bilong Sandlain Intanesenel. Watpo na olgeta dispela hevi i kamap i go bikpela olsem?

I tru asua i stap pastaim long Gavman bilong Sir Julius Chan wantaim Haiveta taim ol i givim namba wan tok orait long Sandlain Intanesenel.

Gavman bilong Skate na Lasaro i luksave pinis olsem i gat kontrak i stap pinis na ol i no laik go het na baim Sandlain long K18 milion na stretim kwik dispela hevi. Nogat. Ol i ting ol inap soim save bilong ol long kot na nau ol i lus. Gavman bilong Skate Lasaro i givim wok long planti ol saveman bilong lo long helpim ol loya bilong PNG long winim dispela kot, tasol ol i lus.

Tude kos bilong olgeta dispela tok pait long kot na kontrak pe bilong Sandlain Intanesenel i go antap moa long K40 milion. PNG i gat dispela mani o nogat. Nogat PNG i lusim planti ol propeti bilong kantri long ol arapela kantri na tu insait long PNG yet bilong bekim dispela dinau. Sapos dispela i kamap, PNG i gat wanem kain ol rot bilong kisim bek dispela mani. Ating ol pipel bilong PNG bai digim poket bilong ol i go daun moa long baim takis na stretim olgeta dispela hevi.

Asua i stap long Gavman bilong dispela de!

WANTOK

NIUSPEPA BILONG OL PNG STRET

P. O. Box 1982, Boroko
Telepon namba: 325 2500
Feks namba: 325 2579

PE BILONG WANPELA YIA 52 NIUSPEPA

PLES	AIR
PNG	K 60.00
Ostrelia na Nu Silan	US\$46.00
Esia Pasifik na Japan	US\$55.00
Amerika na Yurop	US\$95.00

BOGENVIL NA NIUGINI AILAN RIPTO WANTAIM VERONICA HATUTASI



Stail bilong ol pikinini Wes Nu Briten yet . . . ol pikinini bilong ples Bola long Talasea eria insait long Wes Nu Briten sindaun pilai amamas bungim ol plawa long waisan.

Ol ileksen pepa long Bogenvil i aut pinis

OL RIT o pepa bilong ileksen long makim ol man i go long Bogenvil Konstituen Asembli (BCA) i bin auit long las wik Fonde.

Dispela i givim go het long nominesen i stat long las Fonde yet. Ol i stretim tu ol ilektorel mak o baunderi na kamapim 29 nupela konstituensi wantaim tok orait bilong BCA asembli. Pastaim i bin gat 40 konstituensi tasol long Bogenvil. Dispela i kisim ol konsituensi long provins i go long 69.

Wantok i no bin nap long kisim moa toktok long Buka long dispela samting bikos olgeta telipon i no wok.

Tasol long ol ripto, ileksen bai i kamap klostu taim insait long neks tu wiks.

Olgeta dispela samting i wok long kamap maski Oposisen na ol loman i tok em i egensim lo bilong kantri.

Long ol ripto we Wantok i kisim, ol pipel long provins i laik holim ileksen bikos dispela bai i stretim rot long kirapim rikonsiliesen gavman long ailan. Na ol i laikim rikonsiliesen gavman bikos em bai bungim wantaim olgeta grup na ol mausman bai i toktok wantaim nesene gavman long politikel futja o bihain taim bilong Bogenvil.

Planti pipel long ailna i laikim gavman bilong ol yet na dispela i bin kamap long ples kliia taim G17 grup i bin wokim wanpela wokabaut i go long Bogenvil tupela wik i go pinis.

Sir John Kaputin i bin go pas long komiti we i bin gat ol arapela lida bilong Niugini Ailans long en.

"Mipela i laikim BRG long wanem em bai makim maus bilong mipela long ol toktok i sut long politikel

futja bilong Bogenvil wantaim Nesene Gavman," wanpela man Bogenvil i tok.

Planti Bogenvil pipel i no wari sapos gavman ol i laik kirapim na ileksen we ol i laik holim i bihainim lo. Ol i tok sapos rot we ol i laik bihainim bai i strongim ol wok bilong painim gutpela sindaun na i no bagarapim, ol bai go het.

"Sampela taim long ol situesen long laip, ol save brukim na senisim ol lo long mekim rot long gutpela samting i kamap," man ya i tok.

Em i tok Bogenvil nau i wok ausait long ogenik lo bilong provinsal gavman na tu long nupela rifoms, stat yet taim ol bin putim provins long saspensen long Desemba 31, 1998.

Em i tok yumi wok long dil wantaim laip bilong man na yumi no laik lukim moa man i dai long hevi long Bogenvil.

Em i tok ol grup we i bin birua pastaim i wok bung wantaim nau long kamapim gavman bilong Bogenvil na tu go hetim ol wok long painim gutpela sindaun. Na sapos ol samting i go gut, larim olsem na ol atoriti i ken glasim, skelim na stretim sait bilong lo.

Long ol arapela nius, sindaun long olgeta hap bilong Bogenvil i stap isi wantaim nogat meknais. Ol wok long painim gutpela sindaun i go gut tasol, maski ol nesene lida i gat hevi namel long ol na ol i no wok bung wantaim long stretim ol hevi long ailan.

Ripto i tok ol yangpela man i laik wok long ol gaden kakau na kokonas na ol arapela rot long pulim mani long en.

Tasol ol i laikim mani long stretim ol gaden kakau na kokonas bilong ol.

Ripto i tok tu olsem ol grup we i bin stap insait long pait long Bogenvil nau i wok long toktok long rot bilong lusim ol samting bilong pait. Dispela em ol BRA na resistens grup.

Ripto i tok planti pipel i laikim bai tupela grup ya i mas lusim ol samting bikos taim ol man i holim ol gan samting yet, ol pipel bai i stap long pret na pasim fridom bilong olsem ol arapela sitisen bilong kantri na tu long wol.

Wes Nu Briten kirapim komiti bilong lukautim ol Katolik Hai skul

WES Nu Briten kabinet i givim tok orait pinis long kirapim wanpela Katolik Hai Skul Implementesen komiti bilong provins.

Gavana Bernard Vogae i tok dispela komiti bai lukautim ol progrem na lukim olsem ol i karim kaikai. Dispela em long Katolik Hai skul long Iboki insait long Kaliali we i stap aninit lonmg Kove Lokol Level Gavman eria.

Mista Vogae i tok hai skul komiti bai i wok wantaim ol arapela grup we i stap insait long ol skul projek long lukluk long edukesen projek makim provinsal gavman.

Kabinet i makim nominetet memba bilong ol sios, Gabriel Bakani olsem siaman long komiti na Francis Auram olsem deputi siaman. Ol arapela komiti memba em long Francis Penga husat i makim komiti, Fred Willie i makim Katolik edukesen ejensi, John Malagisa i makim edukesen na Pater James Corbally i makim Katolik Sios.



Wes Nu Briten kirapim Famas Asosiesen

OL FAMA insait long Wes Nu Briten i gat maus long makim ol gut insait long provinsal na nesene level.

Dispela i kamap bihain long provins i kirapim Wes Nu Briten Famas Asosiesen.

Gavana Bernard Vogae i tok gavman bilong em i bin tok orait long dispela asosiesen i kamap insait long wanpela bung bilong provinsal kabinet na siaman bilong Ikonmik Sevis Komiti Lucas Waka i prisenim wanpela pepa long dispela samting.

Mista Vogae taim em i tokaut long asosiesen i tok em i gutpela long

kirapim kain asosiesen bikos em bai helpim gut ol fama long provins na lukim olsem ol i makim maus bilong ol long provinsal na nesene level.

Em bin tok Wes Nu Briten em i wanpela top pilaia long sait bilong agrikalisa developmen na em i bikpela samting long ol fama i mas gat maus long makim ol long ol toktok insait nesene na provinsal level.

Mista Vogae i tok strong long asosiesen long wok bung gut wantaim gavman na em i ken gutpela sapot long ol samting we i sut long sait bilong ol fama na agrikalisa.

Ol Yunitek meri straik


OL MERI sumatin long Yunitek long Lae i bin karimaut wanpela protes mas i go long yunivesiti edministresen long dispela wik long soim kros bilong ol long ol pasin nogut we ol sumatin man long kempus i save wokim long ol.

Long 8 klok moning, foa handret (400) meri sumatin wantaim tu ol wokmeri long kempus i bin mas i go long studen edministresen opis na prisanim wanpela petisen i go long Ekting Vais Sansela Wilson Tovirika. Ol meri i no amamas na ol i belhat tru wantaim long birua bilong bagarapim meri we i bin kamap long wanpela sumatin meri long kempus las wiken. Ol ripot i tok sampela man sumatin yet bilong yunivesiti i bin dring spak na bagarapim dispela sumatin meri long rum bilong em.

Dispela samting na ol arapela we i save kamap olgeta taim long kempus olsem ol man sumatin i wokim ol rabis toktok long ol meri na i no save wokim gut long ol i mekim ol meri i bung wantaim na mas i go long yunivesiti edministresen.

"Inap em inap. Mipela i les pinis long ol pasin nogut we ol sumatin man i wokim long mipela," preisen long asosiesen bilong ol sumatin meri, Olivia Keviamie i bin tok taim em i givim petisen long Mista Tovirika. "Mipela ol meri sumatin i sori na kros long samting we i bin kamap long wiken. Bikos dispela samting i kamap, mipela i pilim olsem mipela i no seif long rum bilong mipela. Yunivesiti edministresen i mas wokim strongpela na gutpela lo long lukautim ol meri long kempus," petisen i bin tok.

Petisen i bin singaut tu long rausim ol lain husat i wokim dispela pasin nogut long meri sumatin ya. Mista Tovirika long bekim petisen bilong ol meri i bin tok ol bai putim moa sekyuriti lait long ol haus slip bilong ol meri. Tasol ol bai putim long han bilong ol plis dispela reip keis. Long wankain taim tu, edministresen i askim ol meri long kam fowod wantaim ol evidens long birua ya na ol ken givim long ol plis long painim na sasim man ya.



• Sampela ol desk we Melanisen Faundesen i prisanim long Moim Komyuniti Skul long Wara Sepik.

Moim Komyuniti skul kisim sia long Melanisen Faundesen

PAULUS TALI
i raitim

OL SKUL pikinini bilong Moim Komyuniti skul long Sepik Wara bai i gat gutpela hap bilong sindaun na skul wantaim helpim i kam long Melanisen Faundesen.

Las wik, skul i bin kisim 20 dabel desk bilong ol sumatin long sindaun na rait na helpim ol long wokim gut skul wok bilong ol.

Dispela i bihainim askim bilong siaman bilong skul.

Siaman bilong Melanisen Faundesen we i

papa bilong sip Melanisen Discoverer, Peter Barter i bin prisanim ol sia long skul.

Ol skul sumatin na ol papamama i bin amamas tru na selebretim prisentesen wantaim ol tumbuna singsing.

Faundesen i bin tilim 100 skul desk i

go long ol skul long Wara Sepik olsem Aibom na Kambaramba na Kranket Komyuniti skul long Madang provins.

Siaman Barter i bin tok faundesen bai i helpim ol skul wantaim moa desk na sapos ol i putim askim i go long ol.



• Ol Luteran mama long Madang i senis basket long pulim mani bilong stretim haus lotu.

Sumkar pipel laikim nupela CMB Bod

WENCESLAUS MAGUN
i raitim

60,000 PIPEL bilong Sumkar Distrik insait long Madang Provins i laikim Kopra Maketing Bod i mas senisim kwik ol bod na menesmen lain bilong CMB, Presiden bilong Sumkar Distrik Spot Kaunsel, Barry Kalib i tok.

Em i tok Kopra Maketing Bod na Menesmen i kamapim bikpela wari long

ol pipel bilong Sumkar long dispela taim, bikos long pasin menesmen i mekim long sampela taim i go pinis long i no lukautim interes bilong ol pipel bilong Sumkar husat i save planim kokonas.

Long dispela as Mista Kalib i tok: "Mipela i laik lukim ol i senisim kwik ol Bod na Menesmen. Mipela i laikim lukim ol i saspenim ol Bod na Menesmen na makim wanpela indipenden grup long mekim wanpela wok painim i go insait long CMB bilong

kamapim wanem narapela eksen."

Em i tok tu olsem, ol pipel bilong Sumkar i singaut strong i go long olgeta politisen bilong Madang long wok bung wantaim na sapatim planti ol pipel bilong Madang husat i gat dispela wari tasol i no inap autim.

Mista Kalib i ting tu olsem, ol politisen bilong Madang i no save wok bung wantaim na dispela em i wanpela hevi we i mekim ol pipel bilong Madang i wari tru.

BIG HI-WAY BEER

Paradise



Krais i dai na winim dai

WENCESLAUS MAGUN i raitim

PAPUA Niugini Jenerel Seketeri, Sophia W.R. Gegeyo i tok Gut Fraide na Ista, em ol bikipela de long laip bilong ol pipel bilong dispela graun. Long dispela taim taim God i lusim sin bilong ol pipel na i kisim ol bek olsem ol pikinini bilong em. God i no bagarapim ol pipel.

Misis Gegeyo i tok long nem bilong olgeta pipel bilong graun, ol pipel bilong Israil, husat God i kolim na makim ol olsem ol spesel pipel bilong Em, i bin stap insait long dis-

pela wok marimari bilong God. Em i tok olsem na long Ista De, yumi traim long lukim wanem samting dispela wok marimari bilong God i gat insait long laip bilong yumi wanwan. Kain olsem yumi wanwan i gat wok bilong daunim ol pasin nogut we i save kamapim birua na hevi.

Na bringim gutpela pasin insait long komyuniti yumi i stap long en bambai olgeta pipel i ken sindaun isi na stap amamas, olsem Jisas i promis long Jon 10:10

"Stilman i no save kam bilong narapela samting. Em i kam bilong stilim sipsip na bilong kilim ol i dai na bagarapim ol.

Tasol mi, mi kam bilong ol i ken kisim laip, na laip i ken pulap tru long ol."

Misis Gegeyo i tok, i tru olgeta Ista em ol bikipela de, dispela Ista em i bikipela tru bikos dispela Ista bai bringim yumi i go long yia 2000 o nupela milenium.

Na em i tok, ating em i taim yumi mas glasim laip bilong yumi wanwan na luksave long wanem samting yumi i bin mekim o i no mekim na lukluk i go long ol yia i kam wantaim tingting bilong mekim gutpela samting.

Misis Gegeyo i tok, yumi mas askim God long givim yumi

grasia na soim yumi rot long bihain laik bilong em we i gutpela long olgeta samting yumi laik mekim. Em olsem, maski yumi Politisen, Pablik Seven, Klina, man bilong ples i wok long gaden na yumi husat, yumi mas bihainim na mekim wanem samting God i laikim yumi mekim long wanem ples na taim yumi stap.

Wantaim dispela toktok, Misis Gegeyo i salim amamas bilong Ista na blesing i go long olgeta pipel bilong Papua Niugini. Em i askim yumi olgeta long stap olsem ol gutpela wok man na meri bilong Jisas Krais long olgeta toktok, tingting na pasin bilong yumi.

TU MINIT TINGTING



FRANK MIHALJ

Mak bilong olgeta kristen

BIPO bipo tru, long taim ol Roman i wok long pinisin tru ol Kristen, wanpela nupela jeneral bilong ami i kamap, nem bilong em Konstantain. Em i no Kristen yet, tasol em i laik helpim ol Kristen.

Wanpela de em i redi long go insait long wanpela bikipela pait bilong daunim ol birua bilong ol Kristen. Long dispela nait em i driman na i lukim wanpela bikipela waitpela klaut. Na insait long klaut em i lukim wanpela bikipela diwai kros i stap wantaim dispela hap tok: "Long dispela sain bai yu win."

Orait, long moningtaim em i givim oda long olgeta soldia bilong em bai ol i mas penim mak bilong diwai kros antap long ol plang bilong pait bilong ol. Mekim pinis, nau ol i goaut na i pait na ol i win tru.

Stat long dispela taim, planti Kristen i save yusim mak kruse bilong soim samting i holi na i bilong God o i mekim wok bilong God. Tude yumi save putim ol diwai kros long ol matmat na antap long tawa bilong haus lotu na insait long rum bilong haus. Yumi penim long sain i makim et pos o haus sik. Yumi lukim em long ambu-lens. "Red Cross" em i nem bilong wanpela bikipela lain dokta na nes i stap long olgeta Kristen kantri bilong graun na i save resis na flai hariap i go long olgeta Kristen kantri bilong graun na i save resis na flai hariap i go long olgeta kantri bilong graun we ol tarangu i dai long hangre na sik na ol i bagarap long wanpela birua o gurua o woa. Ol i save helpim ol tarangu i dai long hangre na sik na ol i bagarap long wanpela birua o gurua o woa. Ol i save helpim ol tarangu fri, na ol dokta na nes ya i no kisim pe. Bikos ol i man/meri bilong marimari, mak bilong diwai kros em i sain bilong ol....

Sapos yumi lukim man o meri i bilas wantaim liklik diwai kros, dispela i tok em i Kristen. Ol pris na Sista i save werim olsem bilas. Ol stailmeri yet i hangamapim liklik kruse bilas long nek bilong ol, o long yau yet. Taim yumi blesim wanpela samting, yumi sainim em wantaim mak kruse. Wantaim mak kruse yumi save blesim yumi yet. Tenpela kantri bilong graun i gat mak bilong diwai kros antap long plak bilong ol. PNG em i wanpela bilong ol.

Wanem samting i bin givim kruse o diwai kros wanpela spesel pawa? Dai bilong Jisas tasol. Long Gut Fraide, kruse o diwai kros em i wanpela samting bilong panisim na givim pen long ol man nogut. Tasol bihain Jisas i dai pinis long en, nau em i kisim namba na nau em i bilas na em i sain bilong win.

Wanem as tru bilong kamap Kristen?

OPOSISEN lida Bernard Narokobi i askim ol pipel bilong Papua Niugini long dispela Ista long skelim wanem as tru bilong kamap Kristen. Na laip bilong ol pipel bilong Papua Niugini bai kamap olsem wanem insait long 1000 yia bihain?

Em i tok, traim skelim: Ating bai ol provins bai bruk bruk? Ating ol Kristen Sios bai kam bung wantaim? Wanem samting bai kamap long ol pipel i gat arapela bilip wantaim ol pipel i bilip long Jisas Krais na God Triwan? Na olsem wanem long ol lain i nogat bilip long God, bai ol Kristen i sindaun na toktok wantaim ol tu o nogat?


Bai i gat sampela kain nupela Kristen bilong Melanesia o nogat?

Dispela em sampela ol bikipela askim Mista Narokobi i laikim ol pipel bilong PNG i mas kisim taim long glasim. Em i ting PNG bai i gat sampela gutpela Kristen husat bai holim strong pasin Melanesia na long wankain taim Kristen bilip.

Long wankain taim Mista Narokobi i bilip i gat planti ol amamas bilong dispela graun we inap paulim tingting bilong planti bilip manmeri na ol inap long lusim Kristen bilip na pasin.

Em i tok planti ol Kristen i yusim tok bilong God insait long Baibel long mekim planti samting. Planti i yusim Sios long kisim wok politik na ol bikipela samting bilong dispela graun. Planti taim ol dispela man o meri i save yusim ol arapela pipel long kisim biknem na gutpela sindaun.

Mista Narokobi i tok long taim yumi selebretim dispela Ista,



• **Nesanel Dairekta bilong Karitas Papua Niugini, Bruda Graham Frawley na olpela wokman bilong Katolik Komisen bilong Jastis Pis na Developmen, Peter Maime i putim mani bilong helpim ol turangu long Holi Wik. Dispela pasin bilong Katolik Sios i stap yet tude. Olsem na plis helpim ol turangu long dispela Ista.**

yumi tingim taim i kamap klostu pinis bilong yumi bungim yia 2000. Em i tok 2000 yia i go pinis Jisas Krais i dai na kirap bek. Wankain tasol Sios inap bruk bruk i go kamap kainkain sios wantaim kainkain pasin bilong lotu tasol wantaim wanpela bilip long Jisas Krais. Insait long dispela pasin ol sios inap kros pait

namel long ol yet bilong kisim biknem na pawa.

Em i tok long dispela Ista, ol pipel mas save olsem em i taim bilong sekan. Olsem pipel bilong dispela graun yumi mas save olsem i gat wanpela God, wanpela bilip, wanpela baptismo.

Mista Narokobi i tok planti lain i tok graun bai pinis long

yia 1999 na nupela graun bai kamap long yia 2000. Tasol em i tok Jisas yet i tok olsem em i no save long de na taim. Papa God tasol i save long dispela. Olsem na Mista Narokobi i tok, ol pipel bilong PNG i mas redim ol yet olgeta de long laip bilong ol na ol i noken pret.

MICHAEL KUARU i raitim

Katolik yut baibel semina kamap long Wirui Wewak.

Asstingting bilong dispela semina i stap long Jon 8.31-32 na i tok olsem: "Tok tru bai i mekim yupela i kamap fri. Olsem na Jisas i tokim ol Juda i bilip pinis long em, "Sapos yupela i holim tok bilong mi, orait bai yupela i disaipel tru bilong mi. Na yupela bai i save long tok tru. Na tok tru em bai i mekim yupela i kamap fri."

Long Mande Februari 22 i go inap long 26 i bin gat wanpela Katolik yut baibel semina i kamap long Wirui Paris. Paul wantaim ol Baibel ko-grup tim bilong Wirui Paris i go pas long dispela wan wik baibel semina.

Wewak yut bung long Baibel semina

Pater Hubert bilong Wirui Paris i openim bung hia wantaim tok tru bilong God i stap long Jerenis 1:1-2. na Jon 1:1 "Tok i gat laip em i kamap man. Bipo tru Tok i stap. Tok i stap wantaim God. Na Tok em yet i God. Bipo tru em i stap wantaim God."

Na bisop Marai i givim namba wan tok long Pawa na Strong bilong Krais-Jisas insait long 1 Korin 1-18 na 24. Astingting bilong olgeta dispela rit i tok: Strong bilong God i kamap man. Na God i save wok olsem wanem long laip bilong yumi tude.

I bin gat planti moa ol gutpela toktok i kam long ol bikman. Olsem Lod Mayer bilong Wewak,

Diken Andrew na sampela moa. Ol skul i bin kam gut tru long dispela wan wik semina.

Wanpela het tok insait long dispela semina em: "Ol Katolik yut insait long baibel na sosel trans fomesen."

Dispela het tok i laik helpim ol yut bai ol i kisim gutpela luksave na sindaun gut insait long famili, komyuniti, paris, provins na naispela ples o kantri bilong yumi PNG taim ol i pas gut long pasin bilong pre na ridim buk baibel na tu sapos i gat man o meri long gaidim ol insait long komyuniti na paris levul. Sapos dispela i kamap bai ples na bikiples bilong yumi bai kamap naispela kantri.

Ol Katolik yut i bin amamas tru long dispela wan wik semina. Ol yut i bin kam olsem long Nuigo setelmen, Misin Kompaun Kvia, Kria Kompaun, Chambri Kem na Kaindi na sampeia moa.

Ol yut i laik bai i gat ol kain semina olsem i kamap gen long neks taim na ol i laik bai i kamap long eria o komyuniti levul na kam long paris levul na go bikos i nogat gutpela luksave long ol yut long paris, provins na kantri. Long dispela as na ples bilong yumi i wok long go bagarap. Wanem taim bai yumi stretim?

"Ol yut na ol tarangu manmeri i nogat hop nem na namba. Olsem na sampela bilong mipela ol yut i

kisim trening long lukautim yumi yet long ol kain pasin wea biknem na gutnem man o meri i no laik long lukim o harim," wanpela yut memba i tok.

Ol yut bilong Wirui Paris i givim bikipela tok amamas i go long baibel ko-grup tim bilong Wirui Paris long dispela wan wik baibel semina.

Mi tu bin stap long dispela semina na harim wanpela yut i askim wanpela askim olsem: Kingdom bilong God i kam pinis o nogat? Mat 6: 10, "dispela yut i askim.

Na wanpela yut yet i givim naispela ansa tru olsem: "Kingdom bilong God i stap insait long yu na mi yet pastaim, na groim dispela kindom insait long famili, go long komyuniti, paris, provins na kantri olgeta.

Hailans Nius

Luta winim Kagua Erave bai ileksen

NUPELA memba bilong Kagua Erave ilektoret insait long Nesenel Palamen em Charles Miru Luta.

PNG Iektorel Komisin i bin tokaut long win bilong em long 11 kilok long las wik Sarere.

Tokaut long win bilong Mista Luta i kam bihain long planti komplem na tok kros i bin kamap long ples bilong kaunim vot long Mendi Kaunil Semba.

I bin gat 79 balot bokis we i holim vot bilong ol pipel. Tripela bokis i gat komplem na ol i no kaunim. Ol ileksen opisal i kaunim tasol 76 balot bokis we i gat ol vot.

Taim ol ileksen opisal i kaunim pinis 76 balot bokis i gat vot long en, Ritening Opisa Alphosne Yapen i bin tok orait long kaunim narapela tripela balot bokis we i gat komplem long en. Tasol sampela kendidet na ol sapota i komplem na tok kros olsem ol dispela bokis ol i no ken kaunim bikos i gat asua long en.

Planti toktok i bin bam i go i kam na i luk olsem trabel bai kirap long Fraide nait na ol ileksen opisals i pasim kaunim bilong ol vot.

Bihain long Mista Yapen i kisim tingting long ol bos bilong em long Mosbi, em i tokaut long neks de olsem Mista Luta i winim dispela bai ileksen.

Deputi Iektorel Komisina, Andrew Trawen i tok olsem wanem kam disisen Mista Yapen i mekim em i bilong em yet bikos em i bin gat pawa. Em i tok hetkwata i no save mekim wanpela disisen. Em i tok wanem samting hetkwata i save givim ol ritening opisa em ol edvais na sapot toktok, Mista Trawen i tok.

Ripot i kam long Mendi i tok olsem olpela memba David Basua, i no amamas long ol risals bilong ileksen na laik stretim dispela samting long Kot.

I gat tok tu i go olsem ol dispela tripela balot bokis i kam long ples we em (Basua) i gat bikpela sapot.

Ol 9-pela kendidet i bin resis long ileksen na risals bilong vot i go olsem bihain long ol i kaunim 76 bokis.

Philip Kende	1153
Daniel Bali Tulapi	6830
Charles Miru Luta	6973
Kenda Nakisi	5080
Yako Mano	1709
Komeali Kapo Ropa	2972
Ray Rendepo Yandi	7
David Basua	6362
Daniel Mugu	13

Narokobi toktok long ol sumatin

OPOSISEN Lida, Bernard Narokobi i raun nau long kantri long toktok long ol gutpela lidasip na gavman.

Las wik em i bin go long Madang Provins na toktok long ol sumatin long Divine Word Universiti na ol koles. Em tu i bin toktok long wanpela pablik rali long Madang maket.

Long dispela wik Mande, em i bin go long Goroka Universiti na toktok long ol sumatin na tisa long hap. Bihain em i bin go long Aiyura Nesenel Hai Skul.

Em i tokim ol sumatin long ol ples em i go long en olsem PNG bai kisim bagarap sapos ol lida bilong kantri i no senisim pasin bilong ol. Em i tok ol lida i go insait long planti paul pasin na i no tingting long ronim gut kantri.

Mista Narokobi i tok moa olsem planti lida husat i gat rekot bilong mekim krangi pasin i stap na holim yet pawa bilong Stet. Em i tok dispela em i no stret.

Em i tok, ol lida nau i tingting long wanem samting ol yet bai kisim na i no long helpim kantri na ol pipel long painim gutpela sindaun.

Isten Hailans wetim kot disisen

PETER MAIME i raitim

OL PIPEL bilong Isten Hailans bai save long tude sapos bai ol i go long bai ileksen o olpela rijional memba, Peti Lafanama i kisim sia bilong em bek.

Suprim Kot bai mekim disisen long dispela samting tude long morning taim.

Dispela kot i stap namel long Mista Lafanama na memba bilong Isten Hailans bipo, Aita Ivarato. Mista Ivarato i bin kisim Mista Lafanama i go kot long sampela toktok em (Lafanama) i bin mekim long

sait bilong gavman, Wol Beng na graun long 1997 ileksen kempen.

Mista Lafanama i bin win long Nesenel Kot tasol, Mista Ivarato i bin apil long Suprim Kot na kot ya i bin rausim Mista Lafanama olsem memba bilong Palamen na Gavana bilong Isten Hailans.

Mista Lafanama gen i no wanbel long disisen bilong Suprim Kot na putim gen wanpela aplikesen na tokim kot long go bek na glasim disisen bilong em gen.

Dispela kot disisen inap kamap long Fonde las wik

tasol, ol tripela jas husat i bin harim dispela kot i no bin stap wantaim long Mosbi.

Sief Jastis, Sir Arnold Amet tasol i bin stap. Jas Bernard Sakora i bes long Lae na Mark Sevua i bin gat narapela wok na i bin go aut long Mosbi.

Ol pipel bilong Isten Hailans husat i bin kamap long las wik long dispela kot disisen i belhat taim kot i surikim de i kamap long tude.


Taim Kot Rijistra, Lawrence Newell i bin kam aut long kot haus long tok save long ol pipel bilong wanem na kot i no inap kamap long las wik, plan-

ti lain i kirap na tokim Mista Newell long pasim maus.

Planti ol sapota bilong Mista Lafanama na Ivarato i bin kisim balus na i go long Mosbi long dispela taim. Sampela ol memba bilong Provinsal Gavman tu i bin stap.

Ol pipel i no bin amamas long kot i surikim taim na askim kot long bekim bek mani bilong balus tiket.

Tasol, Mista Newell i tok kot i no inap long kamap las wik bikos olgeta tripela jas i no bin stap wantaim long kamapim wanpela disisen.



• Long taim bilong ileksen, em de bilong makim ol gutpela lida i go long Nesenel Palamen. Tasol dispela samting i no kamap long Simbu nau. Ripot i kam long Simbu i tok olsem planti raskol pasin i bagarapim ron bilong ileksen.

Simbu abrusim ileksen lo

OL ILEKSEN long Simbu i no gut tumas na dispela em mekim ilektorel Komisin i wari tru. Planti ples ol ileksen tim i go pinis long en, ol pipel i pretim ol na sampela em ol sapota i ronim ol ileksen opisal na makim ol balot pepa ol yet.

Ritening Opisa, Abraham Wari i tok, "ileksen long Simbu i no luk gutpela tumas."

Long las wik Fonde, ol pipel long Kundiawa Iektoret i bin vot. Tupela ples bilong vot, Singar Mogoma na Kondo, i gat ripot olsem sampela sapota i kisim ol balot pepa na ol yet i bin makim na bihain askim ol prisaiding opisa o man i go pas long ileksen long putim siknisa bilong ol. Foapela bokis i gat dispela kain vot nau i stap long Kundiawa Plis Stesin. Iektorel Komisin bai wokim disisen long dispela ol balot bokis bihain.

Long Sarere las wik, taim vot i stat long Kerowagi Iektoret, sampela lain long wanpela ples bilong vot i stilim ol balot pepa na ron i go long bus. Iektorel Komisin opis i no save amas pepa ol pipel i karim i go. Long narapela hap, ripot i tok olsem wanpela prisaiding opisa em i bin stap aninit long gan poin long sainim ol balot pepa ol pipel yet i makim.

Planti hap long ples we ol ileksen tim i go long en, ripot i tok olsem ol raskol pasin i bin stap insait long ron bilong ileksen.

Mista Wari i no amamas long ol dispela kain pasin na hop ol ileksen long arapela hap bai ron gut. Em i tok planti ol ileksen opisals i wok aninit long bikpela pret. Long narapela stori, Gavana Jenerel, Sila Atopare long las wik i bin surikim taim bilong ileksen long wanpela wik moa. Em i surikim taim bilong ileksen bikos ileksen i ron wan wik leit na Iektorel Komisin i bin askim em long surikim de.

Dispela wik Mande, ol pipel long Sinasina Yongomugl i bin vot. Aste, ol pipel bilong Chuave Iektoret i bin vot. Fraide bai ol lain long Karamui Nomane na Gumine Iektoret i vot. Taim bilong kaunim vot em long Sarere, na dispela bai kamap long Dickson pilai graun long Kundiawa.

Maski paulim mani, Pundari i tok

SPIKA bilong Nesenel Palamen, John Pundari i singaut i go long ol supa fan olsem Pablik Supanuesen Fan na Nesenel Providen Fan long lukautim gut mani bilong ol liklik manmeri.

Mista Pundari i mekim dispela singaut bihain long planti lain long ilektoret bilong em long Kompam Ambum long Enga i autim wari long mani bilong ol.

Planti pipel i bin putim mani bilong ol long ol supa fan 10-pela yia o moa na i pret nogut ol i no kisim mani bilong ol.

Mista Pundari i tok, Pablik Supanuesen Fan na Nesenel Providen Fan i wok long

putim planti milien kina i go long ol kain kain invesmen taim planti tausen manmeri i wetim ol mun na yia long kisim mani bilong ol.

Em i askim, gutpela tingting na stretpela pasin i stap we?

Em i tok, long putim moa mani long invesmen, sampela taim, ol dispela invesmen bai i no inap karim kaikai. Na em i askim ol bos long ol supa fan long lukuk gut long ol kain samting olsem.


Ol bos bilong ol supa fan mas oltaim save olsem mani ol i gat long mekim wok em bilong ol liklik manmeri. Ol mani ol i gat i

kam long ol lain olsem ti boi, sekyuriti gad, draiva, klak, na ol kuskus long ol opis, Mista Pundari i tok.


Planti bilong ol dispela kain manmeri i no save kisim bikpela pe long potnait tasol lo i tok na ol i save givim hap mani i go long Pablik Supanuesen Fan o Nesenel Providen Fan.

"Dispela ol pipel i mas save olsem mani bilong ol i stap taim ol i ritai na ol i ken amamas long seving bilong ol. Ol i no ken wari olgeta nait olsem ol bos husat i lukautim mani na gavman i mekim nabaut long mani bilong ol"

Madang Nius



Ramu projek bai bagarapim haus bilong wail laip



• Ramu Nikel Projek Menesa bilong Hailens Pasifik Limited long Madang, Mick Wilkes, i soim ol ripota, graun ol dosa i digim long Kurumbukari we ol bai salim long paip i go daun long Basamuk fektori na wokim Nikel na Kobalt.

WENCESLAUS MAGUN i raitim

TINGTING bilong Ramu Nikel na Kobalt projek i bringim moa mani i kam insait long Papua Niugini, Madang Provins, na kamapim moa wok, developim ol infrastraksa sevis, na helpim ol asples pipel bilong Madang long mekim bisnis na kamapim gutpela sindaun em wanpela sait bilong stori.

Wanem samting ol lain i tingting long go pas long kamapim dispela projek i traim long lus tingting em olsem taim dispela projek i stat, kampani bai bagara-

pim 1000 kubik mita bilong vigin tropikel renfores. Dispela wail bus long Kurumbukari i stap inap long 50 milion yia olgeta na i kamapim wanpela bakstua haus bilong ol waillaip. Sampela bilong ol waillaip long dispela eria olsem ol wail abus na flawa em yu no inap painim long narapela kantri long wol.

Wantok i painim aut olsem eria long hap bilong Kurumbukari em i stap klostu long eria ol saveman bilong bus, graun, waillaip, wail abus i bin mekim sampela wok painim bilong lukautim ol kain samting. Insait long wok painim bilong ol dispela saveman,

ol i painim olsem i gat 352 kainkain pisin i stap long dispela eria. Long dispela ol pisin, 36 em klostu bai pinis olgeta, na ol dispela pisim em: Muruk, Tarangau, na tripela kain kumul.

Dispela wok painim i soim tu olsem yu inap painim 94 kainkain wail abus bilong wara na graun insait long dispela eria na long dispela i gat 9-pela bilong ol em klostu bai pinis olgeta. Wanpela bilong ol dispela wail abus we inap pinis olgeta em Bilak Kapul, dispela kapul ripot i tok, em i wanpela namba tu bikipela kapul long wol we ol i bilip i wok long pinis olgeta.

Ol meri i mas bilip ol i ken bringim developmen

JAMES KALTOBIE i raitim

OL meri i mas bilip ol i ken bringim developmen na senisim ples. Memba bilong Bogia Open, Bernard Mollok i tok olsem long 3000 pipel. Planti bilong ol em ol meri husat i bung long Bogia, bilong selebretim 20 yia aniveseri bilong Nesenel De bilong ol meri long las wik Trinde. Ol meri i kam long tripela Lokol Level Gavman eria bilong Bogia olsem Yawar, Almami na labu.

Mista Mollok i tok em i amamas long lukim ol meri i soim bikipela laik long kamapim developmen bilong ol yet na bilong Bogia. Em i tok ol kain selebresen olsem Nesenel De bilong ol Meri i opim ol bilong ol pipel long lukim olsem ol meri tu i save wokbung wantaim ol man long developim ol ples na kantri.

Em i tok tasol i gat tupela samting we i save daunim ol meri. Wanpela em planti bilong ol i no go long skul na i nogat inap save na laip ekspiriens bilong kamapim ol grup na wok bung wantaim. Narapela samting i save bagarapim ol meri em pasin bilong jeles na tok baksait.

Mista Mollok i tok ol meri mas lusim dispela tupela pasin sapos ol i laik mekim sampela bikipela senis. Em i tok tu olsem dispela em i namba wan taim ol i holim kain bung olsem bilong ol meri. Olsem em i laik lukim olsem Mas 24 i mas kamap de bilong ol meri Bogia long olgeta yia bilong selebretim Nesenel De bilong ol meri. Mista Mollok i givim K6,300 i go long komiti bilong ol meri i go pas long redim dispela selebresen na i tok em bai go het long givim kain helpim long ol meri.

PNG i gat planti risos tasol em i sot yet

EMMA BODEN na HENRICA HUFANTOUI i raitim

PAPUA Niugini i gat planti ol mineral olsem ges, wel, kopa, gol, nikel, kobalt, bus, graun, wail abus, pis, na planti ol kain samting tasol kantri i nogat mani bikos i nogat gutpela man bilong lukautim gut ol dispela

samting na mekim gut mani. Oposisen Lida Bernard Narokobi i tokim ol sumatin bilong Divain Wod Yunivesiti long Fraide las wik.

Em i tok PNG mas stat toktok long ol paul pasin, les pasin, i no mekim gut wok yu sapos long mekim, mekim pasin nogut taim yu gat pablik opis na kain ol pasin olsem.

Mista Narokobi i tok pasin bilong i gat gutpela pasin em i

bagarap bikos ol pipel i laik resis long mekim moa mani na kisim biknem. Em i tok em i wet yet long lukim wanpela memba long palamen i risain bikos em i no laikim pasin Praim Minista o het bilong Dipatmen bilong em i mekim.

Em i laik save watpo Jim Kas i stap long kalabus long 5-pela yia tasol em i holim opis yet olsem Gavena bilong Madang. Na tu olsem wanem Peter Arul

i holim wok olsem Minista bilong Fores taim kot i painim aut olsem em i brukim lo aninit long long bilong ol samting bilong paip.

Mista Narokobi i tok PNG i laikim tru ol lida i gat gutpela tingting na save bilong lukautim kantri. Em i tok PNG em i wanpela ris kantri. Tasol sapos yumi no lukautim gut, yumi bai kisim bikipela taim stret na kamap wanpela pua kantri long wol.



• MADANG taun i bin kisim hat taim liklik long wik i go pinis taim wanpela bikipela paip bilong wara saplai i bin bruk na planti wara i bin kapsait i go aut na lus nating. Tasol dispela i no stapim ol wokman bilong Wota Bod long kamap na fiksik dispela hevi na wara i ron go aut gen sampela aua bihain gen. Foto: Sape Metta

HIV sik i go bikipela long Madang

BEN TAUMAI i raitim

OL bos bilong Madang Jenerel Haus Sik i gat bikipela wari tru olsem namba bilong ol pipel i gat sik HIV i go bikipela insait long tripela yia.

Eking Siv Eksekutyutiv Opisa bilong Madang Jenerel Haus Sik John Levi i tokim Wantok olsem namba inap go bikipela tupela taim tasol ol i no inap tokaut long dispela bikos ol lain i kisim dispela kain sik i no inap go long haus sik long kisim marasin.

Em i tok insait long tripela yia, stat long 1997 i gat ripot i tok igat 14 pipel i gat HIV sik. Planti bilong

ol lain i gat HIV em ol bilong arapela provins. Tasol i gat wanpela bilong ol dispela lain em i bilong Madang olsem ol dokta i painim long stat bilong dispela yia.

Mista Levi i tok long dispela yia ol i mekim 620 tes na ol i painim olsem i gat wanpela man o meri tasol i gat HIV sik. Em i no inap long tokaut amaspela bilong ol dispela lain em ol man o meri an namel long wanem krismas. Tasol em i tok, "dispela em i no gutpela nius". Em i tok tripela pipel i dai long sik AIDS las yia.

Madang Jenerel Haus Sik nau i gat ol masin na marasin samting bilong mekim wok painim bilong

sik HIV. Ol i save kisim blut bilong ol pipel, ol sikmanmeri, ol mama i gat bel na husat ol lain i gat laik long kam na ol i sekim ol. Sapos ol i no klia tumas ol wok painim bilong ol, ol i save salim i go long Mosbi bilong het opis i sekim na tokim ol.

Dispela namba bilong ol lain i gat sik HIV i no go bikipela tasol ol wokmanmeri bilong haus sik i pret, dispela namba inap go bikipela. Bikos ol i pret dispela sik bilong kilim manmeri, pikinini o lapun inap go bikipela, ol i mekim wanpela plen bilong karim aut helt edukesen awenes long olgeta skul na long ol ples.

Haus Sik Bod i givim tok orait pinis bilong ol i ken go het na baim wanpela 10 sita Toyota Lenkruse ka na wanpela Hilux bilong yusim long karim aut awenes kempen. Haus Sik yet bai sapatim dispela progrem.


Ol dokta i luksave long dispela hevi na i glasim gut ol sikmanmeri na pikinini. Ol i save olsem ol lain i gat TB i ken kisim kwik HIV bikos binatang nogut bilong HIV na TB i save kilim ol sel bilong blut isi na mekim ol sikmanmeri na pikinini i nogat strong olgeta.

Long wankain taim, Siaman bilong Madang Jenerel Haus Sik Bod, Florian Bahin i tok ol bod


memba bilong em bai mekim olgeta samting long givim namba wan sevis long ol wokmanmeri bilong haus sik bai ol i ken givim gutpela sevis long ol pipel bilong Madang.

Mista Bahin i tok bod i kamapim tu wanpela prais bilong ol wokmanmeri bilong haus sik long wanwan seksen. Husat ol wokmanmeri i mekim gut wok bilong ol bai winim dispela prais wantaim setifiket long pinis bilong yia. Em i bilip dispela prais bai kirap laik bilong ol wokmanmeri long mekim gutpela wok.

Em i tok tu olsem ol bod memba bilong em bai i no inap pilai politik o larim pasin politik i go insait long bagarapim gutpela wok bilong haus sik.



Lae Nius



Ol Saina amamas long hanmak bilong ol

EDUKESAN em i ki bilong ikonomi, sosel na politikol sevis long kantri. Na dispela tu bai helpim Paua Niugini i redi long i go het wantaim ol wok bilong em insait long narapela yia i go het.

Dispela em hap toktok we olgeta bikman i bin mekim taim ol i bin mekim dispela de bilong opim. Nesenel hai skul long Makam Veli long Morobe provins las wik.

Dispela skul em gavman bilong Saina na Papua Niugini i bungim han na wokim long mak bilong mani K23.7 milien.

Dispela skul em wanpela kampani bilong Saina, Nesenel Ovasis Enjinaring Kopresen (COVEC) yet i wok long kamapim. Dispela graun bilong skul bai kisim 18 ekta we pastaim Morobe Provinsal Gavman i save yusim long wok didiman.

"Ol rabisman i save long pasin bilong ol rabis man na save helpim ol yet we ol maniman na bikman i no save." Embesedo o Mausman bilong gavman bilong Saina, Mista Zhang Pengziangi tok.

"Olsem na long dispela tasol mipela i kamapim dispela wok developmen. Mipela i kirapim ol narapela wok olsem planim rais long ol ples olsem Kandep (Wabag) Bereina-Malalaua haiwe na Mumeng-Bulolo rot," em i tok.

Em i tok dispela skul bai pinis long Julai 2000 na namba wan gret 11 bai gat 250 sumatin na bai stat skul long Februari 2001.

Ol Saina bai wokim dispela skul long 3-pela level. Level wan em kamap pinis. Em long wanpela rum kaikai, haus kuk, liklik stua, woksap na ol klasrum,

opis, laibri, toilet na ol arapela skul samting.

Levol tu em 55-pela haus bilong tisa. Level tri em bai 6-pela 80 rum domiteri wantaim toilet na ples waswas.

Papua Niugini gavman bai bihain givim K1.5 milien long ol narapela wok olsem air kondisen, pawa, sten bai pawa na 4-pela haus bilong ol wokmanmeri. Ol tu bai painim sampela moa mani long sampela hap long baim sia, tebol na bet.

Ol bikman husat i bin soim pes long dispela de em ol nesenel memba bilong Morobe yet wantaim ol provinsal na lokol level gavman, ol biklain bilong gavman bilong Saina, sekretari bilong edukesen Peter Baki, Minista bilong Agrikalsa Tukape Masani na ol narapela nesenel gavman memba.

Morobe laik daunm hevi bilong spak

BUSTIN ANZU i raitim

OLFamilii husat i lainim ol pikinini bilong ol long dring bia na ol strongpela dring bai i gat kot. Morobe Tutumang (provinsal asembli) i pasim tok long daunim hevi i save kamap wantaim dispela pasin bilong dring na spak.

Tutumang i pasim toktok tu long skulim ol sumatin long ol praimer na hai skuls insait long provins na tu stapim bia na strongpela dring insait long ol setelmen na blok long wanpela yia.

Tutumang i kamap wantaim dispela ol risolusen bihain long ol grup bilong ol meri i mekim wanpela strongpela singaut taim ol i lukim olsem lo na oda insait long setelmen na blok i go bikpela we ol i no inap long stapim.

Rot bilong stretim ol dispela risolusen bai ol i tokaut bihain.

Tutumang i tokaut olsem ol papamama i no save long nogut bilong ol dring taim ol i larim ol pikinini i opim, baim o painim ol dring bilong ol.

"Ol papamama em ol namba wan tisa bilong ol. Mipela i mas stapim ol pikinini na noken lainim ol long holim ol bia na strongpela dring. Mipela i lainim ol long dring taim mipela i tokim ol long go na baim o larim ol opim bia.

Ol dispela kain papamama mas i go long kot na kalabus." Memba bilong Nawae Kennedy Wenge i tok.

Dispela risolusen bai kamap lo taim Provinsal Lika Laisensing ekt i stretim gen na putim dispela lo i go insait long ekt.

Gavana Luther Wenge i tok dispela nupela ekt i mas redi taim Tutumang i holim narapela miting.

Tasol Tutumang i tok olsem long stapim na rausim bia bai i no inap helpim lo na oda hevi.

Skulim ol pikinini na kamapim awenes kempen long nogut bilong dring bia bai inap helpim.

Edukesen na awenes kempen i wanpela ki we mipela i mas lukluk na toktok taim toktok long dring we bai bagarapim ol komyuniti. Ol yangpela pipel bilong yumi mas save long gutpela na nogut bilong dring bia." Makam memba Andrew Baing i tok.

Long stapim dring bia insait long setelmen na blok long stapim ol biket pasin insait long setelmen na blok i no bilong longpela taim. Tutumang i tok long strongim dispela tingting, ol i mas wokim ol Plis Stesen long olgeta setelmen na blok.

"Provinsal Lika Laisensing Ekt i mas givim moa pawa long plis long holimpasim ol biket man na kotim ol. Nau yet ol i no inap long mekim wok bilong ol long wanem lo i no strong tumas." Bulolo memba Samson Napo i tok.

Gavana Wenge i bin putim dispela petisen pepa i go long Tutumang long las wik Tunde.

Dispela petisen em we ol mama na ol sios grup na ol kida long setelmen i kamapim taim ol i lukim olsem kain pasin bilong repim meri, paitim ol mama na pikinini i kamap bikpela taim ol yangpela i save dring.

Eff Mare, makim maus bilong ol meri long Tutumang i tok olsem ol laisens ol isave givim i go long ol klab na taven long setelmen i mas stop.

"Ol klab insait long ol setelmen i save kamapim planti lo na oda hevi. Ol mama na pikinini i no inap raun long laik bilong ol insait long ol eria bilong ol yet," Meri ya i tok.

Morobe Provinsal Gavman i save kisim olsem K2 milien olsem takis long wanpela yia long salim bilong bia.

Olgeta memba bilong Tutumang i wanbel olsem dispela hevi i kamap bikpela olsem na ol i mas painim rot bilong stretim.

Paia sevis i no gutpela: Lod Meya i tok

PAIA sevis long Lae i no inap long wokim wok bilong ol moa. Ol i sot long mani na ol i no inap mekim wanpela samting na lukluk tasol taim haus i paia. Lae Siti Atoriti i save long dispela samting na bin mekim bikpela singaut long Provinsal na Nesenel gavman memba long lukluk long dispela hevi.

Lod Meya Toffamo Mionzing i singaut long Tutumang askim taim. Wanpela paia sevis nau i nogat strong long wok.

"Sapos nau paia i kirap long Tutumang, ol paiaman bai i no inap mekim wanpela samting. Dispela paia sevis i no inap mekim wanpela samting long wanem ol i nogat mani long ronim. Olgeta masin bilong ol i olupela na i no inap long wok," Mista Mionzing i tok. Mista Mionzing i tok Lae em wanpla industriel ples na ol i mas gat gutpela paia sevis long lukautim ol haus na bisnis.

"Gavana i mas kisim dispela tingting i go antap long nesenel gavman. Mi save dispela em wanpela bilong ol dispela askim we i bin kamap long bung bilong ol gavman bilong Momase," Lod Meya i tok.

Lae paia sevis em wanpela olupela paia stesen na planti samting i bagarap. Tu ol haus bilong ol wokman i luk olsem ol i mas stretim hariap.

Momase paia bos suprintenden Matthew Yamanson i tok Lae i bikpela hap na mas gat 3-pela stesen wantaim wanpela enjin. Em i tok samting olsem 4-pela paia em ol i save ripotim long wanwan mun.



• Wanpela rais projek ol saveman bilong Rce Industri i testim long klin wara long Makam Veli, Morobe provins.

BIHAIN long wet inap 6-pela yia olgeta, Makam Veli Nesenel Hai Skul i bin amamasim open de seremoni bilong em las wik Trinde.

Dispela bin makim stat bilong K20 milien wok projek we gavman bilong Saina i bin givim long wokim dispela skul.

Nesenel Edukesen Minista Muki Taranupi na Embesada o man makim maus bilong gavman bilong Saina Zhang Pengxiang i bin go pas long dispela seremoni we i bin kamap long ples Warwin, samting olsem 50 kilomita ausait long Lae siti.

Mista Taranupi i tok gavman bilong Saina i bin helpim long kamapim dispela skul we klostu ol i laik rausim. Em i tok laki na ol i sainim pepa long mekim dispela wok hariap.

Makam Veli gat nupela nesenel hai skul

"Mipela i sainim lon agrimen pepa wantaim gavman bilong Saina hariap olsem na dispela i mekim rot isi. Dispela i makim wanpela nupela sain bilong developim nupela nesenel hai skul long kantri. Na tu pasim wok olsem Warwin em wanpela las ples long kisim nesenel hai skul we i luk olsem bai i nogat moa nesenel hai skul," Mista Taranupi i tok.

Em i tok olsem tingting long statim dispela skul i bin stat long 1980s.

"Namba bilong ol sumatin i pinisim gret 12 long Sogeri, Pasam, Aiyura na Kerevat i no inap long pulmapim ol bikpela skul na kolis," Mista Taranupi i tok.

"Save bilong planti ol sumatin husat pinisim ol kain skul olsem i no inap wantaim save bilong wok wantaim ol nupela teknologi. Long 1990 dipatmen bilong edukesen i bin kamapim wanpela program bilong 1991 inap 2000 we i bin tingting long kamapim 5-pela nupela nesenel hai skul.

Ol ples ol i bin makim em Morobe, NCD, Oro, Westen Hailans na Niu Ailan. Dispela tingting em nesenel gavman i tok orait long Desemba 1990," Mista Taranupi i tok.

Gavman kibung i tok orait long senisim dispela olupela didiman stesen bilong provinsal gavman i go long edukesen dipatmen,

Na tu wanpela isipela dinau mani long \$US10 milien (K23.7 milien long eksens ret bilong las wik) we gavman bilong Saina i kisim long kamapim dispela skul.

Dispela em gavman i tok orait long Epril 1991. Dispela em hatwok bilong olupela Edukesen Minista na primia bilong Morobe Utula Samana.

Tasol ol narapela senis insait long Edukesen i bin strongim dispela tingting long 1991. Wanpela bikpela tingting em long kirapim ol elementeri skuls, skruim ol praimer skuls long kisim gret 7 na 8 na tok orait long sampela ol hai skuls bilong gret 11 na 12 insait long kantri.

Bihain ol i bin strongim toktok olsem ol sekenderi skul i mas skruim i go het yet na i no long painim ol samting bilong wokim ol nupela nesenel skuls.

Long Oktoba 1998, edukesen dipatmen i bin givim K20,000 long Lae Woks Dipatmen long stretim dispela hap ples nesenel hai skul bai kamap long en. Dispela wok em long stretim han rot i go insait long skul, joinim pawa lain na telepon na tu sekim ol wara sapiai, paip. Wanpela nesenel ovasis kampani bilong Saina i stat mekim dispela wok long Desemba 1998.

Dispela skul em namel long neks yia bai ol i pinisim na long 2001, ol namba wan sumatin bai i go wokim gret 11.

SAUTEN RIJON NIUS

Nogat helt sevis long Emeti viles

WESTEN PROVINS RIPOT

LAIP na helt bilong ol pipel insait long wanpela longwe ples insait long Westen provins i stap long hevi bihain long wanpela bikpela bagarap long helt senta bilong ol i bin kamap tupela krismas i go pinis.

Klostu olsem 8,000 pipel bilong Emeti eria insait long Balimo distrik i nogat gutpela helt senta long 15 mun olgeta taim dispela bagarap i bin kamap long Desember 1997.

Bikpela strongpela win i bin bagarapim planti samting bilong haus sik olsem ol samting bilong yusim long wok, ol marasin na ol sut. Planti ol dispela marasin i bin lus taim dispela bikpela win i bagarapim ples na i mekim wok bilong helt senta i go hat olgeta long sevim ol manmeri wantaim sik bilong ol.

Ripot i tok ol lain long lokol level gavman na provinsal gavman i no bin mekim wanpela samting long stretim dispela hevi bikos toksave i no bin kisim ol hariap.

Ripot i tok sampela manmeri i lusim laip bilong ol pinis long dispela hevi bikos i nogat gutpela marasin na helt sevis long stretim ol sik na bagarap long ol pipel long hap.

Ol gavman atoriti i no mekim wanpela samting yet long dispela hevi na ol pipel i wok long stap wantaim hevi yet.

Ol pipel i pret nogut wanpela bikpela sik i kamap na bai olgeta manmeri i kisim bikpela taim nogut olsem na ol i wetim gavman atoriti long hariap go insait na traime long stretim dispela hevi ol i stap long en.

Ol yut wokim klasrum bilong ol liklik sumatin

KENNEDY EDENE i raitim

SENTRAL PROVINS RIPOT

OL yangpela i nogat wok insait long Laloki, 14 Mail na Sogeri eria long Sentrel provins i bin soim gutpela pasin long bungim han na wokim wanpela dabol klasrum bilong lobuna Kouba Elementri Skul long dispela yia.

Pastaim ol sumatin mak olsem 90 olgeta i bin nogat klasrum na ol i save sindaun long as bilong diwai long olgeta de na skul.

Tasol 12-pela yut husat i wok long kisim trening wantaim wanpela grup bilong Yuropien Yunion long wok bilong skulim ol yangpela i bin kamap wantaim dispela helpim long sevim ol dispela lain studen.

Dispela trening bilong ol yangpela em ol i kolim Hai Skul mentenens program we Yuropien Yunion na Edukesen dipatmen i wok wantaim long kamapim. Dispela kain program i bin namba wan taim long kamap long 1992.

Dispela program i bilong bungim ol yangpela husat i nogat wok na i stap nating long kisim ol na mekim sampela kain trening wok bilong wok kapenta, welding, mekenik, brikleya, brik meking na ol wok wantaim pawa.

Long dispela yia, lobuna Kouba komyuniti skul i bin kisim top ap na mekim ol turangu elementri sumatin i nogat klasrum long kisim skul long en. Olsem na ol i save sindaun tasol aninit long as bilong diwai na skul olgeta de.

Mausman bilong Yuropien Yunion Paul Constable i tok dispela yangpela manki i bin yusim wanpela kain save ol i gat long wokim kamap dispela dabol klasrum bilong elementri studens.

Planti samting bilong wokim dispela klasrum em ol papamama bilong ol elementri studen yet i bin bungim han na baim. Sampela samting em ol lain bilong dispela Yuropien Yunion grup i baim na givim ol olsem semen, hap timba na arapela samting moa.

Yuropien Yunion lain i tok dispela em hap trening wok bilong ol yut bilong ol long mekim samting olsem long kisim trening na eksperiens long mekim wok.

Skul hetmasta Casper Ruga i tok amamas long Yuropien Yunion projek kodineta Harold William na ol yut long wok bilong ol.

Em i tok tenkyu tu i go long ol papamama long bungim han wantaim na baim ol samting bilong wokim klasrum wantaim. lobuna Kliba skul i gat mak olsem 417 studen na 15 skul tisa olgeta.

Ol Kerema i no amamas long haiwe projek

YAKAM KELO i raitim

GALP PROVINS RIPOT

OL lida bilong Galp provins i tok lukaut long stapim bikpela rot projek bilong Sauten Hailans Galp haiwe we inap joihim Galp provins wantaim Sauten Hailans.

Man i go pas long ol papagraun em siaman bilong Kikori Oil Investment Limited Abraham Murepe i tok ol olsem papagraun we dispela rot projek bai ron long en i no bin save long wanpela samting.

Mista Murepe i bin stap insait long sampela toktok bilong dispela projek tasol em ino wanbel bikos planti hevi na toktok bilong makim laik na interes bilong ol pipel bilong Galp provins i no stap insait long ol toktok ya.

Mista Murepe i tok disisen bilong Nesenel Eksekutyutiv Gavman (NEC) long rausim Gavana bilong Galp Riddler Kimave na Sauten Hailans Gavana Anderson Agiru olsem dairekta long bod bilong dispela rot projek i no gutpela tru. Dispela i soim olsem ol pipel bilong tupela provins bai i nogat mausman long makim interes na hevi bilong ol insait long dispela rot projek.

Em i tok tude ol i laik mekim klia long Nesenel Gavman olsem bai dispela Trens Nesenel Haiwe developmen bai i no inap ron insait long ol eria olsem Kikori, Baimuru na Ihu.

Em i tok tu olsem ol bikpela sip i laik karim kago na saplai bilong wokim dispela rot bai ino inap kamap sua long nambis (bris) bilong Kerema.

Ol pipel bilong Galp provins

i redim ol yet pinis long ol liklik wok bisnis na i redi long mekim ol kain wok projek na kontrak insait long dispela rot. Olsem na Gavman i mas harim tok bilong ol tu na stretim laikim na wari bilong ol, Mista Murepe i tok.

Siaman Murepe i tok ol pipel bilong Galp i laikim bai i mas gat pasin bilong toktok wantaim na wanbel wantaim ol papagraun na Gavman i kamap. Tasol nau i nogat dispela pasin na i luk olsem Gavman i mekim wan wei pasin tasol na abrusim ol papagraun. Olsem na em i tok ol pipel bilong ples i no inap larim dispela kain pasin i kamap na ol bai stapim dispela pasin long i no ken kamap.

Long sapotim wankain nek bilong siaman bilong Kikori Oil Investment Abraham Murepe,

presiden bilong West Kikori Lokol Level Gavman Jack Kaiwari na Soba Samai, wanpela klen lida i mekim wankain toktok tu long soim bel hevi bilong ol dispela pasin Nesenel Gavman i mekim wantaim dispela bikpela rot projek.

Gavana Riddler Kimave i tok em i wanbel long dispela rot i ken kamap bikos dispela em namba wan taim bilong bungim ol pipel bilong Papua wantaim Niugini long dispela rot projek. Na tu dispela rot bai bringim planti bikpela developmen na helpim long Papua Niugini olgeta. Tasol em i laikim Gavman i mas mekim ol samting stret na toktok wantaim ol long provinsal gavman level na ol pipel bilong ol long ples we dispela rot bai ron long en.



Plis fos i gat nupela helikopta

PLIS Fos insait long Papua Niugini nau i gat nupela helikopta bilong strongim na sapotim wok bilong plis insait long kantri. Dispela nupela helikopta i bin kamandaun long Bomana Koles long Mosbi las wik Fraide we ol bikman bilong gavman na plis fos i welkamim.

Dispela balus i kos samting olsem K3 milien na Gavman i baim long Amerika. Bai em i mekim wok bilong plis long ron antap long klaut na helpim ol plisman long graun long karimaut ol wok bilong lo na oda insait long kantri. Bai dispela helikopta i wok long Mosbi siti we i gat planti bikpela trabel na hevi i save kamap. Tasol bai em i go tu long helpim wok bilong ol plis fos long arapela provins taim ol i singaut long helpim.

Dispela helikopta i bin kamap bihain long gavman bilong Bill Skate i bin

mekim toktok las yia olsem ol bai kisim wanpela helikopta bilong helpim wok bilong plis fos insait long kantri.

Tasol Oposisen lida Bernard Narokobi i tok dispela helikopta i no inap mekim gut wok bilong en bikos ol Praim Minista Bill Skate bai yusim olsem liklik (toi) samting bilong em long wok politiks bilong em.

Mista Narokobi i tok ol plisman insait long kantri i sot long planti samting olsem gutpela haus slip, ol rurel plis stesin i bagarap na ol ka bilong plis long yusim long mekim wok bilong ol. Tasol gavman i go het na tromoi mani bilong mekim ol dispela wok long kisim helikopta na dispela bai putim ol plisman wantaim planti hevi ol i gat long en.

Em i tok i gat ol helikopta bilong PNG Difens Fos (ami) i stap na inap gavman i

ken yusim long helpim ol plisman wantaim wok bilong ol. Tasol nau bai Gavman i wok long tromoi mak olsem K2 milien olgeta yia long lukautim dispela helikopta na dispela inap putim hevi long baset bilong plis fos olgeta yia.

Lapun bilong Pangu Pati Sir Pita Lus i tok dispela helikopta bai Plis Komisina Peter Aigilo na Plis Minista Thomas Pelika bai yusim long wok bilong tupela na i no inap mekim stret wok bilong en.

Sir Pita Lus i tok taim gavman i bin toktok long rausim 1000 plismanmeri insait long kantri, dispela i sut long senisim ol dispela lain wantaim dispela helikopta.

Tasol em i tok namba bilong ol manmeri insait long kantri i wok long go antap na i mas gat moa plisman long was long ol.

Oposisen askim Gavman long hariapim kot bilong ol bikman

Oposisen i askim Plis Komisina Peter Aigilo long putim bek John Wakon, Plis Prosekyuta Thomas Eluh na ol plis Task Fos long karimaut ol wok bilong ol long sasim ol sampela biknem lida na ol bikman bilong kantri.

Mausman bilong Oposisen long Plis, Difens na Jastis Samson Napo i tok Plis Minista Thomas Pelika i mas hariap long putim ol lain ya i go bek bikos ol sampela bikpela kot bilong ol bikman olsem Justin Tkachenko na

Jerry Singirok i wok long stap yet na i no pinis yet. Em i laikim tu bai ol plisman i mas pinisim wok bilong ol long sasim Praim Minista Bill Skate long sas bilong mani i paul long Insurens kampani.

Mista Napo i tok Oposisen i skelim olsem olgeta wok bilong kotim ol bikman ya i wok long go isi isi tumas na ol i ting em i mas pasin bilong Gavman long i laik daunim ol kot egensim ol yet na ol lain bilong ol. Mista Napo i tok i no gutpela long kot

bilong Tkachenko na Singirok i wok long stap yet na i no kamap hariap. Bikos taim plis i kotim wanpela liklik manmeri nating, kot bilong ol i save hariap tru na pinis. Tasol taim ol bikman i gat nem olsem i kamap long kot, kot bilong ol i save westim taim tru long kamap.

Mista Napo i skelim olsem dispela i no gutpela tru na ol plisman i mas mekim wok bilong ol hariap na Plis Komisina i no ken giaman sloim ol wok na holim ol dispela samting.

Planti trabel na hevi long Simbu bai ileksen

LUKLUK BEK LONG DISPELA WIK

SIMBU: Bai ileksen long Simbu provins long painim nupela rijinol memba bilong provins i no ron gut bikos i gat planti birua na trabel i kamap. Ripot i tok ol manmeri bilong plis i save kam long bikpela grup na pretim ol ileksen opisa na kisim ol balot pepa na balot bokis i go. Ol i stilim planti balot pepa na karim igo makim na kisim i kam bek pulapim long balot bokis.

Sampela i pretim ol poling opisel long ol i mas sainim ol balot pepa na pulapim long bokis na tu pretim ol na ol plisman wantaim.

Het opis bilong Ileksen Komisin long Mosbi ino mekim wanpela toktok long dispela na ol ileksen opisa long Simbu provins i wok long go het yet wantaim ileksen bihainim sapot bilong ol plisman. I gat save olsem bai ileksen komisin i kaunim ol vot bilong Simbu rijinol long dispela Sarere.

Dispela bai ileksen i kamap bihain long kot i rausim olpela Gavana Pater Louis Ambane long sampela asua em i mekim long 1997 nesenel ileksen we em i win na kamap Gavana.

BOGENVIL: Ol pipel bilong Bogenvil i redi long go long ileksen long makim ol mausman bilong ol long Bogenvil Rikonsiliesen Gavman (BRG) long neks wik. Dispela ileksen em ol Oposisen memba long nesenel palamen i tok dispela i no bihainim lo bilong kantri. Tasol ol lida bilong Bogenvil i go het na sanap strong long dispela ileksen i mas kamap bai ol i ken makim mausman bilong husat i ken toktok wantaim Gavman long ol wok na hevi long stretim sindaun long Bogenvil.

Ilektorel Komisina Reuben Kaiulo i no laik mekim wanpela toktok long dispela ileksen bilong Bogenvil bikos em i tok dispela em disisen na samting bilong nesenel gavman yet.

Bai ol Bogenvil lain i yusim ol provin-sel ilektorel opisa long hap long kari-maut dispela ileksen bilong ol. Oposisen i skelim olsem dispela em rot we Bogenvil i laik mekim long kamapim gavman bilong ol na i ken bruk lusim bikpela kantri PNG. Gavman bilong Bill Skate i save long dispela tasol ol i larim dispela ileksen long go het. Gavman i no mekim wan-

pela toktok long ol bagarap o hevi we Oposisen i toktok long en.

MOSBI: Plis fos long Mosbi i welkam pinis wanpela nupela helikopta bilong patrol antap long klaut na sapotim wok bilong plis fos insait long siti. Dispela helikopta i bin kamap na pundaun long Mosbi Bomana koles long las wik Fraide. Plis Minista Thomas Pelika i tok olgeta samting i stap long dispela helikopta na bai mekim wok bilong plis long ronim na holim ol man nogut hariap tasol. Dispela helikopta i kos K3 milien na i kam long Amerika. Tasol ol lida bilong Oposisen i tok dispela helikopta i no inap mekim gut wok bilong em stret. Bai em i kamap olsem liklik (toi) samting bilong Praim Minista Bill Skate, Plis Minista Thomas Pelika na Plis Komisina Peter Aigilo long yusim raun.

ERAVE: Ol pipel bilong Kagua Erava i gat nupela memba pinis. Nupela memba em Charles Luta na em i winim bai-ileksen long dispela wik Mande. Em i kamap pinis long Mosbi dispela wik na joinim Pipels Demokratik Muvmen (PDM). Bikpela samting em i laikim em long sanapim plis stesin long Erava pastaim.

Rot bilong balus i ron long Lae na Kens i op

MOROB Gavana Luther Wenge, memba bilong Kabwum Ginson Saonu na memba bilong Tawai Siassi Mao Zeming i mekim bikpela welkam tru long dispela ron bilong balus long Lae Nadzab ples balus i go stret long Kens Australia.

Taim Gavana Wenge i katim rop long opim dispela ron bilong balus long Lae i go long Australia, dispelai opim nupela rot bilong kirapim na strongim ol wok bisnis, turis indastri na planti arapela bikpela wok developmen.

Gavana Wenge i bin strongim dispela tingting long las yia taim em i bin tok strong long haus palamen long Gavman i mas kamapim dispela ron bilong balus i go stret long Kens Australia na i no ken westim taim long stap na senisim balus long Mosbi olsem ol i save mekim bipo.

Dispela nupela senis i kamapim amamas tru long ol bisnis komyuniti na planti arapela indastri long provins na tu long arapela provins long hailans na Momase rijon.

Vais Minista bilong Tursim Komes na Tred Ginson Saonu i tok dispela em rot i go long bringim bikpela sevis na developmen long ol wok bilong turism na bisnis insait long Morobe provins na tu long kantri olgeta.



Bai ol bisnis lain long ovasis i ken go stret long Lae na arapela Momase eria o hailans long wokim bisnis bilong ol na i no ken westim taim long senisim balus nabaut.

Memba bilong Tawai Siassi na Minista bilong Hausing Mao Zeming tu i mekim wankain toktok long soim amamas bilong em long dispela nupela ron bilong balus stret long Lae i go long Australia.

Hepi Easter

Menesmen na Wokman meri long Ela Motors
i laik tok Hepi Easter igo long olgeta Klaiens na Kastomas
bilong ol istap insait long Papua Niugini.

**DRAIV ISI NA HAMAMAS GUT
LONG DISPELA EASTER**



Ela Motors
NATIONWIDE



YAMAHA

Hino



YANMAR

PORT MORESBY 3229400 • LAE 4722322 • KOKOPO 9829100 • RABAU 9829188 • MADANG 8522188 • GOROKA 7321844 MT HAGEN 5421888 • WEWAK 8562255
KAVIENG 9842132 • KIMBE 9835155 TABUBILI 5489060 • VANIMO 8571254 PORGERA 5479367 • KUTUBU 5496685 • BUKA 9839915 • LIHIR 9864099 • ALOTAU 6410100

Lukaut long birua bilong sik TB

Ol dokta bai painim yu gat sik TIBi (TB) olsem wanem?

Long luksave long dispela, ol dokta i mas sekim spet bilong yu taim yu kus o yu laik spet. Bai ol i sekim dispela aninit long strongpela masin bilong traim painim ol binatang bilong sik TB. Sapos spet bilong yu i gat binatang bilong TB, dispela i soim olsem yu gat sik TB long bodi bilong yu. Sapos i nogat sain bilong TB long spet bilong yu, bai ol dokta i traim long sekim lewa bilong yu aninit long Eks Rei (x-ray) masin nogut yu gat sik TB i stap long lewa bilong yu.


I gat rot long pinisim sik TB?

Yes i gat rot bilong rausim sik TB. Long kamapim rot bilong pinisim

sik TB, ol lain i gat sik TB i mas bihainim dispela rot.

Sapos yu gat sik TB, bai yu kisim foapela kain marasin inap olsem 6-pela mun. Bihain long tupela mun yu wok long kisim marasin i kam, bai ol dokta long haus sik sekim gen spet bilong yu long traim painim binatang bilong sik TB. Sapos bodi bilong yu i wok long kamap gut liklik, orait bai yu kisim tupela kain marasin tupela taim insait long wanpela wik inap foapela mun olgeta. Yu no inap stap long haus sik long kisim ol dispela marasin.

Sapos yu bin orait pinis na tasol yu kam bek gen bikos yu kisim sik TB gen, bai yu inap kisim marasin inap 9-pela mun. Sampela taim bai sik TB i ken kisim ol bun, bel na kidni o arapela hap bodi bilong yu.



• Planti manmeri i joinim longpela lain long sekim ai bilong ol long 1999 Helt Expo long Sir John Guise stedium las wiken long Mosbi. Wanpela fri sevis ol lain long haus sik i kamapim long ol publik i ken testim ai bilong ol.

Pasin bilong lukautim gut skin na gutpela sindaun

Wasim na pasin gut sua

Yu bai kismi sampela kain trabel o birua wanwan taim. Bai yu pundaun long sia, na taim yu go antap long diwai yu bai pundaun, na sapos floa bilong haus i wet, yu inap pundaun tu. Sampela taim sua bai kamap taim yu pundaun na sampela samting i katim yu. Blut bai kam taim skin i kat. Yu mas wasim na pasim gut sua bai i drai hariap.

Yu mas boilim wara long wasim sua. Taim wara i go kol pinis, orait wasim gut sua na pasim. Ol binatang bai i go insait sapos sua

i stap nating. Yu ken askim wanpela man long helpim yu sapos ol dispela samting kamap. Blut i wok long ron strong, skin i go retpela olgeta na solap, susu i kamaut long sua, na sua i wok long givim pen long yu. Sapos yu kukim han bilong yu, putim han insait long kol wara inap long 5-pela minit samting. Sapos yu ting olsem bodi i bagarap pinis, go lukim ol helt woka long haus sik bai ol i helpim yu.

Wasim na pasim gut sua. Nogut ol binatang bai i go insait na mekim yu sik.

Kisim ol kaikai olsem prut

Sampela taim yu bai laikim tru long kaikai bisket na ol loliwara. Sampela taim yu bai i no laikim tumas long kaikai tasol yu kaikai nating.

Ating yu no ken kisim ol bisket na ol swit i gat planti suga long ol. Ol kaikai i gat planti suga long ol i nogat planti vitamim o gris bilong helpim bodi.

Sampela dring ol i save salim long ol stua i gat planti suga. Kisim sampela ol prut jus we ol i nogat planti suga long en.



• Mista Kondom i raun long 1999 Helt Expo long las wiken helt so long Mosbi. Ol kain kain samting bilong ol manmeri i kisim save long lukautim bodi na abrusim ol sik nogut i bin kamap long planti manmeri i lakim long lukautim ol yet. Mista Kondom i raun toksave olsem AIDs em sika nogut olsem na yusim kondom.

FRI BAIBEL KOS LONG PAS

I kam long wanpela pren long America sapos yu laikim fri kos salim nem na adres igo long:

WOL BAIBEL SKUL
WBS - PNG 12, P.O. Box 9346,
Austin, TX 78766 USA.

Yusim taunam egensim birua bilong malaria

Taunam o moskito net em wanpela banis we yu wantaim famili bilong yu i ken slip insait long en bai natnat (moskito) i noken kaikai yu long nait taim yupela i slip. Long nait em taim bilong natnat long painim ol manmeri long kaikai o dring blut bilong ol. Bai ol i raun taim ples i go tudak inap ples i kamap klia gen long tulait. Olsem na long dispela taim, i gutpela long ol pikinini bilong yu na yu bikpela manmeri yet i ken slip insait long taunam long

banisim yu long birua bilong natnat bikos ol natnat bai givim yu sik malaria.

Olgeta manmeri i mas slip long taunam bikos sik bilong malaria i bikpela birua long ol liklik pikinini na ol mama husat i gat bel. Olsem na em i bikpela samting long olgeta liklik pikinini wantaim ol mama i gat bel long i go slip hariap insait long taunam taim ples i wok long tudak bai natnat i no ken kaikaim ol.

I gat sampela taunam we ol i rabim marasin long en.


Dispela em spesel marasin ol i kolim pemetrin. Dispela marasin pemetrin i save birua long ol binatang. Olsem na dispela marasin inap kilim ol natnat na arapela binatang husat i kam klostu long en. Ol dispela pemetrin marasin i stap long ol helt senta na tu long Rotary Club na tred stua. Sapos yu no inap painim long stua klostu long yu, askim ol long baim i kam long Rotary Club long Mosbi. Adres em: Rotary Against

Malaria, PO Box 135, Jackson's Airport, NCD. Telepon 325 9800 Fax 325 9809.

Taunam i gat dispela marasin long en i ken givim yu gutpela banis egensim natnat. Dispela marasin tu i no inap bagarapim bodi bilong yu sapos yu yusim ol gut long stretpela rot bilong en. Sapos yu no yusim ol stret bihainim rot bilong yusim o miksim ol dispela marasin, bai em i ken kamapim bagarap long skin o bodi bilong yu.

**Tingim
minin
tru
bilong**

Ista



Kavieng bisop salim Ista gritings

PETER MAIME i raitim

KATOLIK Bisop bilong Kavieng/Manus Daisos, Ambrose Kiapseni i salim Ista gritings bilong em i go long ol Katolik manmeri long PNG husat bai nogat pris long lotu wantaim long pestode bilong Ista.

Em i tok, em i save olsem planti hap bilong kantri bai i nogat pris long selebretim taim bilong holi wik na Ista. Em i tok diasos bilong em tu i sot long ol pris.

Long Tunde apinun, Bisop Kiapseni i bin mekim misa long Kavieng wantaim ol pipel na sampela ol pris bilong em long blesim krisim o holi wel. Dispela wel em ol pris i save yusim long taim bilong baptismo na

tu taim ol i givim ol narapela sakramen long ol kristen manmeri.

Ol pipel long taun i kirap nogut taim Bisop Kiapseni i tok "hepi Ista" long ol taim de bilong Ista i no kamap yet. Tasol em i tokim ol olsem em bai i no stap wantaim ol long holi wik na Ista. Narapela pris bai stap na lotu wantaim ol pipel.

Bishop Kiapseni aste i bin go stap wanpela wik olgeta long Tabar Ailan na lotu wantaim ol pipel long hap. Tabar long dispela taim i nogat pris na Bisop i sori na laik go lotu wantaim ol.

Em tu bai givim konpemesen o mak bilong strongim bilip long sampela lain taim em i stap long Tabar.

Em bai go bek long Kavieng long neks wik Trinde.

43 bai baptais long Minj

MINJ Katolik Sios insait long Westen Hailans bai lukim 43 manmeri bai baptais long Ista nait.

Planti bilong ol dispela lain husat bai baptais em ol yangpela. Ol dispela katekumen i kam long Kondika, Konumka, Berepka na Kokia haus lain klostu long Minj Katolik stesin. Ol katekist i bin wok hat long lainim ol manmeri ya moa long wan yia long pasin bilong lotu na bilip bilong Katolik Sios.

Peris Pris, Pater Zan W i tok pestode bilong Ista i gat spesel mining bikos em taim we ol bilip manmeri

i tingting long ol gutpela wok Jisas i mekim long sevim ol. Tu long Ista nait Sarere, bai i gat blesing bilong paia, Ista kendel na holi wara. Lotu bai stat long 8 kilok nait.

Long dispela taim bai i gat rit bilong pasin God i bin mekim long sevim ol lain long Israel na dispela wok em i inapim tru long taim bilong Krai.

Em i tok, rit bilong baibel bai kisim bel bilong ol lain husat bai baptais bikos mining bilong Ista i go wantaim baptismo bilong ol. Ol pipel bai dai long tudak pasin bilong ol na kirap wantaim nupela laip bilong Krai.

Latin singsing bai pairap long Aitape

OL LAPUN bilong Ali na Seleo Ailan klostu long Aitape insait long Wes Sepik i redi long singsing long tokples Latin na Jeman long Ista pestode.

Planti lapun long dispela tupela ailan i bin dai pinis, na ol lapun husat i stap yet i laik bringim bek ol singsing ol bin lainim bipo.

Ol lapun long hap i bin lainim ol singsing long Latin na Jeman taim ol namba Katolik misinari i bin kam long hap. Ali na Seleo Ailan, em namba wan ples we ol

Katolik misinari i kam sua na bihain ol i go olsem long Bogia long Madang na narapela hap bilong Mamose rijion.

Peris Pris bilong Ali na Seleo, Pater Tim Elliot i tok, nau ol lapun i redim ol yet long singsing long taim bilong Ista.

Long Gut Fonde nait bai i gat misa long Ali na Seleo. Long Fraide, ol Katolik manmeri long hap bai tingting pen na dai bilong Jisas long rot kruse. Long Sarere bai i gat misa na blesing bilong paia, Ista kendel na holi wara.

Tupela ailan bai bung wantaim na mekim bikpela Ista lotu long Ali long Sande. Long dispela taim bai ol lapun i kirapim das long singsing Latin na Jeman.

Pater Elliot i tok, sampela ol pikinini tu bai baptais long pestode bilong Ista.

Em i tok planti manmeri bai bung long kain taim olsem bikos sampela ol lain i stap nambaut long Madang, Lae, Vanimo, Wewak na Pot Mosbi bai go kisim malolo long ples.

Tabubil bai karim kruse

OL Kristen manmeri bilong Tabubil long Westen Provins bai wokabaut na raunim dispela maining taun bilong ol wantaim diwai kruse long Gut Fraide. Dispela pasin em planti kristen long olgeta hap bilong wol i save mekim long holi wik Fraide long tingim pen na indai bilong Jisas.

Ol pipel bai statim prosesio long Tabubil Katolik Sios na kam pinisim gen long haus lotu.

Long hap rot i gat stesin bilong kruse we ol bilip manmeri bai pre na tingim ol pen Jesus i bin karim long sevim ol pipel bilong graun. Peris Pris bilong Tabubil Katolik Sios, Pater John Cartier i tok, planti manmeri bai i stap long dispela wokabaut bilong kruse.

Long sait bilong lotu Katolik, ol sios lida bai wasim lek bilong sampela lain ol i makim long en long Gut Fonde nait. Dispela i bihainim pasin bilong Jisas long stap olsem wok boi bilong ol narapela pipel. Long Sarere bai i gat misa long nait, sios bai blesim paia, Ista kendel na holi wara. Bikpela lotu bilong Ista Sande bai kamap long 8 kilok moning. Pater Cartier i tok, samting olsem 1500 Katolik manmeri bai bung long selebretim pestode bilong Ista.

Bikpela lotu bung long Goroka

OL KAINKAIN kristen lotu long Goroka bai mekim bikpela lotu bung long Pis Pak long Gut Fraide.

Toksave i go aut pinis long olgeta lotu insait long Goroka long stap long dispela bung. Ol pipel bai stat long Luteran Sios long Wes Goroka na wokabaut wantaim kruse i go olsem long maket na stap long Pis Pak.

Long Pis Pak bai lotu bung i kamap. Ol bilip manmeri husat ol i makim bai ritim ol baibel stori bilong tingim pen na indai bilong Jisas insait long gutnius bilong Nupela Testamen. Tu bai i gat singsing na drama long dispela taim. Bihain long lotu bai ol kristen i bungim ol kaikai na givim i go long ol kalabus manmeri long Bihute.

Pater John Ryan bilong St Mary Katolik Sios i tok,

ol bos bilong Bihute i bin stapim ol kalabus lain long wokim gaden na planim kaikai bilong ol yet, olsem na olgeta wik, wan wan sios i save makim taim na karim ol kaikai i go long haus kalabus.

Long Sande bipo long san i kamap, ol kristen bai bung gen long Pis Pak na tingim kirap bilong Jisas long matmat. Bihain bai ol i go mekim lotu long wan wan sios bilong ol.

Long lotu Katolik, ol kristen husat i save go long St Mary bai gat bikpela misa long YC hol long taun. Misa bai kamap long hap long Sarere nait na Sande morning wantaim. Haus lotu bilong St Mary i liklik tumas long bungim olgeta manmeri husat bai kam lotu long bikpela pestode bilong Ista.

KOPRA MAKETING BOD WESTIM MANI BILONG OL KOPRA PRODUSA

Long dispela wik Mande, Kopra Maketing Bod i kisim wanpela loya i kam long Australia long makim ol long kot engensim ol Kopra Produsa. Pe bilong kisim dispela loya em bikpela mani. Dispela pasin bilong westim mani bilong ol Kopra Produsa em samting mipela i nau komplem long en,

- Nogat gutpela ripot bilong Kopra Maketing Bod long sait bilong mani
- wok bilong Kopra Maketing Bod i slek
- Kopra Maketing Bod i no save strong long painim maket bilong salim ol kopra
- Nogat wanpela memba bilong PNG Groas Asosiesen i stap insait Kopra Maketing Bod

Kopra Maketing Bod i wari long holim pas pawa bilong ol na ol gutpela samting ol i save amamas long en olsem ol bikpela bil long peim long ol hotel ba long Pot Mosbi. Kopra Maketing Bod i givim moa pen long ol lain em i sapos long sevim.

Tingim, Kopra Maketing Bod. Ol grasrut Kopra Produsa long Is Nu Briten, wanpela bikpela provins i save kamapim Kopra bisnis long kantri, tupela wik i go pinis i bin lap long yupela long Rabaul.

Ol bikpela Kopra Produsa i no laikim yu: Ol liklik Kopra Produsa i no laikim yu.

We stap K13.9 milien? Ol produsa i laik save.

Bilong wanem na Kopra Maketing Bod i wok long kisim K50 long wan wan tan long olgeta mun long ol produsa long bekim gavman dinau mani, em ol produsa i peim bek pinis long Kopra Maketing Bod long tupela yia i go pinis. Dispela K50 i kamaut long poket bilong olgeta kopra produsa.

BIHAINIM
MIPELA . **A** GMARK . MUR
IAU

WANTOK spots wiken

KOIARI LIG RIPOT

KENNEDY EDENE i raitim

Nupela klab joinim asosiesen

17 MILE em i nupela klab nau i joinim Koiari Ragbi Lig long Sogeri na redi tasol long sisen i stat. Dispela nupela klab i surikim namba bilong ol klab i go 8-pela olgeta.

Klab ya bin askim ol opisel na ol i oraitim ol long stap insait long ragbi lig resis bilong dispela ya.

Koiari bai kik-op wantaim pri-sisen long dispela wiken. Na pri-sisen ya bai ran inap tupela wik na sisen tru bai kam.

Bai i gat wanpela spesel jenerel miting i kamap we ol i toktok long sampela bikpela samting olsem ileksen bilong ol opisel tu bai kamap.

Taim bilong presiden Dick Warina na olpela opisel bilong em i pinis olsem na i mas gat nupela ileksen.

Warina tok em i nogat tingting long sanap long ileksen bilong presiden. Em i tok em i laik malolo na bai givim sans long arapela man i ken ranim dispela ragbi lig kompetisen.

Ol lig opisel bin laikim kik op stret wantaim sisen propa tasol planti samting bilong lig i no stret. Planti ol opisel olsem kosa, trenna na mesesa i no rejista yet wantaim PNGRFL.

Dro bilong dispela wiken i sanapa olsem:
12.00 noon Hooks Tigers vs Crystal Lakers,
1pm: Sirinumu vs Sogeri Choice,
2pm Sirinum Owls vs Ice Panthers
3pm Safari Bears vs Vakasu Brothers.

Sogeri i makim yut skwat

SOGERI Distrik i makim 50 man na meri husat bai karim nem bilong asosiesen long Hiri Distrik Yu So long Tubuseria viles insait long Sentral Provincs.

Ripot i soim olsem nem i stap tasol ol bai i no inap tokaut long inap ol i stretim sampela toktok pastaim.

Sirinumu Wavers bilong Sirinumu Dam eria i bin winim dispela Sogeri distrik Yut Spots tonament i bin kamap las wik. Ol tim i bin resis long volival, soka, tas ragbi atletik we Wavers i winim olgeta spot ya.

Long Hiri So long Tubuseria, ol bai makim skwat bilong Hiri Distrik long salens long Sauten Rijen Yu so we bai kamap long Alotau.

Kodineta na em tu presiden bilong Sogeri Wimens Kaunsil Inoa Kopi i tok, "em i no amamas long ol bik-man husat ol i makim long kam na opim Sogeri yut so i no bin kamap.

Em i tok dispela em i no gutpela pasin ol soim na em i soim ol i nogat interes o laik long sapotim na helpim ol yangpela spotsman na lida bilong tumora.

Em i tok yumi mas trai na putim sampela tingting o taim long ol yanpela husat ol i save mekim trabel insait long ol koryuniti long nau.

"Yumi mas traim na wokim sampela samting long traim na mekim ol lain i bisu na noken tingting long wokim pasin nogut na trabel nambaut.

PNGRFL REFERI RIPOT

Wabag na lalibu referi tasol i rejista

DAIREKTA bilong Ragbi Lig Referi Asosiesen insait long kantri Alphonse Pu i mekim was-aut tok i go long ol lokal asosiesen long noken holim kompetisen inap ol referi i rejista na baim afiliesen fi.

Pu i tok nau yet lalibu long Sauten Hailens na Wabag referi asosiesen i rejista na baim afiliesen fi. Ol referi long dispela tupela asosiesen i ken lukautim ol gem na nogat ol arapela referi.

I gat bikpela rong tru sapos ol lokal asosiesen i yusim ol referi i no rejista long ranim ol gem.

Maski em pri-sisen o sisen propa, ol asosiesen i noken yusim ol referi husat i no rejista.

"Bipo ol sinia pilaia i save referim ol gem bikos ol referi na tas jas i no save kamap.

"Dispela kain pasin i mas pinis nau. Em bai stap na nogat wanpela asosiesen i mas brukim dispela lo", Pu i tok.

Sapos wanem asosiesen i brukim dispela lo em i brukim lo bilong kompetisen na i ken kamap long ai bilong PNGRFL.

SP AWOT RIPOT

Bai winim awot

HENRY MORABANG i raitim

BIKNEM pilaia bilong PNG na Melbourne Storms Marcus Bai i winim namba wan spot awot, 1998 SP Sportsman of the Year.

Em i autim winim tupela arapela pilaia Lynch Ipera na Stanley Nandex. Dispela tripela pilaia i bin salens las yia na Nandex i winim dispela taitel olsem 1997 Sportsman of the Year.

Bai em i save pilai ragbi lig, Ipera em i sempion boksa husat i winim bronz medal na Nandex em wanpela kikboksing man. Em i save stap long bikpela ol resis long wol.

Na long resis bilong spots meri, Liz Wardley i winim taitel. Em i resis wantaim tupela arapela spotsmeri Maggie Joseph na Naluge Guy.

Wardley em i save ran long selbot, na Joseph em i pita bilong AB Bears sofbal tim long Pot Mosbi na Guy em i skwas (squash) pilaia. Guy em i namba 108 pilaia long wol.

Bai i winim awot long Sarere nait. Na long Fraide nait, em i pilai wantaim Melbourne Storms egens Canterbury Bulldogs na win.



• Tripela ovasis pilaia bilong PNG (l-r) Stanley Gene (Hull Kingstone Rover - Ingran), Marcu Bai (Melbourne Storms) na kepten Adrian Lam (Sydney City Rosters) i tok pilai bihain long gem.

Em i tok dispela tupela trai em i putim long Fraide nait em long tok tenk yu long ol sapot em i save kisim i kam long Papua Niugini.

Wanpela biknem referi bipo Raymond Hoada husat i save sapotim Manly i sensim klap long taim Bai i stat pilai long Melbourne. Nau em i kamap wanpela namba wan sapota bilong klap stret ya.

Wardley husat i winim junia athlete of the year awot tu i winim Sports women awot. Wardley em bilong Australia, na

em i save makim kantri long planti resis bilong selbot (yachting)

Wardley i tok em i save amamas tru long makim PNG na save tokim ol olsem kantri bilong em i Papua Niugini.

Ol arapela wina
Team of the Year: PNG Pukpuk

Junior Male Athlete of the Year: Jeffrey Bai

Junior Team of the Year: Under 19 (softball girls)

Encouragement Award for

Outstanding Team: Kokopo Muruks

Encouragement Award for Outstanding Female: Namiko Kobayashi

Sports person with disability: Gabby Yura

Distinguished Services to Sports: Kevin Murphy

Coach of the Year: Elizabeth Wells

Sports Administrator of the Year: Tony Green

Technical Official of the Year: Sari Fareho

Manalos nupela sempion long Lae

FRANCO NEBAS i raitim

LAE WIMENS SOFBAL GREN FAINEL RIPOT

ISLAND Shipping Manalos em nupela sempion long Lae wimen sofbal bihain long ol i bagarapim sindaun bilong maina primia na difending Sempion Hero Bismarck Shark 6-0 long Sarere.

Dispela gren fainel i bin kamap long Sir Ignatius Kilage Stadium we moa long 1000 manmeri i bin kamap long lukim dispela pilai.

Bismarck husat em i nambawan wimen klab long kantri na Lae. Dispela klab i winim planti taitel tru tasol long Sarere, marila bilong ol i kol na Manalos i wilwilim ol stret.

Manalos husat i stap anit long lukaut bilong kosa Paul Pasen i no winim wanpela taitel taim klab i bin stat 5-pela yia i go pinis.

Long rekot bilong tupela taim ol i save bung, Bismarck i save bagarapim sindaun bilong Manalos tasol long Sarere tebol i tanim na sindaun bilong Bismarck i bagarap.

Manalos i bin go olsem tim i nogat nem na Bismarck i feveret.

Long stat bilong namba wan inings, gem i luk moa tait wanem tupela sait i soim olgeta strong bilong ol.

Bismarck i bin bet pastaim tasol i no brukim kiau. Long sem ining taim Manalos i bet em skoa i bin kamap.

Skoa i bin kamap taim stail meri ya Vivian Pasen paitim wanpela bikpela bal we abrusim bandri long kamap hom run.

Taim Vivian i kamap wantaim dispela hom run em Manalos i skin kirap na i wok long putim presia long Bismarck.

Long dispela as ol i wok long lokim betas bilong Bismarck long winim bes. Dispela ol gut-

pela pilai i bin kamap long infil pilaia olsem, Carol Kori, pita May Woo, ketsa Anne Kero, Vivian Pasen na Beverly Pasen.

I no long taim long seken ining, Manalos i go yet gen long wokim wanpela hom run we i kamap long ketsa Anne Kero long bringim skoa go antap 2-0.

Bismarck traim pait bek wan-

taim sampela gutpela pilai kam long Shirley "Bombe, Maire Seri, Joyce Tau na Ara Hungrabos tasol lak i no stap wantaim ol.

Manalos i pasim olgeta rot bilong ol inap long namba 6 ining we Bismarck i kamapim ol asua taim ol i stap long presia.

Pita bilong Bismarck i kisim taim. Sarere ating i no de bilong em we olgeta bal bilong em i no strong na ol Manalos i paitim long laik.

Manalos i skoarim 4-pela hom run long 6 ining taim asua i wok long kamap long infil na autfil eria bilong Bismarck

Dispela i lukim, Carol Kori, May Woo na Vivian Pasen husat i paitim wanpela hom run hit gen long kisim March Hosea na em yet i go long we skoa i sanap 6-0.

Long las ining Bismarck traim long mekim sampela mirakol tasol ol Manalos is ave yet na blokim olgeta rot long kamap wina.

Kosa bilong Manalos Paul Pasen i nogat toktok long tok long wanem em i amamas tru long ol meri i pilai gutpela gem.

Pasen i tok, i nogat planti asua i kamap long sait bilong mipela na tu pes hom run kamap long Vivian i bin kirapim skin bilong ol pilaia we ol i get gut tru, long dispela as mipela i winim ol."

Em i tok olgeta pilaia bilong em i pilai gut stret.



• Manalos tim.

Spot
long
eksen
bilong las wiken



Ileksen stapim Hailans Klab Soka fainols

BAI-ILEKSEN long Simbu na Kagua/Erave long Sauten Hailens i bagarapim olgeta plen bilong fainels bilong Hailens Rijonel Soka salens. Dispela ol gem i mas kamap las wiken tasol nau ileksen i kamap na ol pilaia na ol opisel i pret long yusim haiwe.

Dispela kompitisen em nupela resis we i kamap long pinis bilong las yia we David Chung na Ananias Popo i go pas long en.

Dispela resis em olgeta namba wan klab insait long Hailens na Lae i traim resis long winim dispela bikpela prais mani na tropi we Cheung i putim long en.

Resis ya bin stat long pinis bilong las yia i kam inap long Janueri long dispela yia we 8-pela klab i kwalifai long fainels.

HAILENS SOKA RIPOT

Fainels ya inap long kamap long dispela wiken tasol displa ol klab we i stap insait long fainels em planti bilong ol pilaia i plisman husat i stap long operesen bilong ileksen.

Long dispela as, ol opisels i senisim taim i go gen long namba tu wik bilong mun Epril.

Ol komiti na ol lain i go pas long dispela resis laik salim bikpela tok sori go long ol klab husat i stap insait long dispela resis na tu olgeta pablik long ol dispela senis.

Ol eksekyutiv tu long ol klab long Hailans i tok bikpela sori i go long Lae Futbol Asosiesen (LFA) long bagarapim kalenda plen bilong ol we ol inap long sta-

tim lokal kompitisen bilong ol.

Long dispel taim tu John Peka husat i namba tu presiden (teknikal) i tok em bai go het long statim sisen tru bilong LFA long dispela wiken.

Em i tok, ol i no inap long lusim nating dispela wiken long wanem kalenda bilong ol long dispela yia i tait stret.

Lon wankain taim tu Peka i singaut long ol asosiesen husat i save resis long Morobe Soka Federesen kompitisen mas kamap long wanpela spesel AGM miting long dispela wiken long LFA klab haus.

Peka i tok olgeta asosiesen mas salim ol mausman kamap long dispela miting long wanem bai ol i toktok long nupela eksekyutiv na plen bilong federe-

Nupela soka asosiesen bai kamap long Mosbi

HENRY MORABANG i raitim

WANPELA bikpela miting i bin kamap aste long stretim toktok bilong kirapim nupela soka asosiesen.

Man i go pas long dispela kibung. Baku Bakuwai, wanpela sinia pilaia na kosa bilong Blu Kumuls bipo wantaim kosa Alphonse Kurabi i go pas long dispela miting.

Bakuwai i tok astingting long kirapim nupela soka asosiesen em bikos Pot Mosbi Soka Asosiesen i no inap lukautim olgeta soka pilaia long soti.

Em i tok ol soka sapota i noken tingting long Dr Kuam Malai. Dr Malai i lus long soka resis bilong PMSA na em i nogat wanpela samting long mekim wantaim nupela asosiesen.

Astingting long kirapim dispela em long givim sans long ol arapela soka

pilaia tu long soti.

Dispela em i gutpela bikos em bai wankain olsem LFA na Lahi soka kompetisen long Lae.

Wanpela samting em nupela soka asosiesen i tingting long mekim em long seleksen. Taim bilong seleksen, olgeta gutpela pilaia long olgeta divisen bai gat sans long trening skwat na i no primia divisen tasol.

Long dispela we, olgeta pilaia i save ol i gat sans long makim lokal asosiesen sapos ol i pilai gut.

Nau long PMSA, ol sinia pilaia na primia pilaia tasol i save makim lokal asosiesen.

Bakuwai i askim olgeta klab husat i gat tingting long sapotim dispela miting i mas redi long givim taim. Dispela kompetisen i no bilong em, em i samting bilong komyuniti, na em i laik olgeta komyuniti i mas putim tim na pilai.

Eagles flai antap long Gazelle

BROWN Eagles i kamap nupela sempion klap long bihain long ol i autim tiket bilong Gazelle 10-9 long grenfainel long Sande.

Ol boi Eagles i gat bikpela wok long Sarere yet taim ol i winim FAI Manalos 4-1 long prilimineri finale na bihain bungim Gazelle long grenfainel we ol i win.

Ol boi long Matupit i kamapim gutpela gem long namba seven ining we tupela tim i strong na dro.

Skoa i sanap 9-9 na nupela pilaia Chris Timi i paitim wanpela gutpela bal i kam long Patrik Pilak.

Orait, George Kiapen i wokabaut i go long namba wan bes bihain long Pilaik i no pits gut. Na dispela i helpim Timi long go sanap long namba tu bes.

Tupela arapeal beta Esau Vinarang na Mesak Wuat em i aut long K2 bilong pisa bilong Gazelle.

Gem i wok long strong tru nau na trik pilaia bilong Brown Eagles Allan John i giamanem Pilak na em ino pits gut. Olsem na ketsa bilong Gazelle Peter Urari i no holim bal na Timi i kam hom.

Na dispela i helpim nau Brown Eagles long win 10-9. Timi na ol boi Gazelle i save pinis ol i win na amamas stret.

Gazelle i kisim hattaim liklik ya. Bihain long namba tu ining, skoa bilong ol boi Gazelle i sanap 0 na Brown Eagles i stap pinis wantaim 4-pela poin.

Ol Brown Eagles i no westim taim. Tupela namba wan beta i opim rot long namba wan ining wantaim skoa. Pedro Kinavai na Damin, Wartovo i kam hom long go pas long skoa 2-0.

Insait long namba tu ining, Esau Vinarang i paitim wanpela gutpela bal na olgeta long bringim em yet wantaim George Kiapen i kam hom.

Kosa bilong Brown Eagles Peter Albert i tok tripela boundri hit we Wartovo, Vinarang na Kinavai i helpim tru ol pilaia long pilai gut.

"Ol pilaia i krai bikos bihain long 6-pela yia nau mipela i winim dispela grenfainel," Albert i tok.

Em i tok em i namba wan taim bilong em long kosa na em i

POM MENS GREN FAINEL RIPOT



amamas tru long dispela win long grenfainel.

Penial Eliab i brukim kiau taim em i paitim bal i go long sait bilong banis long autfil.

Brown Eagles i no mekim wanpela ran long namba tri na namba foa ining na Gazelle yet i putim 4-pela ran long surikim skoa i go klostu long Brown Eagles.

Kosa bilong Gazelle Joachim Kiliu i tokaut olsem dispela asua bilong Peter Urari i bagarapim gem. Sapos nogat, ol i ken holim yet Brown Eagles long dro o win.

Kiliu i tok em i amamas tru long grenfainel. Tasol em i no mekim planti toktok bikos em i tok tim husat i bin pilai gut tru i winim dispela grenfainel.

Na long B gret, Brown Eagles i winim: birua tim, Burma Raiders, 10-9. Dispela em wankain skoa we ol sinia Brown Eagles i mekim save long Gazelle.

Na long C gret, Tisa Jets nekim MSC 12-6.

"Ol pilaia i krai bikos bihain long 6-pela yia nau mipela i winim dispela grenfainel," Albert

• **Tony Daple bilong Gazelle i ran tasol em i hevi tumas na aut. Gazelle lus 9-10.**

Goroka lig grensten i bagarap

SAPE METTA i raitim

GOROKA em i wanpela bikpela ragbi lig senta insait long kantri we i save saplaim planti pilaia olsem kumul.

Na planti intanesenel gem tu i bin kamap pinis long dispela senta.


Tasol nau dispela stendet bilong pilai ragbi lig i no moa i stap long Goroka.

Na ol sapota tu i givap bikos ol i nogat laik moa long lukim pilai. Long wanem as? Ating i luk olsem ol i no moa amamas long kamap long Danny Leahy pilai graun long lukim pilai bikos planti samting i bagarap olsem grensten, ples bilong sindaun na tu ples pilai i bagarap.

Wanpela long ol dispela bagarap em sait sten we ol bikhet man i go insait na rausim ol timba na kapa na karim i go aut. Nau yet ol opisel bilong Goroka lig i tok dispela pasin i no stap. Na i no long taim olgeta timba na kapa samting bilong lig graun bai pinis sapos ol bikhet man i go het na rausim yet ol samting.

Kos bilong ol samting we ol bikhetman i rausim em samting olsem moa long K20,000.

GOROKA LIG RIPOT



• **Gren sten long Sir Danny Leahy oval i bagarap bikos ol hambak man i kisim timba na kapa. Foto: Sape Metta.**

Ol lig opisel ya i tok Goroka lig i kisim pinis K80,000 long provinsal gavman long stretim ples insait long Danny Leahy pilai graun.

Tasol ol i no inap go het na mekim wok sapos ol dispela bikhetman i go

het yet na rausim ol samting.

"Ol bikhet man ya i mas stapim dispela rabis pasim bilong ol na bai mipela i kam lukluk long stretim ol samting insait long lig graun," ol opisel ya i tok.

Demas winim presiden gen long Lahi

FRANCO NEBAS i raitim

PRESIDEN bilong Lahi Soka Asosiesen Moses Demas i winim bek sia bilong em olsem presiden. Em bai holim wok ya long tupela yia olgeta.

Demas husat i bin stap presiden long bai-ileksen bilong Lahi las yia inap nau i soim pinis gutpela wok em i bin mekim we ol klab i luksave na makim em gen long holim sia bilong em.

Demas tasol i winim bek sia bilong em na ol arapela eksekutiv i lus na ol nupela lain i kisim ples.

Ol nupela lain husat i winim posisen long eksekutiv em, (namba tu presiden) Wilson Matainge, (sekretari) Uwe

LAHI SOKA RIPOT

Bodensehatz, (asisten sekretari) Rose Obi, (tresera) Bulas Yowat na (namba tu tresera) Benard Tzilu.

Demas i tok, Bodensehatz em wanpela German volentia wok long hia na wantaim em Lahi i gat gutpela fetsa long soka.

Olpela tresera Paul Pondo i no laik long stap yet long sia bilong em long wanem em i gat arapela posisen long PNGFA."

Bihain long ol i makim ol eksekutiv, Demas i tok amamas long ol nupela lain ya na tu em i bai wok gut wantaim ol bikos em bilip olsem ol i rait lain.

Em i tok long bipo eksekutiv,

ol i no bin wok gut wantaim long wanem sampela tasol i wok na arapela nogat.

Long dispela annual jeneral miting tu ol i makim Paul Pondo olsem Honari eksekutiv long gutpela wok na taim em i givim long asosiesen.

Saijen Kori bilong Difens Klab i kamap olsem gem kaunsilo na namba tu bilong em, Kauye Gamu.

Demas i tok bikpla tenkyu i go long olgeta klab opisel, pilaia na sapota long gat bilip long en na makim em kamap-presiden gen.

Demas i tok, "long las taim long opis, mi stap lukluk long wanem kain we yumi ken mekim Lahi asosiesen kamap moa gut na nau mi winim sia gen bai mi mekim kamap ol

samting mi lukim pinis we ken helpim asosiesen bilong yumi.

Em i askim olgeta klab opisel, pilaia na sapota long wokbung wantaim nupela eksekutiv bilong em na bai asosiesen bai kamap nambawan.

Lahi pri-sisen go het gut, Demas

LAHI Soka Asosiesen pri-sisen kompitisen i wok long ron gut long las tripela wiken.

Demas i tok olsem kompitisen i bin kamap long Eriku Ovel bihain long LFA i yusim stadium long holim fainels bilong ol.

Demas i tok, "planti manmeri i bin pulap long Eriku Ovel long lukim ol gems."

HAILENS SOKA RIPOT

LFA wari long Hailens klab fainels

LAE Futbol Asosiesen (LFA) i wok long wari tru sapos Hailens Klab Soka sempionsip bai holim fainel bilong em o nogat.

LFA yet i gat tupela tim i stap insait long dispela fainel. Fainel ya i wok long surik i go i go bikos planti tim bilong Hailens i pret long ran long haiwe bikos long ileksen long Simbu.

Ol opisel bilong LFA i pret nogut ol fainel bai kamap na bagarapim kalenda. Em i namba tri taim nau ol ogensaisa bilong Hailens Soka Kap, David Chung na Ananias Popo i surikim taim.

Soka fainel ya sapos long kamap long Februari na bihain ol i surikim i go long dispela wiken. Tasol nau ol i surikim gen i go long neks wik.

Sekteri bilong LFA na man i go pas long oganaising dispela fainel Augustine Guarim i tok olsem dispela em las taim ol i muvim fainels i go long narapela taim.

Guarim i tok, "muvim bilong dispela fainel i go narapela taim gen i no gutpela tumas long wanem LFA sisen propa bai kik op long Epril 3-4 na eksekutiv bilong LFA i no laikim bai dispela fainels i bagarapim kompitisen."

"Bilong wanem kalenda bilong LFA long dispela yia i tait stret."

Sapos ol i muvim gen taim, em ol i mas painim arapela hap long holim dispela fainels na i no long LFA," em i tok.

Long dispela taim yet tu, Guarim i wari liklik long ol klab long Hailens long wanem ol i no kolim em na toksave long ol ples bilong slip o bai stap we.

Guarim i singaut strong long olgeta klab i long ringim em na tokim em long wanem hap ol i stap. Em i wetim yet toktok i kam long ol dispela klap long Hailens Blue Kumuls (Wabag), Elcom (Wabag), bilong man na meri Teachcom (Wabag) na Blu Kumuls (Wabag).

Telikom (Goroka), em orait, Blu Kumuls (Hagen), Pascol (Hagen), na Kalam (Hagen) tu mas toksave long em hariap."

Em i tok olsem ol tim mas traim na baim hap mani i go pastaim long ples we ol i bukim ol long slip long dispela wik.

Ol tim o klab opisel mas hariap long ringim em long telepon namba 4721695 o 4722117 na tok save long em.

PMSA CHARITY KAP RIPOT

Charity Kap kompetisen i pulim planti kampani

HENRY MORABANG i raitim

INSTITUT ov Bisnis Stadis (IBS) i winim tupela taitel long Soka Charity Salens i bin kamap long wiken long Bisini graun.

IBS i winim mens taitel wantaim PNGBC na tu em i winim wimen soka kompetisen.

Long mixed divisien, Shepherd Lawyers i winim. I luk olsem biknem pilaia Cathy Davani yet i mas go pas long dispela tim long lukim ol i winim dispela namba wan taitel.


Siaman bilong ICFund Charity Salens, Rio Fiocco i tok em i amamas tru bikos kompetisen i bin kamap gut tru. Olgeta tim husat i bin kamap i amamas na i laik dispela kompetisen mas stap yet.

Fiocco i tokaut olsem Soka Charity Salens ya i wokim K5,000 we ol komiti bai givim i go long komiti bilong Aitape Disasta.

Siaman i tok em i gat tingting long mekim dispela kompetisen i kamap moa bikpela neks yia. Em i tok planti kampani na man i soim bikpela laik long dispela kompetisen.

Na long bikpela gem namel long Rapatona na Yunivesiti, ol boi Rapatona i bekim dinau bilong grenfainel na wilwilim Yunivesiti 4-2. Wina bilong dispela pilai i autim PMSA Charity Kap.

Bikpela astingting long kamapim dispela kompetisen em long wokim mani bilong lain husat i kisim bagarap na arapela em long traim bringim bek ol gutpela sapota o sponsa long sapatim soka insait long Pot Mosbi.



TELIKOM PNG

Now we're really talking!

PUBLIC NOTICE

To all landowners of mountain top sites in Papua New Guinea.

Calling all mountain top owners from or near the vicinity of the following areas:

Mt. Ialibu, Mt. Kerewa and Mt. Pumi in Southern Highlands Province; Mt. Quo and Mt. Kerigomna in the Simbu/Eastern Highlands Province; Mt. Burgess and Mt. Alupai in the Enga Province; Mt. Albowagi and Mt. Turu in the East Sepik Province; Mt. Notuku in the North Solomons Province; Cape Lemeris in the New Ireland Province and Mt. Mission in the Morobe Province.

Due to uncertainty with Land, Telikom PNG Ltd is seeking new mountain top sites for the possibility of installing Microwave Radio Repeater Stations in or around the vicinity of the above mentioned areas. Interested landowners/groups should call the Telikom Hotline 300-5862 or 300 5021 to register their interest. All land owner groups must be recognised by the local authorities, and their groups must be registered under the Customary "Land Groups Incorporated Act of 1974".

TOKSAVE

Toksave igo long ol Papa Graun bilong ol maunten istap klostu long Mt. Ialibu, Mt. Kerewa na Mt. Pumi long Sauten Hailens Provins; Mt. Quo na Mt. Kerigomna long Simbu na Isten Hailens Provins; Mt. Burgess na Mt. Alupai long Enga Provins; Mt. Albowagi na Mt. Turu long Is Sepik Provins; Mt. Notuku long Not Solomons Provins; Cape Lemeris long Niu Ailan Provins na Mt. Mission long Morobe Provins.

Bikos igat hevi long ol sampela maunten nau yet, Telikom i laikim harim sampela toksave i kam long ol papa graun bilong ol narapela maunten klostu long dispela ol hap. Sapos ol papa graun i laik givim maunten bilong ol long Telikom long sanapim wanpela masin bilong salim toktok, orait ol i ken ringim dispela telefon namba 300 5862 o 300 5021 na givim nem bilong maunten na grup bilong yupela. Tingim gut, ol lokal o provinsel gavman bilong yupela i mas luksave long grup bilong yu. Grup bilong yu i mas registaim pinis tum-buna graun bilong yu wantain "Customary Land Groups Incorporated Act (Lo) bilong 1974.

HADIBAIA HEREVA

Hadibaia hereva ia lao ororo tano biagudia Tari, Ialibu, Kerigomna, Turu, Albowagi, Mt. Misin, Mt. Burgess, Mt. Notuku, Mt. Lemeris bona ororo tano haida inai gabu dekenai.

Bema mai emu tano mia kava haida. Telikom PNG ia ura oi durua emu tano taina oi henia telefon misinidi haginia totona. Bema oi ura Telikom oi durua neganai emu tano oi regista guna Department of Lands dekenai gabeai inai namba oi ring 300 5862 eiava 300 5021 emu ura Telikom oi hadibaia.


Thomas Tulin
Managing Director

God i bungim yumi wantaim

JISAS i kam olsem God na man long soim mipela ol pipel bilong em olsem God i save kam long ol kain kain rot long bungim ol pipel bilong em. Ol pasin bilong Jisas na wok bilong em i soim pasin bilong stap laip na laikim arapela we i bikpela tumas winim pasin bilong yumi ol man bilong graun. Na bikpela samting tru em yumi ol manmeri i save pasim ai bilong yumi long lukim ol gutpela samting God i wokim long yumi. Yumi kirap na birua wantaim God na ol pasin bilong em na brukim ol lo bilong em. Taim yumi laikim tingim moa, yumi go longwe tumas long God, belhat na kros i kamap, yumi lus na sindaun bilong yumi go bagarap olgeta.

Tasol laip long pasin bilong God i no sut long ol trabel na hevi olsem. Olgeta diwai kros yu lukim long haus lotu o long matmat, em sain bilong yu mas kisim gutpela laip na amamas. Em i sain o piksa long dai bilong Jisas na wanbel pasin em i mekim long kisim bek yumi i go long em.

Tingim dispela, sapos yu ken. Dispela diwai kros, wanpela krangki pasin bilong kilim man. Long dispela diwai kros ol i nilim pikinini bilong God long en. Em i gutpela man o God na Man. Em i opim han bilong em long traim bungim olgeta husat i stap longwe na birua long God long olgeta i ken kam klostu long em. Bikpela samting em yumi



ol manmeri bilong graun i save oltaim stap longwe na abrus long pasin bilong God we em i laikim yumi long stap bishainim long dispela graun. Tasol diwai kros em piksa bilong kisim nupela laip na amamas na gutpela sindaun. Dispela em bikos God i soim yumi long bikpela laikim bilong em olgeta taim, maski yumi save abrus long kam klostu long em.

I gat wanpela God tasol na em i save putim han bilong em i go long olgeta manmeri wantaim. Jisas Krai i dai long yumi, i bringim God na ol manmeri i kam bung wantaim.

Husat bai rausim hevi bilong ston?

Mesaia i kolim Jisas Krai husat i givim planti bel isi long ol pipel bilong Isrel olsem Holi Pikinini bilong God i stap laip, nau tasol ol i nilim em long matmat na planim em long matmat. Bikpela pret i kamap, ol disaipel i pret na hait nabaut na wet tasol wantaim nogat gutpela tingting long mekim wanpela samting.

Long dispela taim ol meri tu i bin stap wantaim wari tasol ol i bin strongim ol yet na mekim plen long ol i mas go long matmat bilong Jisas long namba tri de na lukim bodi bilong Jisas. Ol i redim ol gutpela smel wel na flawa bilong kisim i go bilasim bodi bilong Jisas.

Taim ol dispela meri i bin redi gut na i go kamap long dua bilong matmat, ol i gat hevi bikos bikpela ston i sanap pasim dua bilong matmat. Na ol man husat bai pusim dispela ston i go longwe long dua i pret na hait i stap.

Ol i pret long birua bilong ol soldia na hevi bilong bikpela ston long dua bilong matmat, ol i no tingim dispela na ol i go tasol bikos ol i laikim tru dispela man i dai na i stap insait long dispela matmat. Ol dispela meri i nogat gutpela rispek na laikim insait long komyuniti na planti manmeri i no laikim ol. Dispela em ol rabismeri husat i bin painim amamas long bel bilong ol long wok bilong Jisas. Ol dispela meri i putim sait ol pret na birua ol bai bungim i go long beksait na ol i go long matmat wantaim ol naispela smel flawa na smel sanda long bilasim bodi bilong Jisas.

Nogat birua na nogat hevi i bungim ol taim ol i kamap long dua bilong matmat bikos bikpela senis tru i bin kamap. Ol i kirap nogut tru long lukim olsem bikpela ston long

dua bilong matmat i no stap moa na dua i op istap na bodi bilong Masta bilong ol Jisas Krai i no stap insait long matmat. Ol i kisim toksave olsem Jisas i kirap pinis. Em i no dai, em i stap laip. Dispela em long mekim toktok bilong profet i kamap tru olsem pikinini bilong God bai i dai na long namba tri de bai i kirap gen long matmat na husat i bilip long em bai kisim laip i stap oltaim oltaim.

Ol meri i ron hariap i go bek long bungim ol disaipel bilong Jisas olsem ston i no moa pasim dua bilong matmat na Jisas i no dai, em i kirap na stap laip.

Dispela em stori bilong Ista na em i as bilong Papua Niugini olsem wanpela kristen kantri long stapim olgeta wok bilong em na mekim lotu long God na tenkyu long em i larim pikinini bilong em i kam daun na dai long baim bek sin bilong olgeta manmeri. Dispela em stori bilong ol lain i gat hevi, i nogat gutpela sindaun, i save stap wantaim wari na pret na ol kain kain hevi long laip bilong ol. Ston we i save kalabusim yumi na daunim yumi i raus pinis long strong na pawa bilong bikpela Jisas taim em i kirap bek long dai. Em i givim yumi nupela laip na amamas long kisim nupela laip long bilip bilong yumi long dai na kirap bek bilong Jisas Krai.

Tude i gat bikpela pret long go insait long yia 2000. Planti i pret long bai i gat bagarap long olgeta kompyuta masin na planti samting bai bagarap we laip na sindaun bilong planti lain bai bungim hevi taim ol dispela sistem i bungim hevi. Planti manmeri insait long wol istap wantaim pret long wanem samting bai yia 2000 i bringim.

Ol meri long PNG i save stap wantaim pret olgeta taim bikos ol i save bungim kain kain hevi planti taim. Tude yumi harim nius bilong amamas na bel isi. Em i nius bilong yumi ol meri husat i no bin pret long ol soldia na bikpela ston tasol ol i go het long matmat bilong Jisas. Olsem na yumi tu i no ken pret tasol yumi mas go fowet na pait egensim ol birua na salens i stap long fran bilong yumi bikos yumi tu em ol pipel bilong dispela sosaiti na yumi tu ol pipel bilong God.

Papua Niugini i bungim planti hevi tude long sait bilong mani na ekonomi na baret namel long planti samting i wok long go bikpela. Hevi bilong lo na oda i wok long pretim yumi yet, pasin bilong kamap kisim planti kago na kamap mani man i wok long kamap long kantri bilong yumi na bagarapim planti samting bilong dispela kantri na i bagarapim ol gutpela samting olsem risos, pasin lotu na pasin kalsa bilong kantri.

Taim dispela kantri na ol lida na pipel bilong en i go longwe lusim pasin bilong God, bai moa hevi i wok long kamap. Ston bilong hevi long bisnis o ekonomi long kantri, hevi long komyuniti wantaim lo na oda na planti arapela trabel na hevi moa we bai bagarapim dispela kantri, yumi gat bikpela God husat i kirap bek long dai na i rausim dispela hevi bilong ston.

Yes Jisas i kirap bek! em i stap laip tude. Jisas i rausim hevi bilong ston. Yumi ol pipel bilong Papua Niugini i gat gutpela as long bilip.

Susan Setae, Nesenel Presiden Nesenel Kaunsil ov Wimen

SELF - HELP KREDIT SKIM

Dispela em i narapela gutpela nius bilong olgeta Morobe pipel husat i stap long provins or long narapela hap.

Wanpela nupela Sevings na Lons Sosaiti, ol i kolim

"MOROBE SAVINGS AND LOAN SOCIETY" i kamap nau na Morobe Provinsal Gavman i laik lukim dispela i kamap wanpela rot bilong helpim ol pipel.

Dispela nupela Savings na Lons Sosaiti i askim ol pipel long ol ples, ol wokman bilong provinsal na nesenel gavman, ol sios na NGO na ol bisnis haus long kamap memba.

Taim bilong sevim mani em **NAU** - maski long wet. Tingim famili bilong yu na yu yet na kamap memba.

Salim pas na askim long kisim dispela FRI TOKSAVE PEPA NAU.

Sapos yu laik kisim sevis hariap, orait salim dispela fom i kam bek long feks:

Nem:

Adres:

Morobe Savings and Loan Society Ltd.

P.O. Box 568

Lae, Morobe Province

Phone: 472 1777

Fax: 472 1778

LAI PSTAIL

WASTA WAI i raitim

PLIS Fos insait long Papua Niugini bai i gat wok patrol antap long klaut. Wantaim nupela helikopta gavman i kisim i kam long las wik, bai ol plisman i ron antap long klaut long ronim ol raskol husat i mekim trabel na ronawe long haiwe o long rot. Ol plis i kolim dispela em, eye in the sky, o ai insait long klaut. Dispela i min olsem ol plis fos bai nau lukluk i long klaut i kam daun long graun na sapotim ol plisman husat i ron long ka na mekim wok bilong ol long ronim ol man nogut o stapim ol trabel long kamap.

Dispela em wanpela bikpela senis na sapot tru bilong plis fos insait long kantri bikos em bai givim nupela plen bilong plis fos long wok bilong lo na oda insait long kantri.

Dispela em wanpela toktok i kamap tru bihain long Praim Minista Bill Skate i bin tokaut long palamen las yia olsem gavman bai baim wanpela helikopta bilong helpim wok bilong plis fos insait long kantri.

Planti ovasis kantri i gat helikopta bilong plis fos long yusim long wok bilong lo na oda insait long kantri bilong ol. Taim ol plis man i ron antap long helikopta na ronim wanpela stil ka o raskol i ronawe long ka, ol i ken luksave gut long wanem hap ol raskol i go na wanem kain ka ol man nogut i yusim. Ol i ken givim gutpela edvais long ol plisman i ron long graun long wanem hap o kona ci i mas go long en bikos dispela hap em ol raskol i go long en.

Dispela helikopta em wanpela gutpela helpim na sapot tru long wok bilong plif fos insait long kantri.

Taim i gat sampela birua tu long bikpela ren na tait wara we i brukim ol haus na banis o ol lain i raun long solwara na bungim birua long taim nogut, dispela helikopta tu i ken go hariap long sevim laip bilong ol manmeri long karim ol. Dispela helikopta tu i ken helpim long karim ol lain i bungim birua long ka eksiden long rot, sij na kanu o bot i kap-sait long solwara, paia i kukim haus na planti arapela birua. Dispela helikopta i ken helpim tu long karim kago i go long ol lain i kisim bagarap na sot long kaikai na ol helpim. Dispela helikopta i gat planti bikpela wok bilong helpim ol pipel bilong Papua Niugini. I no long taim bilong birua na taim nogut tasol. Em i ken helpim ol pipel tu long karim ol kago na saplai i go long ol klinik, skul, haus lotu na ol ples insait long bus.

Ol ripot i tokaut pinis olsem dispela helikopta bai i stap long Mosbi na wok klostu wantaim ol plisman



Plis fos bai lukluk long klaut i kam daun

long hia bikos Mosbi i save oltaim bungim planti bikpela raskol na trabel pasin. Tasol sevis bilong dispela helikopta bai i go tu long helpim ol plisman long arapela provins husat tu i laikim helpim bilong dispela helikopta.

I gutpela long bos bilong plis fos, Plis Komisina Peter Agilo long tokaut long ol plen o progrem bilong dispela helikopta bai ol pipel bilong Papua Niugini i save long ol wanem de na taim dispela helikopta i mekim wanem kain wok.

Planti plisman insait long kantri bai amamas bikos dispela em wanpela nupela sapot long wok bilong plis fos insait long kantri. Na ol plisman i ting dispela bai mekim planti bikpela wok bilong ol i go isi.

Planti taim yumi save ritim long nius olsem ol raskol i save sut long ol plisman taim ol i ronawe long ka. Na ol plisman i mas banisim ol yet long dispela olsem na ol isave pait bek na yumi i save harim pairap bilong sotgan we tupela ka i ronim narapela na paia i go i kam.

Oposisen lida Bernard Narokobi

i tokaut olsem pinis olsem dispela helikopta i no inap mekim stret wok bilong em bikos bai ol politiks lain i yusim tumas long wok na raun bilong ol. Mista Narokobi i kolim dispela helikopta em liklik toi bilong Praim Minista Bill Skate long pilai wantaim.

Wanem kain tingting tru em Mista Narokobi i gat long mekim dispela kain toktok?. Ating em i mas min olsem nogut Praim Minista na ol gavman lain bilong em bai yusim long raun long ol ples na distrik long ol wok bilong ol. O ating bai gavman lain i yusim helikopta long karim ol i go kem o pati long sampela longwe o hait ples na karim ol i kam bek.

Sapos gavman bai mekim olsem tru, ating bai dispela i bagarapim tru bilip na bel bilong ol plisman na ol pipel bilong Papua Niugini bikos ol i amamas long dispela helikopta long wanem wok tru em bai mekim.

Sapos dispela helikopta i bin kam long PNG long krismas taim las yia, ating bai dispela em wanpela gutpela krismas presen long ol plis fos long kantri na tu long PNG. Tasol em i kamap bihain tru

long dispela taim.

Nogut em taim bilong vot i nogat bilip i laik kamap long gavman bilong Bill Skate olsem na gavman i mas hariap kisim dispela samting i kam long mekim ol pipel i lukim na tok, yes, gavman i mekim gutpela wok tru long pait egensim hevi bilong lo na oda insait long kantri.

Gavman i tok long rausim 1000 plisman na meri na ating dispela helikopta i ken mekim wok bilong ol dispela 1000 manmeri. Dispela masin i kisim ples bilong mekim wok we gavman i katim daun namba bilong ol wokman long en.

Ol pipel bilong Papua Niugini bai kisim bikpela helpim na sapot tru long dispela helikopta sapos em i mekim tru wok bilong em long sevim laip bilong ol pipel long taim bilong birua, ronim na stapim ol raskol na planti arapela wok moa.


Taim dispela helikopta i ron antap long klaut i kam, em bai ron ples klia tru bikos i nogat samting i haitim em. Bai em i kam olsem wanpela bikpela pisin we olgeta manmeri bai lukim em i kam daun long klaut. Olsem na nau ol man

nogut o bikhet lain i mas stat long lusim ol bikhet pasin na stap isi bikos nau, em yupela i nogat rot o sans long ronawe na hait.

Bikos sapos yu stil na ronawe long ka o rot, ol plisman bai lukim yu isi tru antap long helikopta na ol i ken pinisim yu isi tru. Ol i ken bomim yu sapos yu bikhet tumas na pait bek long ol. Olsem na mi ting dispela em taim bilong ol bikhet man long senisim pasin nau bikos yu bai no inap moa long ronawe long ai bilong lo. Bikos lo bai lukim yu antap long klaut na holim yu tambolo long graun.

Sapos yu save stap long biksiti Mosbi, bai yu gat sans long lukim dispela. Bai i wankain olsem long muvi piksa we ol raskol i save pait wantaim ol plisman. Bai plis i sut long helikopta i kam daun long ol raskol i ronawe o ron long ka daunbilo.

Long nait, bai yu ken gat sans long lukim katres i sut long helikopta i kam daun long ol raskol na sapos ol raskol i sut i go bek long ol helikopta tu, bai yu ken lukim lait bilong katres i flai go antap.



Bik Bro REBO



BOSS... MIPELA STAP LONG BODA BILONG INDONESIA NALU!

ORAIT SLOWIM DAUN MOTO NA YUMI KRUIZ ISI ISI!



REBO TINGTING I STAP NA KIRAP NOGUT LONG PAIRAP BILONG GUN!!!

RATATA TATA TATA!!




HALT!! STOP!! BODA PAS! PAS!!



YES, HIA! MIGAT BODA PAS!!

YU FROM P.N.G AH? ORAIT, KAM AI SEK YO PASPOT!



YO PASPOT GUT, ORAIT AI SEK YO BOT.. EN AI ESKOT YU TU JAYAPURA, HI?



OL BODA PATROL BILONG INDONESIA SEKIM OL PINIS NA ESKOTIM TUPELA I GO LONG JAYAPURA..

IGO MOA NEKS WIK!



SIPAK MAIKY



HEY, YU GAT SAMPELA KOINS ILEPT AH? MI NOGAT YAH!

AIYOO! OLGETA KOINS BILONG MI TU I LUS YAH! 40t TASOL!

STORI I KAM LONG LAS WIK... TUPELA PORO KIOS TU LUS LONG DREIN!!!



EM I ORAIT! GIUM MI TUEATI TOEA NA YUMI KISIM BAS!

YEAH! HARIAP! EM LAS BAS YAH!



SANS BILONG TUPELA NA OL I SINGAIT LONG STOPIM BAS!!!

STOP!! STOP!! DRAINA STOP!!

!?!?



BAS I STOP NA TUPELA IGO INSAIT TASOL!!!

MIPELA KALAP PASTAIM!!

HOI! BAS FE I KAM PASTAIM!



NAU TUPELA SINDAUN GUT NA OL PEIM 20t BAS FE!!!

20t TASOL?!



NEKS MINIT TUPELA PORO PIAT I KAM AUTSALT... GERRAUT!! YU TUPELA SKUL MANGI, AH? G*? TRAIPELA ASSGRAS PINIS!!

AAAH!!!

PEI BIFO ENTA

IGO MOA NEKS WIK!

Amerika was long Serbia bagarapim pipel bilong Albania

WASHINGTON: Ol samting long Kosovo insait long Yugoslavia i no go gut bihain long tupela sait we i karamapim ol Kosovo Liberesen Ami na Gavman bilong Serbia i no sainim pis agrimen las wik. Presiden Milosevic i no wanbel long ol NATO fos na olsem em i les long sainim agrimen pepa. Bihainim dispela NATO, Amerika na ol Allies i go hetim ol ea straik long ol Yugoslav militeri taget.

I gat nau ol ripot olsem Serb gavman na ami i wok long kilkilim gut na mekim nogut long ol Albania pipel long Kosovo. Bihainim dispela, Amerika i tok em i yusim ol satalait long kisim evidens na kotim na sasim ol Serb lida na militeri komanda long wo kraims o hevi na pasin, nogut ol i wokim insait long dispela pait long Kosovo egensim ol Albania pipel.

Long Australia, planti Serbia pipel i egensim NATO na Allies ea straik

long Yugoslavia. Austrlai i bin kisim strongpela toktok long noken sapotim ol NATO ea straik. Long las na dispela wik, ol Serbia pipel long olgeta hap bilong Australia i karimaut protes straik long soim no amams bilong ol long ol samting i kamap long ples. Long Sidni na Melbon, samting olsem 11,000 Serbia pipel i tromoi ol ston na brukim ol stoa, ol bilding na ol opis we Amerika i gat konsal opis bilong em. Long Melbon, ol yangpela Serbia man bin tromoim ol paia krekna na kukim fleg bilong Amerika long konsulet bilding.

Praim Minista John Howard i tok egensim pasin we ol lain i wokim na em i tok em no gutpela na i mas pinis.

Long wankain taim, Amerika i bin lusim wanpela F117 faita balus bilong em long Yugoslavi long dispela wik. Dispela kain balus em i save abrusim ol reda masin.

Amerika i wok long sapotim ol NATO Allies long dispela pait bilong mekim Serbia Gavman bilong Slobodan Milosevic i lusim pasin we ol ami i wokim long ol Albania pipel long Kosovo husat i laikim indipendens.

Presiden Bill Clinton bilong Amerika i tok strong long sapotim ol NATO Allies long dispela Operesen Allied Fos ol i karimaut long Yugoslavia.

paia balus i bin paia tasol ol bin sevim pilot na kisim em i go long wanpela NATO beis.

Ripot i tok ol pipel long Amerika i bruk long namel wantaim sampela i sapotim Amerika long stap insait long NATO ea straik na sampela i egensim na ol i no laikim. Tasol planti i tok Amerika i mas givim morol sapot long stapim Serbia long kilim na bagarapim ol Albania pipel.



Bikman i hapman bilong tromoim lek tu ya...

• Noken ting em husat. Em Prins Charles tasol ya i danis wantaim wanpela profesenel densa bilong Argentina, Adrianna Vasile.

Prins Charles i bin mekim wanpela wokabaut i go long Argentina na Falklen Ailans long Saut Amerika tupela wik i go pinis. Ol toktok we i mekim long ol pipel bilong tupela kantri, Argentina na Falklens long stap gut wantaim i bin mekim Vais Presiden bilong Argentina belhat. Inglan na Argentinian i no save lukluk gut long wanpela arapela bihainim pait we fiftin (15) krismas i go pinis, tupela i bin pait long kisim Falklen Ailan. Ol soldia bilong Inglen i bin winim ol Argentina soldia long kisim bek ol Falklen Ailan we i stap klostu long Argentina.

Wokabaut bilong Prins Charles i bilong kamapim bel isi pasin namel long tupela kantri bihain long dispela pait long 1984. taim em i go long Falklens, ol pipel i givim bikpela welkam tru long em na ol i amams long ol toktok we em bin mekim long Argentina. - Pioto Guardian Weekly.



Namba wan taim ol meri Qatar i vot long ileksen... • Sampela kantri long wol i no givim ful luk-save yet long ol meri taim yumi long PNG i laki ya. Long ol kantri long Persian Galp, klostu long Midel Is, ol meri i no save givim vot long ol nesenele o lokol ileksen. Piksa i soim ol meri long Doha insait long kantri Qatar i vot long namba wan taim. Ol i putim ol vot pepa insait long balot bokis. Noken kirap nogut, kain klos ol meri i putim em pasin bilong ol meri long ol Galp na Midel is kantri we ol i save karamapim olgeta hap bodi bilong ol na lusim tasol hap bilong maus, ai na nus i stap long ples klia.

- Foto: Guardian Weekly

Sip i pulap kapsait long ol refuji bilong Ambon i ronawe lusim ples...

• Sip ya i pulap kapsait long ol pipel bilong Ambon Ailan we ol i save kolim tu long ol spais ailan long Indonesia husat i wok long ronawe lusim ples bikos long pait na hevi we i bagarapim sindaun bilong ol. Moa long 150 pipel i dai pinis insait long pait namel long ol memba bilong Kristen na Muslim lotu. Indonesia i gat 210 milien pipel na bikpela hap bilong ol pipel long Indonesia em ol i bilong Muslim lotu na liklik lain i bilong ol kristen sios. Long planti krismas i go pinis na i kam inap nau, Saut is esia i bin lukim ol spais ailan (Ambon) olsem ol modol ailan we ol pipel bilong ol kain kain lotu i save stap gut. Tasol nau hevi bilong mani we Indonesia i bungim na belhevi long sampela man i gat palnti samting taim planti i nogat wantai belhevi long ol setla husat i bin sindaun long ol spais ailan taim Presiden Suharto i kamapim dispela trensmaigresen progrem i mekim ol asples pipel i belhat na ol hevi i pairap nau. Hevi long sosel, rilijes na ol wanwan grup pipel i wok long kamap long olgeta hap bilong Indonesia we i gat moa long 17,500 ol liklik ailan long en.



Bebi Amerika mekim histri

LOS ANGELES, AMERIKA: Long namba taim long histri, wanpela meri long Amerika i karim bebi wantaim kiau we ol bin kisim long daiman bilong em. Tupela marit i no bin gat pikinini yet tasol taim man i dai long sampela asua, meri ya i sori nogut tru na 30 awa bihain long em i dai, meri ya i bin lukim ol dokta na ol bin kisim kiau bilong daiman ya. Ol i putim ol kiau long ais i staplong 15 mun na bihain putim long bel bilong Misis Vernoff, meri bilong daiman na em i karim bel long en. Ol dokta i tok dispela em i namba wan taim we ol i kisim kiau bilong daiman bihain long em i dai longpela taim (30 awa) na em i kamapim pikinini.

Nikel-Kobal projek kamapim wari long ol kostel pipel long Madang

SAPE METTA i raitim

BIKEPELA mekim save long laip bilong ol pipel long kostel eria long Madang we planti lain long hap na pis na abus samting bilong solwara bai kisim bikpela bagarap.

Em sapos ol lain bilong Nikel-Kobal (Nickle-Cobalt) projek i statim wok na kapsaitim ol kemikol o posin pipia i go daun long nambis na solwara klostu


long Austrolobe kos. Dispela kemikol i ken bagarapim laip na sindaun bilong ol pipel, ol pis na ol animel tu bai kisim taim.

Mausman na wokman bilong Bismark-Ramu projek Yat Paol long wanpela bung wantaim ol sumatin long Divain Wod Yunivesiti long Madang i tok samting olsem 60 milien tan bilong posin nogut bai i go daun long solwara long Austrolobe kos. Em i tok i nogat kot long dispela, tasol em i no gutpela long


bagarapim laip na sindaun bilong ol manmeri na ol abus bilong solwara.

Mista Paol i tok wankain bagarap i bin kamap pinis long ol arapela main senta olsem Panguna, Ok Tedi, Tabubil na Porgera.

Em i tok ol maining kampani na gavman i ken go het na bringim developmen na long wankain taim, mekim mani tasol ol i mas tingim tu laip bilong ol manmeri.



• (l-r) Francis Benny (EMTV) Sape Metta (The Forum) and Andrew Yavieb (Corporate Affairs Manager na Highlands Pacific long Kumbukar, Nikel Cobalt main sait long Ramu eria long Madang provins. Poto Wenceslaus Magun.



• Noken ting ol mama long ol arapela provins tasol i save samapim ol klos na salim long maket. Madang tu i gat namba long samapim ol kainkain stail klos na salim. Na i no dia tumas. Prais em i daun. Poto: Sape Metta.

Ailan Treding givim gutpela sevis long Karkar Ailan pipel

OL PIPEL bilong Karkar Ailan insait long Madang provins bai i no inap long bungim planti hevi moa long painim ekstra mani long baim sip na i go i kam na baim ol kaikai samting long ol bikpela stua long Madang taun.

Hevi i go daun taim ol painim pinis solkat taim Ailans Treding kampani i kisim sevis bilong em i go long Karkar Ailan na pipel bilong em. Ailan Treding kampani i kamapim pinis wanpela soping senta long Karkar Ailan na em i wok long givim gutpela sevis long ol pipel long hap.

Manesing Dairekta Kenneth Bott i tok long planti ya i go pinis, ol pipel bilong Karkar Ailan na i wok long givim gutpela sevis long ol pipel long hap.

Menesing Dairekta bilong Ailan Treding, Kenneth Bott i tok planti ya i go pinis ol pipel bilong Karkar i bin bungim planti hevi taim ol i laik kisim sip na ron i go long Madang taun long baim ol kaikai na kago samting.

"Sampela taim ol i save gat sans long kisim sip, tasol planti taim ol i no save gat sans na sip i save lusim ol na ol i save kam bek long Madang taun. Wankain pasin tu i save kamap long taim bilong tanim bek," Mista Bott i tok.

Em i tok nau yet bihain long lukim kain hevi, Ailan Treding i muv i go insait long Karkar Ailan na kirapim dispela soping senta. Mista Bott i tok Ailan Treding soping senta ya i gat olgeta kain kago samting na sevis em i givim we i wankain tasol olsem ol arapela bikpela soping senta long taun i save givim.

Em i tok bihain Ailan Treding i bin op long Epril 1998, ol pipel bilong Karkar i bin gat bikpela amamas bikos kampani ya i givim ol bikpela helpim long sait bilong sotim wokabaut bilong ol. Ailan Treding kampani em i wanpela brems bilong Industri we i beis long Fiji.



Rong Bilong Pasindia Sip

MAS 1999

For Passenger Bookings or Information

Contact Titus or Ita Ph: 472 2066 Fax: 472 5806, P. O. Box 1459, Lae, Morobe Province.

Vessel	Voy No.	Sailing from Lae for:	Day	Date	Time
--------	---------	-----------------------	-----	------	------

Please Note

*Gejamsao will be out for service from the 21st of March for Annual Survey, we regret any inconvenience caused by this disruption to our normal schedule service. Please refer to the schedule below for services during this period.

*Gejamsao >>>>>> Offers Daily Passenger & Parcel between Lae and Buki

*Gejamsao >>>>>> Departs Lae @ 0900am and Arrives Buki at 11.30am

*Gejamsao >>>>>> Departs Buki @ 12.30pm and Arrives at Lae at 3.00pm

*Mamose Exp.	599 N	Fin/Wasu/Madang/Wewak	Mon	01-03-99	9am
*Rita	461 N	Kimbe/Rabaul/Kimbe/Lae	Mon	01-03-99	4pm
Manebe	499 N	Finsch/Wasu/Madang	Tue	02-03-99	4pm
Nagada	420 A	Fin/Lab/Lae	Wed	03-03-99	4pm
Umboi	558 N	Lorengau (Lae)	Wed	03-03-99	4pm
Nagada	420 N	Fin/Sio/Wasu/GAL/Bil/Madang	Fri	05-03-99	12pm
*Rita	461 B	Fin/Lab/Fin/Lae	Fri	05-05-99	5pm
*Rita	461 D	Oro Bay/Lae	Sat	06-03-99	8pm

*Rita	462 N	Fin/Wasu/Madang/Wewak	Mon	08-03-99	9am
*Mamose Exp.	600 N	Kimbe/Rabaul/Kimbe/Lae	Mon	08-03-99	4pm
Nagada	421 A	Fin/Wasu/ (Lae)	Tue	09-03-99	4pm
Manebe	500 N	Lorengau (Lae)	Wed	10-03-99	4pm
*Mamose Exp.	600 B	Fin/Lab/Fin/Lae	Fri	12-03-99	5pm
*Mamose Exp.	600 D	Oro Bay	Sat	13-03-99	5pm

*Mamose Exp.	601 N	Fin/Wasu/Madang/Wewak	Mon	15-03-99	9am
*Rita	403 N	Kimbe/Rabaul/Kimbe/Lae	Mon	15-03-99	4pm
Manebe	501 N	Finsch/Wasu/Madang	Tue	16-03-99	4pm
Nagada	422 A	Fin/Lab/Lae	Wed	17-03-99	4pm
Umboi	558 N	Lorengau (Lae)	Wed	17-03-99	4pm
Nagada	422 N	Fin/Sio/Wasu/GAL/Bil/Madang	Fri	19-03-99	12nn
*Rita	463 B	Fin/Lab/Fin/Lae	Fri	19-03-99	5pm
*Rita	463 D	Oro Bay/Lae	Sat	20-03-99	4pm

*Rita	464 N	Buk/Fin/Wasu/Madang/Wewak	Mon	22-03-99	8am
* Mamose Exp.	602 N	Kimbe/Rabaul/Kimbe/Lae	Mon	22-03-99	4pm
Nagada	423 V	Buki (passenger only)	Tue	23-03-99	9am
Umboi	559 N	Finsch/Wasu/(Mag)	Tue	25-03-99	4am
Nagada	423 X	Buki/Fin/Lab Lab/Fin	Thu	26-03-99	9pm
*Mamose Exp.	602 B	Buki/Fin/Lab/Fin/Lae	Fri	26-03-99	5pm
Nagada	423 Z	Buki/Fin/Sio/Wasu/GAL/Bil/Mag	Sat	27-03-99	9am
*Mamose Exp.	802 D	Oro Bay	Sat	27-03-99	8pm

*Mamose Exp.	603 N	Fin/Wasu/Madang/Wewak	Mon	29-03-99	9am
*Rita	465 N	Kimbe/Rabaul/Kimbe/Lae	Mon	29-03-99	4pm
Manebe	603 N	Finsch/Wasu/Madang	Tue	30-03-99	4pm
Umboi	660 N	Lorengau (Lae)	Tue	30-03-99	4pm

Ron Bilong Kago Sip

MAS 1999

For Cargo Bookings Information:

Contact Philip or Yadi Ph: 472 2066 Fax: 472 5806, P.O. Box 1459, Lae, Morobe Province.

Vessel	Voy No.	Sailing from Lae for:-	Day	Date	Time
--------	---------	------------------------	-----	------	------

MAIN PORTS:

Wewak	345 A	Madang	Tue	02-03-99	8pm
Umboi	558 N	Lorengau (Lae)	Wed	03-03-99	4pm
Wewak	345 N	Madang/Wewak/Vanimo	Fri	06-03-99	10pm

Kuder	215 A	Madang	Tue	09-03-99	8pm
Manebe	500 N	Lorengau (Lae)	Wed	10-03-99	4pm
Kuder	215 N	Madang/Wewak/Vanimo	Fri	12-03-99	10pm

Wewak	346 A	Madang	Tue	16-03-99	6pm
Umboi	558 N	Lorengau (Lae)	Wed	17-03-99	4pm
Wewak	548 N	Madang/Wewak/Vanimo	Fri	19-03-99	10pm

Kuder	216 A	Madang	Tue	23-03-99	6pm
Manebe	502 N	Lorengau (Lae) Dangerous	Wed	24-03-99	4pm
Kuder	216 N	Madang/Wewak/Vanimo	Fri	26-03-99	10pm

Wewak	347 A	Madang	Mon	29-03-99	6pm
Umboi	560 N	Lorengau (Lae)	Tue	30-03-99	4pm
Wewak	347 N	Madang/Wewak/VanimoThu	31-03-99	10pm	

SMALL PORTS:

Manebe	499 N	Finsch/Wasu/Madang	Tue	02-03-99	4pm
Nagada	420 A	Fin/Lab/Lae	Wed	03-03-99	4pm
Nagada	420 N	Fin/Sio/Wasu/GAL/Bil/Madang	Fri	05-03-99	12pm

Umboi	557 N	Aitape	Mon	08-03-99	4pm
Nagada	421 A	Fin/Wasu/(Lae)	Tue	09-03-99	4pm
Nagada	421 N	Lab/Fin/Wasu/Dangerous	Thu	11-03-99	4pm

Manebe	501 N	Finsch/Wasu/Madang	Tue	16-03-99	4pm
Nagada	422 A	Fin/Lab/Lae	Wed	17-03-99	4pm
Nagada	422 N	Fin/Sio/Wasu/GAL/Bil/Madang	Fri	19-03-99	12nn

Umboi	559 N	Finsch/Wasu/(Mag)	Tue	23-03-99	4pm
Nagada	423 X	Buki/Fin/Lab Lab/Fin	Thu	25-03-99	9am
Nagada	423 Z	Buki/Fin/Sio/Wasu/GAL/Bil/Mag	Sat	27-03-99	9am

Manebe	503 N	Finsch/Wasu/Madang	Tue	30-03-99	4pm
--------	-------	--------------------	-----	----------	-----

Kanage bilong kolples Goroka na em i bilong (OK5) Okapa distrik, Isten Hailans provins. Kanage em i wanpela poisin man, wanpela taim em plenim bilong kisim ol mops long en i go patrol long kilim ol man. Kanage i kisim ol mobs bilong em na ol i go long wanpela haus-lain. Ol i go long painim wanpela man tasol dispela man i no kam long gaden bilong em so ol i lusim na wokabuat i go bek long haus bilong ol.

Ol poisen lain ya i go yet long rot na bikpela hevi ren i pundaun na mekim save long ol. Long wanpela gaden i stap insait long dispela gaden i gat wanpela kotwin haus i stap. Na long dispela haus mama bilong gaden ya slip i stap, em tu i brukim rot bilong em long go bek long haus. Meri ya i go slip insait stret long paia i stap long em. Yu save ren i bagarapim ol stret so Kanage pes man long go insait long wokim paia. Em i laik kisim paia na kukim em i holim stret susu bilong meri ya wantu tasol Kanage i toksave long ol mobs bilong em olsem yupela i noken kisim paiawut na kukim, mi tasol mi kukim paia na yumi bai slip. Em nau olgeta i go slip na Kanage i go antap long meri na i go slip wantaim meri ya. Tasol meri ya kisim binatan na putim stret long het bilong papa kela na binatan i kaikai Kanage stret. Turangu Kanage i kisim taim stret na i laik bikmaus, em i no isi ya. Olgeta mobs i kirap sem taim na ol i bikmaus sem taim. Turangu long dispela nait ol i no isi long ronawe. Taim Kanage i ronawe long bus em i bikmaus yet na ol mobs bilong Kanage i lusim em na ol i go nambaut. Kanage lus long dispela nait na em promis long noken i go na poisenim ol man.

Arebo Neke Boroko

Kanage em bilong Arowe. Pelpel manki em bilong liklik ples Aparas insait long bus. Wanpela taim em i laik raun liklik long nambis. Em tokim tambu bilong em olsem, em i laik kaikai pis. Tupela kisim kanu na tupela i go painim pis. Tambu bilong Kanage i no isi long sutim pis, klostu kanu i go daun. Tupela pul i go bek long ples, Kanage i sindaun long fran na tambu bilong em i sindaun long baksait bilong kanu. Wara i wok long go insait long kanu. Kanage lukim olsem na tokim tambu bilong em tambu, sapos wara i go insait long kanu na kanu i go daun, bai mi pul i go pas na bai yu go daun dring solwara is tap.

M. Awei Kimbe

Kanage em bilong Arowe, tasol em bilong bik bus tru. Em i no save raun i go long ol ples klostu long nambis, bai lukim solwara liklik na klostu em lapun. Wanpela taim em wantaim ol lain bilong em raun go long wanpela ples bilong nambis. Ol i wokabaut i go, tasol ol i go kamap long nait. Bikmoning tru paps Kanage kirap na wokabaut i go daun long nambis. Em i go daun sanap lukim solwara na em i ting olsem gaden bilong ol man bilong dispela ples. Kanage i go bek long hausbotwin wantaim na tokim ol lain bilong em olsem. Yumi ol man bilong bus yumi no save wokim gaden olsem ol nambis man. Yumi ba larim sampela bus na ol diwai i stap. Na long taim bilong burumim ol pipia bai yumi ipim i stap na kukim. Tasol ol nambis man nogat, ol i no larim sampela bus i stap, olgeta bus i go daun, na taim bilong burumim tu bai yu no inap lukim liklik pipia i slip nabaut, gaden yea i klin nogut tru. Samting tru em solwara.

M. Awei Kimbe

Paps Kanage em spak nogut tru, na i go kalap long balus na laik i go long Arowe. Long baksait i gat sampela ol wan spak bilong em tu i stap. Paps Kanage em bos na tokim ol lain bilong em, mi bai i go sindaun klostu long pailot. Pailot statim balus na laik tekop. Kanage tokim pailot taim yu surukim gia, bai yumi skip liklik long kona pastaim. Ol i rong i go long namel na Kanage, askim pailot, inap mipela singsing na danis antap long balus? Pailot tokim ol, yupela singsing tasol danis maski. Ol i go na narapela balus i lusim Arove na laik i go long Hoskins. Bihain Kanage tokim pailot. Sapos yu lukim narapela balus i kam bai yumi go klostu na stop long ol na bai mi givim mani long tambu bilong mi na tok-save long em pastaim.

M. Awei Kimbe

Tambu mama bilong Kanage i dai. Taim tok i kam kwiktaim Kanage i salim meri bilong em i go pas na toksave olsem em bai kam bihain. Taim meri bilong em go pinis orait boi kirap kukim traipela kaikai na em yet i kaikai pinis orait em tok olsem "bilong soim rispek long tambu mama bilong mi, taim mi kamap long haus bilong em mi no ken kaikai, olsem na mi mas kaikai pastaim long hia? Orait em kirap lusim haus na ples na em i go long ples bilong tambu mama bilong em. Em kamap pinis na ol i planim tambu mama bilong em pinis na ol kirap wokim bikpela kaikai stret. Tasol olsem Kanage tok pinis, em i laik soim rispek long tambu mama bilong em olsem na em i no kaikai, maski ol tambu na ol narapela askim em long kaikai, em tok bai em i no inap tru, namba 8 de i lus orait em bai kirap kaikai. Tasol Kanage ya taim em kaikai em i save kaikai bikpela

kaikai stret, em danis i no we bilong danis tu ya na maski taim em karai long man i dai, em save krai na bikmaus wantaim winim ol arapela. Ol tambu bilong em na ol narapela pusim em long kaikai tasol em les na ol yet i kaikai. Mekim olsem na 3 de bilong sori i lus nau em i stap hangre na krai sori stap maski em smelim gutpela smel em krai sori na sapa stret nau em memba 4 de nau, isi tasol taim em lukim nogat man insait long haus kaikai i kuk i stap em isi tasol i go insait em go na opim pot na lukim bin ya ol wokim sup na smel nais tru. Hariap tru em kisim spun na daunim stret wantu sampela lain kam nau, man em harim olsem ol i wokabuat i kam em kirap autim olgeta bin long spun i go insait long hat bilong em na putim long het. Ol i kam insait na ol tokim emlong em mas kaikai, tasol em i no laik. Bin i hotim het bilong em stret em kirap tanim tanim hat, ol lukim em em tok mi save nau tasol long ples bilong mi wanpela bikpela singsing bilong sekim hat i kamap mi sekim hat bilong mi bilong tingim dispela bung. Ol bin i hat nogut tru nau winim pastaim na em kukim het bilong em moa winim pastaim na kirap kalap wantaim pen na tok long ples em ol mekim olsem nau." Em sekim hat na danis em danis nabaut na tan wantaim long wanem hot bilong bin i strong moa. Em laik rausim hat tasol. Nogut ol narapela lukim ol bin em kirap singaut. Ol sek sekim ol hat long ples bilong mi olsem mi mekim nau, mi mas go. Trik bilong Kanage em moa yet.

Yautam Amas Wau

Lapun Kanage em bilong kol ples long Moka aninit long Mt Giluwe, Westen Hailans provins. Em save lukautim wanpela Muruk. Taim em laik go long gaden o


em go raun tupela save go wantaim. Wanpela taim Kanage angere nogut tru na em laik kaikai kaukau na em pasin Muruk ya long rop na hap rap em taitim long lek bilong en. Taim tupela kaikai lukluk long Kanage na stap. Kanage em lapun tit bruk ya na em kaikai wanpela kaukau isi tasol i stap na Muruk pinisim olgeta kaukau. Kanage em belhat nogut tru nau em kisim konjetome stik em rausim kaukau long en em givim hot wan stret long lek bilong Muruk ya. Kanage em no tingim em pasim rop long lek bilong em pulim Kanage tu go aut long haus na i go daun long maunten na go olgeta long wara Panda. Man olgeta as taget bilong en lus pinis na em ron as nating. Kanage kisim bikpela bagarap na long as bilong em na em sem long go long haus sik na em stap tu mun long haus.

Joseph Smith Tabubil

Kanage bilong Buang em i prenim wanpela meri Wambek. Tupela i pasim tok pinis long bai tupela i stori long Tu Mail. Tupela Kanage wantaim pren bilong em i lukim liklik ren i stat long pundaun olsem na Kanage i tokim pren. Bilong em long rausim ol samting na putim long baret. Na mitupela i go insait long toilet bikos ren i pundaun pinis. Tupela i pilai pilai i stap na Kanage i no save ren pundaun na wara tait long baret na wara i karim pens laplap klos trausis siot tait i brumim olgeta samting i go pinis. Kanage na pren bilong em i kam iukluk samting i no i stap. Tupela i nogat rot bikos tupela i stap as nating long toilet.

Yasaptung Burang Buang

KANAGE



Pasin bilong smok mariwana i kamap bikpela long Kimbe

Dia Edita,

OLSEM wanem, Kimbe i gat plisman tu o nogat? Mi save lukim long Kimbe taun pasin bilong smok mariwana i bikpela tru. Mi ting ol plis i nogat pawa long kisim ol dispela lain.

Dispela pasin bilong smok mariwana i mekim pasin raskol i pulap tru nau long Kimbe taun. Ating ol

nesenel plis na komiti plis i nogat pawa long kisim ol na ol i save karai long raskol.

Em tasol bikpela wari bilong mi, na sapos yu husat i laik bekim orait rait long Wantok bai mi ken lukim.

**Sonny Taken
Kimbe**

Gavana Wenge em rait man

Dia Edita,

Mi laik sapotim Morobe Gavana Luther Wenge.

Mi ken tok olsem em wanpela rait man stret na em wok long bringim ol sevis na developmen kam insait long provins na tu i go olgeta long distrik.

Yu tingim bipo ol olpela gavana ol bin winim nating ileksen o kisim nating sia na i nogat developmen i bin kamap insait long Morobe provins.

Olsem na nau yumi lukim yu husat man o meri yu i stap long wanem provins yu mas sapotim em na em i ken bringim sevis o developmen kam insait long distrik. Mipela lukim olsem dispela man em wanpela trupela lida.

Man em God i makim em pinis. Em mi wanpela bilip olsem em bai winim bek sia bilong em long yia 2002.

Tu tausent em bai winim yet bikos em wanpela trupela lida. Em tasol tingting bilong mi. Yu husat yangpela man o meri yu i stap long wanem hap kona yu laik sapotim o engensim mi plis rait tasol na mi ken lukim.

**Mista Nelson Kembun Nanag
Kimbe**

Wantok sistem bikpela long Kimbe Jenerel haus sik

Dia Edita,

Mi WANPELA sikman we mi laik kisim marasin na mi i go long Kimbe jenerol haus sik na long outpesen ol sista na nes ol i wok. Mipela sampela nupela lain, mipela i go baim K2 long namba na mipela kisim namba na wet long namba.

Tasol ol sista na nes ol i kam lukim wantok bilong ol, ol i

save tokples na ol save i go hariap kisim marasin na ol save i go. Mipela sampela bai sindaun yet na wetim ol long kolim namba bilong mipela i go kisim marasin.

Planti wok manmeri bilong Kimbe jenerol haus sik, i mekim wantok sistem. Long dispela as planti sikmanmeri na pikinini i save dai nating nating long outpesen.

Namba wan haus sik em Kimbe Taun klinik o Gibo klinik. Ol wok meri ol save wok gut, na givim gut marasin long ol sikmanmeri na ol pikinini. I nogat wanpela manmeri o pikinini i bin dai outsait long outpesen.

Hamas krismas ol i wok, i nogat wanpela sikman i dai long outpesen.

Olsem na nem bilong wok-meri na bos bilong ol het nem i go gut.

Em tasol liklik wari bilong mi na yu husat yu bilong PNG na yu stap long Kimbe pastaim na yu save long sik bilong haus sik yu laik sapot em yu ken.

**Peter T. Kaupa
Kimbe**

Torot Koles em i no pasindia ples

Dia Edita,

Mi WANPELA manki Hoskins, mi laik engensim toktok bilong Katekis bilong Rabaul Asdaosis i kamap long Wantok Niuspepa long 18 Februari 1999. Em i tok olsem Peter Torot Koles i kamap pasindia ples bilong ol Wes Niu Briten.

Mi laik askim Katekis ya olsem dispela koles o senta i gat lo bilong em tu o nogat. Sapos i gat mi askim yu wantaim prinsipol long karimaut dispela lo long rausim ol man nating.

Na noken bagarapim gutpela nem bilong mipela ol West Niu Briten. Sapos yu wantaim prinsipol i no inap rausim plis mi askim olsem yutupela i no fit long wok bilong yutupela.

Mi askim yu mas kisim Jisas long laip bilong yu. Nogut yu westim taim bilong yu. Sapos yu Katekis yu promis long bhainim lek mak bilong Jisas. I no long bagarapim nem bilong mipela olgeta Wes Niu Briten. Sapos yu ting ol i save wokim rong, yu mas stretim ol long tok bilong God. Ating yu wanpela arere bilong Katekis ya.

Ating yu wokim wok bilong God long strong bilong yu na i no Holi Spirit i makim yu long em.

Ol Is Niu Briten tu i pulap pasindia o ronawe long Volcano i stap nating wantaim ol wantok bilong ol long olgeta hap kona bilong Wes Niu Briten. Sapos yu kauntim, namba bai sot ya? Wel pam provins ya, bai yu kam yet na painim mani na noken bagarapim nem bilong mipela olgeta Wes Niu Briten. Husat i laik engensim em welkam tasol.

**Mr Chris Torovola
Hoskins**

Redim yu yet!

Dia Edita,

OLGETA HAP bilong ples daun o wol nau i gat bikpela bagarap tru. Hevi bilong gavman, hevi bilong politiks, hevi bilong lo na oda, hevi bilong sios, hevi bilong marit, hevi bilong famili, hevi bilong mani na planti ol arapela moa yet i stap.

Husat em inap long stapim o pinisim ol dispela kankain hevi na trabel. Wanpela askim em i stap olsem. Gavman em inap o sios em inap. O save bilong man em inap o tingting bilong man em inap.

Bilong man em inap o tingting ol dispela kain hevi na trabel. Dispela olgeta samting i kamap bilong inapim olgeta tok bilong God: Klostu long las de kankain hevi bai i kamap olsem

meri i laik karim pikinini na i pilim pen. Dispela em ol mak na sain we yumi ken save olsem las de em i kam klostu pinis.

Yumi noken i stap olsem enimol o pikinini i nogat gutpela tingting na save. Nogat, yumi mas kamap save manmeri long lukim ol dispela kain samting na stap redi long Jisas bai i kam bek.

I nogat manmeri i save long de bilong bikpela i kam bek. Tasol ol dispela kankain hevi na bagarap em i mak na sain we yumi ken lukim na save olsem klostu Jisas Krai bai i kam bek.

**Nicklaus Kwima
Kimbe**

Haus kaikai long kimbe i no gutpela

Dia Edita,

Mi NO amamas long haus kaikai bilong Kimbe. Haus Kaikai i no luk olsem haus kaikai. Sapos haus kaikai em i gat gutpela fom bilong sindaun na kaikai em bai gutpela. Na tu i no gutpela long ol pipel i kam insait long haus kaikai na baim ol kaikai na sanap tasol na kaikai. Em i no lo bilong haus kaikai. Lo bilong

haus kaikai em i olsem ol pipel i kam insait long haus kaikai, ol i baim kaikai na ol i mas sindaun gut na kaikai.

Dispela em i luk nogut long Kimbe taun olsem ol Konsuma Afeas Lain na helt inspekta mas pasim ol kain haus kaikai long Kimbe.

**Sonny Taken
Sandaun**

Noken stapim bia long lsten Hailans

Dia Edita,

Mi sapotim wanpela susa husat i rait i kam long Wantok Niuspepa long 4-02-99.

Mi harim planti paul pasin i wok long kamap long arapela provins. Tasol mi no harim kain stori bilong Goroka yet. Mi bilip sapos yumi pasim bia insait long provins bai pasin bilong smok spak brus (Mariuwana) bai kamap bikpela.

Nogat bia na ol wok long smokim drag i go i go na ol longlong na reipim ol yangpela meri krismas bilong ol 15 na

kam daun wantaim ol marit meri.

Mi ken tok long dispela as mi sapotim susa husat i rait i kam long Wantok Niuspepa long 04/02/99 na tok:

Noken stapim bia long Goroka. Larim bia i stap na stopim ol man long dring bia long Goroka taun. Mi les long harim planti stori nogut i kamap long lsten Hailans provins olsem na mi sapotim susa.

**Rocayabade Erina
Pot Mosbi**

Tenkyu Gavana Robert Lak long pawa

Dia Edita,


Mi WANPELA manki long ples na mi laik autim tingting bilong mi. Mi laik tok bikpela tok tenkyu bilong mi i go long Gavana Robert Lak.

Long em i laik putim pawa i go insait long ol ples na ol haus lotu long Westen Hailans.

Mi laik tok olsem Gavana Robert Lak i gat bikpela bilip long ol pipel bilong Westen Hailans na em i laik kirapim dispela wok long putim pawa i go insait long ol ples.

Na tu mipela ol pipel bilong Westen Hailans i amamas long kisim pawa lait long hap bilong mipela. Olsem na mi laik tok bikpela tok tenkyu na amamas bilong mi i go long yu Gavana Robert Lak na God i ken blesim yu long dispela wok bilong yu.

**John Topo
Banz**



PNG HIT

Parade
1999

SPONSOR - TRADEWINDS


W/B	L/W	T/W	SONG	ARTIST
1	1	1	Tahiti Summer	Maruia
5	5	2	Sweet Darling	Maruia
4	4	3	Swit Teine Blong Moro	XB1
12	6	4	Biguine A Gogo	Rod Dannys
2	2	5	Pace Stel	Pica Pica
3	3	6	Bula	Kapena/Sakiusa/George
6	7	7	Daigwai	Lia Osborne
7	8	8	I Roto I To'u Ora Ra'a	New Generation
9	9	9	Mi Lus Man	Lia Osborne
0	13	10	Kayama	Maruia
8	10	11	Ua Ro'o Hia To'u Ora Pa'a	New Generation
0	17	12	Te Rupe Rupe Ole Natura	Rod Dannys
11	12	13	Lutu Na Yakava	Kabani
0	0	14	Mango Uposi Kulsun	Taritos Band
14	15	15	Madio	Steve Lahui
13	14	16	Name Soda	Steve Lahui
10	11	17	Vavine Regina	Steve Lahui
15	16	18	Madang	Demas Saul
17	18	19	Kekeni	Noel Asi
19	20	20	Meri Ailan	Demas Saul

IN: *Mango Uposi Kulsun* **Taritos Band**
OUT: *If You Say* **Kool Roots**



PNG FM PTY. LTD.
Trading as
NAU FM
and
YUMI FM

P.O. Box 774,
Port Moresby
Papua New Guinea
Ph: (675) 320 1996
Fax: (675) 320 1995



Morobe Provincial Government

TOKTOK BILONG GAVANA LUTHER WENGE, MOROBE PROVINSAL GAVMAN, LONG SEREMONI BILONG STATIM WOK BILONG STRETIM OL ROT INSAIT LONG LAE SITI

24 Februeri, 1999

Mi amamas long sanap long ai bilong yupela na brukim graun long makim dispela de bilong wok i stat long stretim ol rot insait long Lae siti. Em i sans bilong mi tu long tokaut long plen bilong mi long ol arapela bikpela samting bai kamap long siti.

Lae em i wanpela bikpela siti long nambis na i sevim Morobe provins na ol ples insait we 45 pesen pipel bilong kantri i save stap. Longpela rot insait long kantri i joinim Lae i go long ol faipela Hailans provins. Lae i stap namel na i givim gutpela sevis i go long hailans, ailan, Madang na Oro Provins. Lae i mekim bikpela wok long helpim egrikalsa na ol maining opere-sen tu na bai skruim yet ol dispela wok long taim moa risos developmen projek i kamap bihain.

Lae bai gro na kamapim moa bisnis sapos i gat gutpela pawa saplai, bris, ples balus, telekomyunikesen, na gutpela rot. Sapos i gat gutpela rot transpot bai i gat kain kain developmen i kamap. Insait long ol taun tu i mas gat ol gutpela rot we ol ka i ken ran gut na ol bisnis bai i painim isi long mekim bilong ol, na ol pipel tu i raun gut long ples bilong pilai spot na mekim ol narapela wok. I mas gat gutpela rot long Lae i go long ol narapela hap insait long Morobe provins sapos yumi laik developmen i kamap.

Orait nau bai mi tokaut long ol plen. Morobe provinsal gavman i gat Namba Foa Provinsal Developmen Plen kirap long 1998 i go inap long yia 2013. Dispela plen i lukluk long;

- economic development
- Infrastructure development
- growth centres planning and redevelopment
- social development


Ol plen bilong bipo i no bin karim kaikai bikos gavman i no lukave long ol dispela plen na makim mani long kirapim wok. Gavman i no bin pasim tingting long kirapim wok olsem na nogat senis i kamap.

1. Economic Development

Sapos yumi laik lukim ikonmik developmen i kamap, orait wok i mas kamap tu long pulim ol kampani na pablik i kam kirapim bisnis insait long provins na kamapim wokmani insait long provins. Ol progrem na projek em inap kamapim ikonmik developmen bai kamap long egrikalsa, forestri, maining, ekotur-ism, indastrial developmen, eben na infrastraksa developmen.

2. Infrastructure Development

Infrastraksa developmen em progrem bilong wokim ol rot na bris. I mas gat gutpela rot insait long provins. Yumi mas stretim ol rot i stap pinis na lukluk long opim ol nupela rot na bris. I mas gat tu progrem bilong yusim gut ol dispela rot we sindaun bilong ol pipel



Gavana Luther Wenge

na ol bisnis insait long provins i ken kamap gut. Morobe Provinsal Gavman bai wok bung wantaim nesanel na provinsal gavman long kirapim ol bikpela wok bilong rot na bris, bihainim Provincial Development Strategic Plan.

3. Growth Centres

Wanpela strongpela aidia long politikal rifom em long kamapim ol gutpela setelmen we i ken kirapim wok na bringim mani i kam insait long kantri. Provincial Development Strategic Plan i lukave long tupela senta (Bulolo na Finschafen) we developmen bai kamap na tupela senta i gat gutpela rot i go kamap long Lae. Wok bai kamap insait long provins long joinim olgeta dispela senta wantaim.

4. Social Development

Bikpela as bilong sosel developmen em long stretim na strongim ol sevis bilong helt na edukesen insait long provins. Sapos ol pipel i kisim gutpela edukesen na i no gat sik, bai ol i strong long wok na bringim sevis i go long ol pipel.

Orait nau bai mi stori liklik long ol rot long Lae. Eben plen bilong Lae i winim 50 yia nau na i no gat gutpela plen moa long skruim wok i go bikpela. Siti i no bikpela tumas, long saut em solwara i banisim long Huon Galp, long west i gat Markham wara, na long not i gat Atsera maunten na long is em wara Bumbu i stap. I no gat bikpela graun tumas insait long siti long long kamapim ol wok developmen. Liklik spes we ol nupela kain developmen i ken kamap em graun we olupela ples balus i bin sanap.

Dispela progrem bilong stretim ol rot insait long Lae siti aninit long helpim bilong AusAID bai kamapim ples. Sapos i gat gutpela rot, bai bisnis i ran gut na i gat sans long kamapim nupela bisnis tu na ol pipel bilong Lae na provins i no inap wari moa long das i karamapim ol oltaim.

Gavman bilong mi i tok tenkyu tru long AusAID i givin K40milien long stretim ol rot insait long siti stat long Bumbu Bris i go kamap long bikpela maket. Mi amamas tu long luksave long dispela gutpela kampani Braclay Borthers husat i go pas long mekim ol wok long rot. Mi laik tok tenkyu tu long olgeta pipel bilong Lae na provins na ol kampani i gat bisnis insait long siti long stap isi na wetim wok i pinis long stretim ol rot insait long siti.

Mi gat tupela askim i go long nesanel na provinsal gavman:
namba wan - gavman i mas givim inap mani olgeta yia long stretim ol rot;

namba tu - wok i mas strong long pulim ol bisnis i kam insait long siti na provins.

Las askim bilong mi em long Lae Urban Development Plan we i karamapim Lae/Nadzab. Plen i mas kamap hariap long stiaim wanem kain developmen i kamap long dispela eria olsem bai olgeta samting i mas stap stret.



Wiken Spots Dro

KOIARI RUGBY LEAGUE - SOGERI

PRE-SEASON DRAW

Sunday, April 4, 1999.

Venue: Iarowari Sports Oval

12.00 H/Tigers vs Crystal Lakers, 01.00 S/Pukpuks vs Sogeri Choice, 02.00 I/Panthers vs Sirinumu Owls, 03.00 Safai Bears vs Vakasu Bears

Sunday, April 11, 1999.

12.00 Pukpuks vs Safai Bears, 01.00 Panthers vs Vakasu Brothers, 02.00 Lakers vs Sogeri Choice, 03.00 Tigers vs Sirinumu Owls

All clubs are urged to field one team only for this two weekends of pre-season. A general meeting will also be held and all clubs to send two delegated.

JIM FA' AUI MEMORIAL CUP - FINALS 15S PRE-SEASON COMPETITION

Saturday, April 3, 1999.

12.00pm Telikom vs Harluins Third and Fourth, 1.05pm Brothers vs University First and Second, 2.10pm Skallain vs Royals Third and Fourth, 3.15pm Harlequins vs University First and Second

OROGEN SCHOOLS SOCCER LEAGUE

WEEK 4 DRAW (03.04.99)

SATURDAY

Soccer match schedule for Under 7 to Under 15B, including times and scores.

Under 16A, 16B, 17A, 17B, 17C girls and boys soccer results.

Korobosea B Under 13A, 14A, 14B, 15B, 16A, 16B, 17A, 17B girls and boys soccer results.

H/Youth, St. Peters, P/Grammer, Coronation results.

PORT MORESBY PRE-SEASON TOURNAMENT (7-A-SIDE)

Saturday, April 3, 1999.

Football results for Bisini 1 Field 1 Pool (M/A), Bisini 1 Field 2 Pool (M/C), Bisini 1 Field 1 Pool (W/A), Bisini 2 Field 2 Pool (M/E), Bisini 1 Field 1 Pool (W/B), Bisini 2 Field 1 Pool (W/A), Bisini 2 Field 2 Pool (M/E), Bisini 1 Field 1 Pool (W/B), Bisini 2 Field 1 Pool (W/A).



POINTS LADDER

Points ladder table with columns: TEAM, P, W, L, D, FF, NR, F, A, PT.



ZENAG - Gutpela kiau

WANTOK SPOT



Sofbal taitel bai paia



• Pitsa bilong Malangan husat bai go pas long Goroka skwat long nesenel sofbal sempionsip long Lae long dispela wiken. *Poto: Sape Metta.*

NESENEL SOFBAL RIPOT

KROS namel long PNG Sofbal Federesen na ol teknikel opisal bai kamapim bikpela hevi tru nau long nesenel sofbal sempionsip.

Dispela sofbal salens bai kamap long Lae bihain long PNG Sofbal Federesen i autim long Mt Hagen wanpela wik i go pinis.

Dispela hevi nau i kamap we PNG Sofbal Federesen bai i no inap baim balus tiket bilong ol ampaia na skora.

PNG Sofbal Federesen i askim ol ampaia na skora long painim rot bilong ol long go kamap long Lae, na bihain nesenel sofbal federesen bai bekim mani bilong ol. Dispela toktok kros i wok long kamap namel long PNGSF na ol teknikel opisel bilong Is Nu Briten na Rabaul sofbal asosiesen.

Insait long wanpela ripot i kam long Rabaul, PNGSF i tokim tupela skora Ruth Sialis na Romalus Mong wantaim tupela ampaia Jeffrey Maira na Chris Meravaki long painim rot bilong ol yet long go long sempionsip.

Dispela toktok i kam long PNGSF i no gutpela tumas we Ruth Sialis i ting PNGSF i no bihainim gut lo pasin em i save mekim.

Ripot ya i tok olsem bipo PNGSF i save lukautim wokabout na haus slip bilong olgeta ampaia na skora. Na dispela disisen long ol teknikel opisel long painim rot i mekim planti bilong ol i tingting long kamap long sempionsip o nogat.

Presiden bilong RASA Nelson Paulias i tokaut olsem em i guria stret long lukim PNGSF i mekim kain pasin long Ms Sialis. Em i tok Sialis em wanpela rejinel skora bilong NGI. Paulias i tok em i mekim wanpela wok painim aut na lukim olsem

PNGSF i autim nem bilong Ms Sialis na putim nem bilong presiden bilong Is Nu Briten, Francis Rangattin.

Em i tok Rangattin i no memba bilong PNGSF eksekutiv. Ol ampaia na skora yes, ol i memba na ol i gat rait long yusim nem bilong PNGSF long kisim balus tiket.

Paulias wantaim wanpela eksekutiv memba Meli Paivu i singaut gen long Henry Kila (presiden) na Wesley Pialkolos (sekretari) long risain bikos ol i no mekim gutpela pasin. Arapela disisen we ol i rausim sempionsip long Mt Hagen na givim i go long Lae tu i no gutpela tumas.

Sapos PNGSF i no lukautim gut ol ampaia na skora, i luk olsem olgeta gem long sempionsip bai i no inap kamap gut.

Insait long arapela stori, PNGSF i saspensim Mt Hagen Sofbal Asosiesen bikos em i no bihain ol toktok bilong nesenel bodi.

PNGSF presiden Henry Kila i strongim disisen bilong em na tok olsem Mt Hagen i no save bihainim toktok na saspensim ol em i isi rot tasol long lainim ol. Nau Mt Hagen i no memba moa, em i min olsem ol bai i no inap stap insait long nesenel sofbal sempionsip.

Sapos ol i laik memba, ol i mas aplai gen olsem ol arapela senta bai mekim long dispela wiken long Lae. Nau yet 6-pela senta tasol bai stap insait long sempionsip. Port Moresby, Goroka, Is Nu Briten, Kimbe, Lae and Rabaul.

Arapela tupela Wewak na Buka i soim laik tasol ol i no kisim wanpela toktok yet i kam long ol opisel.

Nau yet ol pilaia long Goroka i paul liklik bihain long ol eksekutiv i laik wanwan pilaia i mas baim K100. Planti pilaia bilong Goroka i no wok na dispela i givim hattaim tru nau.

PNG lus tasol Fiji karim nem yet bilong Melanesia

HONG KONG SEVENS RIPOT

PAPUA Niugini Pukpuks i no laik tumas long Hong Kong Sevens tasol Melanesia brata bilong en, Fiji, i winim Kap bihain long em i autim Nu Silan 21-12.

Dispela win bilong Fiji em i namba 9 taim long ol i winim dispela Hong Kong Sevens Kap.

Ol Pukpuk i go inap long semi-fainel bilong Plate tasol i lus long Japan 24-21. Long namba wan raun, PNG i nekim Japan 31-14 tasol ol i bekim dinau long semi fainels.

Japan i winim Plate bihain long em i autim Scotland 33-31. PNG i kamapim gutpela gem long pul bikos ol i pilai

sampela gem long Fiji long redim ol yet long dispela tonamen.

PNG Pukpuk i stap long Pul C wantaim Australia, China-Taipei na Japan.

Insait long namba wan gem, PNG i lus long biknem na wol sempion bilong yunion, Australia 10-7.

Insait long ol arapela gem, PNG wilwilim stret China-Taipei 54-5.

Waisale Serevi, wanpela biknem pilaia bilong Fiji husat i pilai long Japan i go pas long win bilong Fiji. Fiji scorim tripela trai we Serevi i kikim olgeta konvesen.

Nu Silan i putim tupela na wanpela ol i kisim konvesen.

Long haptaim Nu Silan i go pas wantaim skoa 12-7.



• Severi husat i go pas long win bilong Fiji long namba 9 taim long Hong Kong Sevens.

Pot Mosbi i tokaut long trening skwat membas

YUT SOKA RIPOT

HENRY MORABANG i raitim

OROGEN Skul Soka long Pot Mosbi i makim pinis wanpela ten seven (17) junia pilaia long stap insait long trening skwat bilong Papua Niugini Futbol Asosiesen long dispela mun.

Dispela ol pilaia bai joinim 17 arapela pilaia bilong Lae, Enga na Kaiapit we namba i sanap long 34 junia pilaia olgeta. Bihain long wan wik kem, ol selekta bai daunim

namba bilong ol pilaia i go long 20 we ol bai go long mun Me.

Namba wan kem bai stap long Sande Epril 4 na pinis long Fraide Epril 9. Dispela trening skwat em ol yangpela bai skulim ol kain liklik tetik long yusim egens long oposisen bilong ol.

Ol selekta bai tokaut long fainel 20 pilaia bihain long wanwik kem. Ol lain i winim spes long tim bai gobek long ples na kam holim fainel kem long De La Salle Haiskul klostu long Bomana.

Kem long De La Salle bai stat long Epril 18 bipo long tim i lusim kantri long Epril 25. PNG Anda 17 skwat

bai go olsem long Solomon Ailan na bihain go long Fiji.

Dispela Osenia Anda 17 kik resis bai kamap long tripela ples Nandi, Bai na Lautoka long Fiji. Sempionsip bai stap long Me 1 na pinis long Me 14.

Wanem tim i win long dispela Osenia rijen salens bai stap insait long Anda 17 FIFA Wol Kap fainel long Nu Silan long November.

Nu Silan olsem kantri husat bai holim dispela sempionsip bai go insait isi tri. Sapos Nu Silan i win, wanem kantri i kamap namba tu bai go insait long dispela resis. Em i gutpela sans tru we PNG i mas pilai gut

long traim kamap namba tu long dispela resis.

Skwat ya em; Samson Tokiala, Jamie Kora (De La Salle), Adoff Kaien (Ted Diro), Brian Kumasi, Gerard Hau, Oliver Kuyei (Gordons Secondary), Rensper Baloloi (PM Grammer), Noel Hakopes (Don Bosco), Johnson Nin, Jeffrey Feeger, Tapas Changol, Gueina Babana Chiquie Posman (POMIS), Sean Katap (Gerehu), Brian Tohian, Abraham Ewok (Kila Kila High), Joel Buleka (Badihagwa) reserves Jack Paimet (Don Bosco), Kutan Salaiu (Kilakila High) Jeffrey Sheekiot (Korobosea).

Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.